

K301

Kuwakana ya Mpa



Luzingu ya Yesu 2
Kisalu ya Yesu na Galilea
(Matayo, Marko, Luka, Yoane)



Matondo na www.freebibleimages.org/Sweet Publishing sambu na foto!

Luzingu ya Yesu,


Mukanda 2

Kisalu ya Yesu na Galilea

(Mikanda ya Matayo, Marko, Luka, ti Yoane)

Baleso 32 sambu na bana ti bajeune

Edition 2024



YESU YANTIKAKA KISALU NA YANDI NA NTOTO YA GALILEA (baleso 32)

Dititi

1. Yesu bingaka balonguki ya ntete (Simon Pierre, André, Filipi, Natanaele Yoane 1 :35-51.....	3
2. Yesu yantikaka kusala bimpa. Yandi bakaka masa ti kitulaka yo vinu. Yoane 2 :1-11.....	7
3. Yesu longaka Nikodemus mfunu ya kubutuka ya kimpeve. Yoane 3 :1-21.....	11
4. Yoane fweti kita, Yesu kuma nene. Yoane 3 :22-36.....	15
5. Yesu songaka nkento ya Samaria nde Yandi kele Mesia. Yoane 4 :1-44.....	19
6. Yesu samunaka na Galilea ti Yandi belulaka mwana na distance Marko 1 :14-15, Yoane 4 :45-54.....	23
7. Yandi longaka na nzo-Nzambi nde Yandi kele Mesia. Luka 4 :16-21.....	27
8. Yesu bingaka balonguki iya sambu na kubika kisalu na bo ya kuloba, kusadisa Yandi na kisalu na Yandi (Pierre, André, Yakobo, Yoane). Matayo 4 :18-20, Marko 1 :16-20, Luka 5 :1-11.....	31
9. Yesu katulaka mpeve ya mbi ti bantu yitukaka na kiyeka na Yandi. Marko 1 :21-28, Luka 4 :31-37.....	35
10. Yesu sadisaka bantu sika Yandi vandaka, kansi Yandi pusanaka na kusamuna na babwala ya nkaka mpi. Matayo 8 :14-17, 3 :23-25, Marko 1 :29-39, Luka 4 :38-44.....	39
11. Yesu belulaka bamalade ya ngolo—lepre, paralyze. Matayo 8 :1-4, Marko 2 :1-12.....	42
12. Yesu bingaka Matayo, muntu ya masumu. Matayo 9 :9-13.....	46
13. Yesu songaka mutindu kuzitisa lumbu ya bisambu. Matayo 12 :1-2, 7-14.....	50
14. Yesu sambaka, ebuna Yandi solaka balonguki 12. Luka 6 :12-16.....	54
15. Yesu songaka mpila bantu fweti zinga na kimfumu na Yandi Matayo 5 :1—7 :29.....	58
16. Yesu belulaka sielo ya soda ti tedimisaka mwana ya mufwidi ya nkento. Matayo 8 :5-13, Luka 7 :1-17.....	62
17. Yoane sosaka kuzikisa kana kieleka Yesu vandaka Mesia. Matayo 11 :1-6, Luka 7 :18-23.....	66
18. Yesu nganinaka babwala ya buyaka kubalula ntima, kansi Yandi yambaka bo ya zola kwisa na Yandi. Matayo 11 :20-30.....	70
19. Nkento ya masumu pakulaka makulu ya Yesu mafuta. Luka 7 :36-48.....	74
20. Bantu monaka bimpa ya Yesu mutindu na mutindu. Luka 8 :1-3, Matayo 12 :22-24.....	78
21. Bampangi ya Yesu ti Bafarize yindulaka nde Yesu me lauka to Yandi vandaka na mpeve ya mbi. Marko 3 :20-30.....	82
22. Fami ya Yesu bo ya lemfuka na Nzambi. Marko 3 :31-35.....	86
23. Yesu yantikaka kulonga na bingana—kingana ya ntoto ya mbote ti ya mbi. Matayo 13 :1-23.....	90
24. Yesu longaka bingana ya nkaka. Matayo 13 :24-30, 36-43.....	94
25. Yesu longaka bingana kusonga nki me luta mfunu. Matayo 13 :44-46, 51,53.....	98
26. Yesu kangaka mupepe ya ntembo. Marko 4 :35-41.....	102
27. Yesu katulaka mpeve ya me tula muntu lauka. Marko 5 :1-20, Luka 8 :27.....	106
28. Yesu tedimisaka mwana ya Yairusi ti belulaka nkento ya simbaka lele na Yandi. Marko 5 :21-43.....	110
29. Yesu songaka balonguki kulomba Nzambi kutinda bantu ya kisalu sambu na kukatula bambuma na Yandi. Matayo 9 :27-38.....	114
30. Bantu ya bwala ya Yesu buyaka Yandi mbala ya zole. Marko 6 :1-6.....	118
31. Yesu tindaka balonguki na Yandi zole-zole. Marko 6 :7-13.....	122
32. Kutuba ya buzoba ya Erode natilaka yandi makambu. Marko 6 :14-28.....	126
Lusadisu sambu na malongi yai:	
Karte geografika ya Israele na ntangu ya Yesu.....	130
Linya ya Ntangu.....	131

Bankunga beto sadila na mukanda yai.....	134
Bangindu nki mutindu kulonga mikanda ya Bible.....	138
Bangindu nki mutindu kulonga baverse ya Bible.....	139
Version Mwinda ya Bible Kele Nki ?.....	140

Baverse yonso ya Bible ya beto me sadila na mukanda yai kele ya VERSION MWINDA ya me salama na Ministères pour Chaque Enfant.

Merci sambu na bafoto ya nkaka na www.freebibleimages.org/ Sweet Publishing, Good News Publications, Willem de Vink, Jesus Messiah Project.

Leso 1. Yesu bingaka balonguki na Yandi ya ntete

Yoane 1 :35-51

I. PREPARATIO SAMBU NA MONITEUR-

Kuyidika na ntwala :

Tala karte geografika ya ke songa masa ya Jordani ti ntoto ya Galilea.

◎ Kikuma ya Leso :

Beto songa bampangi na beto nki beto me zaba sambu na Yesu na mpila nde bo kuzaba Yandi mpi.

♥ Verse ya Kulonguka :

Yandi (Andre) kwendaka kusosa ntete mpangi na yandi Simoni, ebuna yandi songaka yandi nde, « Beto me mona Mesia . » Yoane 1 :41

↖ Bankunga ya kwenda nzila mosi ti lesò :

Kana Nge Me Vuluswa, Tubila Bampangi
Kwenda Nord, Kwenda Sud

II. REVISIO

↗ Kuyindula diaka baleso me luta :

Yoane me songa nde Yesu kele Mwana-Dimeme ya Nzambi me tinda sambu na kufuta mfuka ya masumu na beto. Yoane me botika Yesu, ti Tata Nzambi me tuba nde Yesu Mwana na Yandi ya Luzolo. Mpeve ya Nzambi me monika bonso pizio, me kulumuka na zulu ya Yesu. Satana me meka Yesu, ti Yesu me nunga bampukumunu yonso na Yandi. Ntangu me lunga sambu Yesu kuyantika kisalu na Yandi. Kisalu yina ta twadisa Yandi na kulunsi.

III. KULONGA LESO YAI

→ Kuyantika :

Katuka na luyantiku, Yesu zabaka nde Yandi ta bikala ve na ntoto yai tii kuna. Yandi ta manisa kisalu na Yandi, ebuna na nima Yandi ta vutuka na zulu. Yandi bakisaka nde Yandi ta vanda na mfunu ya bantu ya nkaka kulanda kisalu na Yandi. Yo yina, mambu ya ntete Yandi salaka vandaka kuyantika kubinga balonguki.

❖ Malongi ya nene ya lesò yai (developpement) na banti 4 :

1.1 Andre yantikaka kulanda Yesu sambu Yoane tubaka nde Yandi Yesu Mwana-Dimeme ya Nzambi.

BOOK Tangila bana baverse yai :

Yoane 1 :35 Diaka, na lumbu na nima, Yoane vandaka kutelama na balonguki na yandi zole.

36 Ebuna yandi monaka Yesu kutambula, ti yandi tubaka nde, « Atasio ! Yai Mwana-Dimeme ya Nzambi ! »

37 Balonguki zole yina, bo waka mpila Yoane tubaka, yo yina bo landaka Yesu.

40 Mosi ya bantu zole ya vandaka kuwa Yoane ti ya landaka Yesu vandaka Andre, mpangi ya Simoni Pierre.

? Yula bana

↖ Bana sala bageste to mwa-senete

↖ Bana yimba ti kina

1.2 Andre kwendaka kusonga mpangi na yandi Simoni, ebuna Simoni yantikaka kulanda Yesu mpi.

BOOK Tangila bana baverse yai :

1 :41 Yandi (Andre) kwendaka kusosa ntete mpangi na yandi Simoni, ebuna yandi songaka yandi nde, « Beto me mona Mesia . »

42 Ebuna yandi nataka yandi na Yesu. Ntangu Yesu monaka yandi, Yandi tubaka nde, « Nge kele Simoni, mwana ya Yonasi. Beto ta binga nge ‘Sefasi’, disongidila nde, ditadi ya fioti.

? Yula bana

↖ Bana sala bageste to mwa-senete

↖ Bana yimba ti kina

1.3 Yesu bingaka Filipo.

BOOK Tangila bana baverse yai :

1 :43 Na lumbu na nima, Yesu zolaka kukwenda na ntoto ya Galilea. Yandi sosaka Filipo ti tubilaka yandi nde, « Kwisa kulanda Mono.»

? Yula bana

✗ Bana sala bageste to mwa-senete

☛ Bana yimba ti kina

1.4 Filipo songaka mpangi na yandi Natanaele, ebuna yandi landaka Yesu mpi.

BOOK Tangila bana baverse yai :

1 :45 Na nima, Filipo sosaka Natanaele ti tubilaka yandi nde : « Beto me mona Muntu ya Moize sonikaka sambu na Yandi na mikanda ya Bansiku, Muntu ya baprofete mpi vandaka kutuba sambu na Yandi. Yandi kele Yesu, Mwana ya Yozefi ya bwala Nazareti. »

46 Natanaele yulaka Yandi nde : « Keti mambu ya mbote lenda katuka na Nazareti ? » Filipo nde : « Kwisa kumona. »

47 Ntangu Yesu monaka Natanaele ke kwisa na Yandi, Yandi tubaka sambu na Natanaele nde : « Tala muntu ya Israele ya kieleka mpenza. Ata mambu mosi ya luvunu kele na Yandi ve. »

48 Natanaele yulaka Yandi nde : « Nki mutindu Nge me zabaka mono ? » Yesu vutulaka nde : « Ntangu Filipo me binga nge ntete ve, ntangu nge vandaka na nsi ya nti ya bafigue, Mono monaka nge. »

49 Ebuna Natanaele tubilaka Yandi nde : « Longi, Nge kele Mwana-Nzambi ! Nge kele Mfumu ya Israele ! »

? Yula bana

✗ Bana sala bageste to mwa-senete

☛ Bana yimba ti kina

>|< Kumanisa Malongi :

Andre songaka mpangi na yandi Pierre nde yandi me mona Mesia. Filipo kwendaka kusonga mpangi na yandi Natanaele. Kana beto me yamba Yesu Kristo, bantu ya ntete ya beto fweti songa kele bampangi na beto. Andre ti Filipo bakisaka mambu mingi ve sambu na Yesu ntangu bo bingaka bampangi. Tala, Filipo yindulaka nde Yesu vandaka Mwana ya Yozefi. Yandi bakisaka ntete ve nde Yandi

vandaka Mwana ya Nzambi. Beto fweti zaba mambu yonso ve. Beto yantika kaka na kusonga bampangi mambu ya beto mosi me bakisa. Ata yo vanda fioti, Nzambi lenda sadila yo na mpila nde bampangi na beto mpi kwisa kuzaba Yesu.

☛ Devoir sambu na bakristo :

Bana bakristo, kiese mingi kana bampangi na beto zaba Yesu mpi ! Mbala mingi, muntu kwisa na Yesu sambu na ndinga ya mpangi na yandi. Keti nge me songa bampangi na nge nki mutindu nge yambaka Yesu na lizingu na nge? Mposo yai, sosa mpangi mosi ya nge me songa ntete ve. Songa yandi nki nge bakisa sambu na Yesu ti nki mutindu nge me ndima Yandi.

♥ Verse ya Kulonjuka :

Yandi (Andre) kwendaka kusosa ntete mpangi na yandi Simoni, ebuna yandi songaka yandi nde, « Beto me mona Mesia . » Yoane 1 :41

☛ Bankunga ya kwenda nzila mosi ti leso :

Kana Nge Me Vuluswa, Tubila Bampangi Kwenda Nord, Kwenda Sud


✚ Invitatio sambu na bo yina me yamba Yesu ntete ve :

Kansi, mbala ya nkaka nge lenda songa bampangi ve nki mutindu nge me kwisa na Yesu, sambu nge me balula ntima na Yandi ntete ve. Kana nge me bakisa nde Yesu kele Mwana ya Nzambi, me fwaka sambu na masumu na nge, me telama na lufwa, mbote nge yamba Yandi bubuyai. Masumu me fwaka kinduku na nge ti Nzambi, kansi Yesu Mesia lenda vutula kinduku yina. Nge lenda binga Yesu kugulusa nge konso ntangu, konso sika nge kele.

Bo ke ndima Yesu mbala mosi kaka, bonso muntu lenda butuka mbala mosi kaka na kimuntu. Kestio ya nene kele keti nge zabaka mbote nde yo me salama. Konso mposo, beto kele awa na nima ya ecodim sambu na kusadisa bantu ya zola kuyamba Yandi.+

NSUKA YA LESO 1

¶ Kana ntangu lunga, longa ndambu mikanda ya Bible. Bangindu kele na nsuka ya mukanda yai.



Leso 1

**Filipo waka Yoane
Baptiste songa
bantu nde Yesu
vandaka Mesia yina
bo me kinga. Yandi
kwendaka nswalu
kusonga mpangi na
yandi Natanaele. Yo
yina Natanaele mpi
kwisaka na Yesu.

Kiese kusonga
bampangi!**

Leso 1

**Yandi (Andre) kwendaka kusosa
ntete mpangi na yandi Simoni,
ebuna yandi songaka yandi nde,**

**« Beto me
mona
Mesia ! »**



***Yoane
1 :41***

Leso 2. Yesu yantikaka kusala bimpa.

Yoane 2 :1-12

I. PREPARATIO SAMBU NA MONITEUR-

◎ Kikuma ya Leso :

Beto tula ntima nde Yesu ta pesa beto mambu yonso ya beto ke na yo mfunu, ata beto bantu mona mpila, to beto mona mpila ve. Beto bakisa nde Yandi lenda sala mambu yonso, sambu Yandi kele Nzambi kibeni.

♥ Verse ya Kulonguka :

...Nzambi lunga sala mambu yonso. Luka 1 :37b

↖ Bankunga ya kwenda nzila mosi ti leso :

Kieleka Nge Ke Nene
Mazono, Bubu, Mvu ya Mvu

II. REVISIO

↑ Kuyindula diaka baleso me luta :

Yesu me yantika kisalu na Yandi. Yandi me binga balonguki iya ya kele kutambula nzila mosi ti Yandi. Bo banani ? (Andre, Simoni Pierre, Filipo ti Natanaele) Kansi Yandi me yantika kusala bimpa ntete ve. Bubuyai beto ta mona kimpa ya ntete ya Yesu salaka.

III. KULONGA LESO YAI

→ Kuyantika :

Bana, keti beno me mona bantu ya kele na boma kulanda Yesu ? Bo yindula nde bo ta fwa na nzala to bilele na bo ta beba, to nki, to nki. Bo bakisa ve nde Yesu ta keba bo, Yandi ta lunda bo na mambu yonso. Kansi Yesu kele ngolo kulunda bantu na Yandi. Yandi kele Nzambi, yo yina Yandi lenda kupesa beto mambu yonso ya beto ke na yo mfunu !

❖ Malongi ya nene ya leso yai (developpement) na banti 4 :

2.1 Yesu ti balonguki na Yandi vandaka na fete ya makwela bu mama ya Yesu songaka Yandi nde vinu me mana.

❖ Tangila bana baverse yai :

Yoane 2 :1-2 Fete ya makwela salamaka na bwala Kana na ntoto ya Galilea...ti mama ya

Yesu vandaka pana. Yesu ti balonguki na Yandi mpi...

3 Ntangu vinu na bo manaka, mama ya Yesu tubaka na Yandi nde, "Bo kele na vinu diaka ve."

? Yula bana

↖ Bana sala bageste to mwa-senete

↖ Bana yimba ti kina

2.2 Mama ya Yesu songaka basielo kusala konso mambu Yesu ta songa bo. Ebuna Yesu songaka bo kufulusa mabungu 6 na masa ti kunata ndambu na kapita na bo.

❖ Tangila bana baverse yai :

5 Mama na yandi vutulaka basielo nde : « Beno sala konso mambu Yandi ta songa beno. »

6 Kuna vandaka mabungu sambanu...Konso dibungu lunga simba kiteso ya balitre nkama mosi (100 l) ya masa.

7 Yesu songaka basielo nde : « Beno fulusa mabungu na masa. » Yo yina, bo fulusaka yo tii na zulu.

8 Ebuna Yandi songaka bo nde, «Baka ndambu. Beno nata yo na kapita na beno basielo.» Yo yina, bo salaka yo.

? Yula bana

↖ Bana sala bageste to mwa-senete

↖ Bana yimba ti kina

2.3 Nkwa-fete yitukaka nde vinu vandaka mbote mingi mutindu yina.

❖ Tangila bana baverse yai :

9 Bu kapita tesaka masa ya me kituka vinu, yandi bingaka nkwa-makwela...

10 Nkwa-makwela, yandi tubilaka bo nde :

"Konso muntu na luyantiku ke pesa bantu vinu ya mbote, ebuna, na nima bantu me nwa mbote, yandi basisa vinu ya mbote mingi ve. Kansi nge me bumba vinu ya mbote tii ntangu yai !"

? Yula bana

↖ Bana sala bageste to mwa-senete

↖ Bana yimba ti kina

2.4 Yai kidimbu ya ntete Yesu salaka. Na nima Yandi vutukaka na bwala Kapernaumi na mama ti baleki na Yandi ti balonguki na Yandi.

 **Tangila bana baverse yai :**

11 Yai luyantiku ya bidimbu Yesu salaka na Kana ya Galilea. Yandi songaka lukumu na Yandi, ti balonguki na Yandi tulaka ntima na Yandi.

12 Na nima ya mambu yai, Yandi kwendaka na Kapernaumi—Yandi, mama na Yandi, baleki na Yandi, ti balonguki na Yandi, kansi bo bikalaka kuna bilumbu mungi ve.

? Yula bana

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Bantu na fete ya makwela vandaka na mfunu ya vinu ya kunwa. Mpila vandaka ve na kimuntu. Kansi Yesu kele muntu kaka ve. Yandi kele Nzambi kibeni, me kulumuka awa na nsi-ntoto sambu na kugulusa beto. Yandi me gangaka masa na luyantiku. Yandi me sala nti ya vinu mpi. Yandi kaka bakaka masa ti kitulaka yo vinu. Yandi lenda sadisa beto bantu na Yandi na mambu yonso ya beto ke na yo mfunu.

 **Devoir sambu na bakristo :**

Bana bakristo, beno kele na mfunu ya nki? Na mposo yai, lomba Nzambi sambu na mambu ya beno ke na yo mfunu, ti tonda Yandi sambu na mambu ya mbote Yandi me pesa beno dezia.

 **Verse ya Kulonguka :**

...Nzambi lunga sala mambu yonso. Luka 1 :37b

 **Bankunga ya kwenda nzila mosi ti lesò :**

Kieleka Nge Ke Nene
Mazono, Bubu, Mvu ya Mvu

 **Invitatio sambu na bo yina me yamba Yesu ntete ve :**


Kansi bakisa mbote nde, kana nge me yamba Yandi ntete ve, kana nge kele kulanda Yandi ve lumbu na lumbu, nge lenda tula ntima ve nde Yandi ta sadisa nge na konso mambu ya nge ke na yo mfunu.

Nge kele na makambu ti Yandi. Masumu nge me sala, yo me zenga kinduku to kintwadi na kati ya nge ti Nzambi. Nzambi kele na kiese ve na bantu ya masumu.

Yesu Kristo, Mwana-Nzambi, kwisaka sambu na kubaka ndola ya masumu na beto, bantu ya mbi. Yandi bakaka ndola na beto na zulu ya kulunsi. Yandi telamaka na lufwa. Yandi kele na moyo bubuyai. Yo yina, Yandi lenda kuwa bisambu na beto. Yandi lenda gulusa konso muntu ya zola bika nzila ya masumu, ya zola kota nzila na Yandi. Keti nge zaba nde nge me tula Yandi ntima ?

NSUKA YA LESO 2

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.



Bantu vandaka na mfunu ya vinu sambu na makwela. Yo yina, Yesu kitulaka masa yo kuma vinu.



Nzambi
lunga sala
mambu
yonso.

Luka 1:37

Leso 3. Yesu longaka Nikodeme mfunu ya kubutuka ya kimpeve.

Yoane 3 1-21

I. PREPARATIO SAMBU NA MONITEUR-

◎ Kikuma ya Leso :

Muntu na muntu zikisa nde yandi me butuka ya mpa, ti beto tula bantu ya nkaka na bisambu nde bo mpi butuka ya mpa.

♥ Verse ya Kulonguka :

Yesu vutulaka nde : "Mono ke tubila nge mambu ya kieleka : Ata muntu mosi ve lenda mona Kimfumu ya Nzambi kana yandi me butuka diaka mbala ya zole ve." Yoane 3 :3

↖ Bankunga ya kwenda nzila mosi ti lesò :

Bana ya Fioti Yonso
Kana Nge Me Vuluswa

II. REVISIO

↑ Kuyindula diaka baleso me luta :

Yesu me yantika kisalu na Yandi na ntoto ya Galilea. Yai kele nord partie ya Israele. Nzambi pesaka yo na bantu ya Israele, kansi bo kulaka ve bantu ya mbi ya vandaka kuzinga kuna, mutindu Nzambi songaka bo. Yo yina, bantu ya Nzambi vandaka kuzinga kuna na kati ya bantu ya bansi ya nkaka, bantu ya zabaka Nzambi ve.

III. KULONGA LESO YAI

→ Kuyantika :

Yesu vandaka Muntu ya nene, ya mfunu. Me bika ntangu fioti, bantu miiingi ya yantika kulanda Yandi. Kansi ata Yesu longaka bantu mingi, Yandi bakaka ntangu mingi sambu na kusolula ti bantu ya nkaka mosi-mosi. Na kati ya bantu yina vandaka Nikodeme.

❖ Malongi ya nene ya lesò yai (developpement) na banti 4 :

3.1 Nikodeme zabaka Bible mingi. Yandi ntwadisi mosi ya Bayuda. Yandi kwisaka na kusolula ti Yesu na mpimpa sambu yandi bakisaka nde Tata Nzambi me tinda Yesu.

BOOK Tangila bana baverse yai :

Yoane 3 :1 Mufarize mosi vandaka, zina na yandi Nikodeme. Yandi vandaka mosi ya bantwadisi ya Bayuda.

2 Yandi kwisaka na Yesu na mpimpa ti tubilaka Yandi nde : "Longi, beto zaba nde Nge kele Longi ya Nzambi me tinda, sambu ata muntu mosi ve lenda sala bidimbu ya Nge ke sala, kana Nzambi kele na Yandi ve.

? Yula bana

↖ Bana sala bageste to mwa-senete

↖ Bana yimba ti kina

3.2 Yesu songaka Nikodeme nde muntu fweti butuka mbala ya zole sambu na kumona Kimfumu ya Nzambi.

BOOK Tangila bana baverse yai :

3 Yesu vutulaka nde : "Mono ke tubila nge mambu ya kieleka : Ata muntu mosi ve lenda mona Kimfumu ya Nzambi kana yandi me butuka diaka mbala ya zole ve."

? Yula bana

↖ Bana sala bageste to mwa-senete

↖ Bana yimba ti kina

3.3 Nikodeme bakisaka ve, sambu yandi vandaka kuyindula kaka mambu ya kimuntu, kansi Yesu vandaka kutuba mambu ya kimpeve.

BOOK Tangila bana baverse yai :

4 Nikodeme yulaka Yandi nde: "Nki mutindu muntu lenda butuka ntangu ya yandi me yela ? Keti yandi lenda kota mbala ya zole na divumu ya mama ti butuka diaka ?"

5-6 Yesu vutulaka nde : ...Muntu ya me butuka na kimuntu kele kaka muntu. Muntu ya me butuka ya Mpeve ya Nzambi kele ya kimpeve.

7 Yituka ve nde Mono me songa nge: "Nge fweti butuka diaka mbala ya zole."

9 Nikodeme vutulaka mvutu nde : «Nki mutindu ? »

10 Yesu vutulaka nde : "Keti nge kele longi ya Israele, kansi nge zaba mambu yai ve ?

? **Yula bana**

↖ **Bana sala bageste to mwa-senete**

◀ **Bana yimba ti kina**

3.4 Yesu tendulaka nde muntu butuka mbala ya zole ntangu yandi tula ntima na Yandi Yesu Kristo.

📖 Tangila bana baverse yai :

16 ...Nzambi me lutaka kuzola bantu yonso. Yo yina Yandi pesaka bo Mwana mosi kaka yina kele na Yandi, sambu konso muntu yina tula ntima na Yandi, yandi kuvila ve, kansi yandi kuvanda na moyo ya mvula na mvula.

17 Sambu Nzambi tindaka ve Mwana na Yandi awa na nsi-ntoto sambu na kwisa kupesa bantu ndola, kansi sambu na kwisa kugulusa bo.

18 Muntu ya tula Yandi ntima, yandi ta vila ve, kansi muntu ya ndima Yandi ve, yandi me baka ndola na yandi dezia, sambu yandi ndimaka ve Mwana mosi ya Nzambi ke na Yandi.

? **Yula bana**

↖ **Bana sala bageste to mwa-senete**

◀ **Bana yimba ti kina**

>|< Kumanisa Malongi :

Nikodeme vandaka muntu ya zabaka Bible, kansi Yesu tubaka ve nde, nge ta guluka sambu nge zaba Bible. Yandi vandaka ntwadisi na Israele, kansi Yesu tubaka ve nde, nge ta guluka sambu nge kele ntwadisi.

Nikodeme tubaka mambu ya mbote sambu na Yesu. Yandi bakisaka nde Yesu vandaka Longi yina ya Tata Nzambi me tinda. Kansi Yesu tubaka ve nde yandi ta guluka sambu yandi monaka Yesu Longi ya mbote.

Yesu tubaka nde Nikodeme vandaka na mfunu ya kubutuka mbala ya zole, kubutuka ya Mpeve ya Nzambi. Yesu tendulaka nde ntangu muntu tula ntima na Yandi Yesu, yandi butuka mbala ya zole. Yandi butuka ya kimpeve. Yandi ta baka moyo mvu ya mvu. Yandi ta mona ve ndolo ya Nzambi. O kiese !

Kana Nikodeme vandaka na mfunu ya kubutuka mbala ya zole, yai zola tuba nde beto yonso ke na

yo mfunu.

✋ Devoir sambu na bakristo :

Kana nge me ndima Yesu Kristo to tula Yandi ntima na ntima na nge yonso, nge mpi me butuka diaka mbala ya zole. Kiese ! Kansi nki mutindu bampangi na nge? Banduku na nge ? Keti mposo yai nge ta yantika kutula bo na lombilu, sambu bo mpi kwisa kutula ntima na Yesu Kristo ?

♥ Verse ya Kulonguka :

Yesu vutulaka nde : "Mono ke tubila nge mambu ya kieleka : Ata muntu mosi ve lenda mona Kimfumu ya Nzambi kana yandi me butuka diaka mbala ya zole ve." Yoane 3 :3

◀ Bankunga ya kwenda nzila mosi ti lesò :

Bana ya Fioti Yonso

Kana Nge Me Vuluswa

✚ Invitatio sambu na bo yina me yamba Yesu ntete ve :

Kana Yesu kwisaka kusolula ti nge kaka nge mosi, nki Yandi ta tuba na nge ? Keti Yandi ta tuba nde, "Nge kele mwana na Mono ? Nge me tula ntima na Mono » ?

To, keti Yandi ta tuba na nge bonso na Nikodeme, « Nge fweti butuka diaka ? » Yandi zaba kana nge me yamba Yandi to kana nge me yamba Yandi ve.

Mambu mosi beto zaba. Konso muntu yina kwisa na Yesu, Yesu ke yamba yandi. Muntu ya kwisa na Yandi na ntima ya mawa sambu na masumu na yandi, Yesu ta buya yandi ve.


Keti nge zaba nde nge me butuka mbala ya zole ?

NSUKA YA LESO 3

📘 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 3

Ntwadisi mosi zina ya Nikodeme kwisaka na Yesu na mpimpa. Ata Nikodeme vandaka longi ya Bible, Yesu songaka yandi nde yandi vandaka na mfunu ya kubutuka diaka mbala ya zole. "Yai ke salama ntangu muntu tula ntima na Yesu Kristo, Mwana ya Nzambi.



Leso 3

Yesu vutulaka nde :
**"Mono ke tubila nge
mambu ya kieleka :**
**Ata muntu mosi ve
lenda mona Kimfumu
ya Nzambi kana yandi
me butuka diaka
mbala ya zole ve."**

Yoane 3 :3

Leso 4. Yoane fweti kita, Yesu kuma nene.

Yoane 3 :22-36

Leso yai na nkufi : Yoane songaka bantu nde yandi fweti kita na mfunu, kansi Yesu fweti kuma nene.

I. PREPARATIO SAMBU NA MONITEUR-

⦿ Kikuma ya Leso :

Beto sala to tuba ve na mpila ya ke kumisa beto mosi, kansi na mpila ya ke kumisa Yesu Kristo.

♥ Verse ya Kulonguka :

Yandi (Yesu) fweti kuma kuluta nene, kansi mono fweti kuma kuluta fioti. Yoane 3 :30

⦿ Bankunga ya kwenda nzila mosi ti lesò :

Kitoko, Kitoko

Kumisa Zina ya Yesu

II. REVISIO

↑ Kuyindula diaka baleso me luta :

Beto me mona nde Yesu yantikaka kisalu na Yandi na ntoto ya Galilea [*moniteur, songa karte ya Galilea*]. Yandi me Hbinga ndambu ya balonguki, Yandi me sala kimpa na Yandi ya ntete, ti Yandi me solula ti Nikodeme, kusonga yandi nki mutindu kukota na Kimfumu ya Nzambi.

III. KULONGA LESO YAI

➔ Kuyantika :

Ntangu yai, Yesu ti balonguki na Yandi kotaka na ntoto ya Yuda, sika vandaka nzadi Yordani.
[*Moniteur, songa karte ya Yudea ti nzadi Yordani.*]

❖ Malungi ya nene ya lesò yai (developpement) na banti 3 :

4.1 Bantu songaka Yoane nde balonguki ya Yesu vandaka kubotika bantu mingi. Bo banzaka nde Yoane lenda vanda kimpala sambu na Yesu.

❖ Tangila bana baverse yai :

Yoane 3 :22 ...Yesu ti balonguki na Yandi kotaka ntoto ya Yudea. Yandi bikalaka kuna ti bo, ti bo pesaka bantu mbotika.

23 Ntangu yina, Yoane mpi vandaka kupesa

bantu mbotika...

25 Ebuna ndambu ya balonguki ya Yoane yantikaka kunwana na Bayuda na mambu ya bansiku...

26 Ti bo kwisaka na Yoane kusonga yandi nde, "Longi, Yandi yina vandaka ti nge na ntoto kuluta Yordani, Muntu ya nge tubaka kitemwe sambu na Yandi—Atasio ! Yandi ke pesa mbotika, ti bantu yonso ke kwisa na Yandi !

? Yula bana

➤ Bana sala bageste to mwa-senete

⦿ Bana yimba ti kina

4.2 Yoane bambukisaka bo nde katuka luyantiku ya kisalu na yandi, yandi me songa bo nde yandi vandaka Mesia ve, kansi Mesia fweti landa yandi.

❖ Tangila bana baverse yai :

3 :27-28

27 Yoane vutulaka nde: "Muntu lenda baka kima ve kana Nzambi me pesa yandi yo ve.

28 Beno mosi kele bantemwe na mono, nde mono tubaka, 'Mono kele Mesia ve, kansi Nzambi me tinda mono na ntwala na Yandi.'

? Yula bana

➤ Bana sala bageste to mwa-senete

⦿ Bana yimba ti kina

4.3 Yoane tubaka nde Yesu muntu ya kuluta mfunu, bonso bakala ya ke kwela kele mfunu na makwela, kuluta nduku na yandi ya kele ntemwe ya makwela yina.

❖ Tangila bana baverse yai :

3 :29 Bakala ya ke kwela, yandi kele na nkento ya makwela na yandi. Kansi nduku ya kele ntemwe ya makwela yina, yandi kaka telama, kaka kuwa ndinga ya nduku na yandi. Yandi ke na kiese ya mingi sambu na ndinga ya nduku ya ke kwela. Mpidina, kiese na mono.

30 Yandi (Yesu) fweti kuma kuluta nene, kansi mono fweti kuma kuluta fioti.

? Yula bana

➤ Bana sala bageste to mwa-senete

Bana yimba ti kina

4.4 Yoane longaka nde bantu ke guluka kana bo ndima Yesu Kristo, Mwana ya Tata Nzambi me tinda.

Tangila bana baverse yai :

3 :31-32 Yandi yina me katuka na zulu kele na zulu ya bantu yonso...Mambu yina ya Yandi me mona ti ya Yandi me wa, Yandi ke pesa ntemwe na yo....

34-35 Sambu Yandi ya Nzambi me tinda, Yandi ke tuba bandinga ya Nzambi...Tata Nzambi zola Mwana-Nzambi, ti Yandi me pesa Yandi kiyeka yonso.

36 Muntu ya ndima Mwana-Nzambi kele na moyo ya mvula na mvula, kansi yandi yina ndima ve Mwana-Nzambi ta mona moyo ve, kansi makasi ya Nzambi ke bikala na ntu na yandi.

? Yula bana

Bana sala bageste to mwa-senete

Bana yimba ti kina

>|< Kumanisa Malongi :

Yoane zabaka nde kisalu na yandi vandaka ve kusala na mpila nde bantu kumisa yandi mosi. Kisalu na yandi vandaka kusonga bo Yesu Mesia yina landaka yandi. Kisalu ya beto bakristo yonso, yo kele ve nde beto monika bantu ya nene. Kisalu na beto kele kusonga bantu ya nkaka Mvulusi na beto. Beto kumisa Yandi.

Bankunga ya kwenda nzila mosi ti lesò :

Kitoko, Kitoko
Kumisa Zina ya Yesu

Devoir sambu na bakristo :

Bana bakristo, na mposo yai, beto sosa bampila yonso na kumisa zina ya Yesu Kristo. Beto kumisa Yandi na bisambu. Beto kumisa Yandi na bankunga. Beto kumisa Yandi na mpila beto ke tuba.

Verse ya Kulonguka :

Yandi (Yesu) fweti kuma kuluta nene, kansi mono fweti kuma kuluta fioti. Yoane 3 :30

Invitatio sambu na bo yina me yamba Yesu ntete ve :

Na ntwala ya kumisa Yesu Kristo ikele kundima Yandi na ntima na nge. Bambuka mambu ya Yoane tubaka: Bo yina ndima Yandi ta baka moyo mvu ya mvu. Kansi bo yina ndima Yandi ve, bo ta mona moyo ve. Makasi ya Nzambi me bikala konso ntangu kaka na zulu ya ntu na bo.

Mambu ya kieleka kele nde Nzambi kele na makasi na beto yonso sambu beto me zola Yandi ve na mpila nsiku ya ntete me songa beto kusala. Ti beto me sala masumu mingi ya nkaka ya Yandi ke zola ve.

Nzambi tindaka Mwana na Yandi Yesu Kristo kukwisa awa na nsi-ntoto, sambu na kugulusa beto. Yandi monaka mpasi na zulu ya kulunsi sambu beto lenda mona kiese sikamosi ti Yandi mvu ya mvu.


Kana nge me bikala na nzila ya nge mosi, keti nge ta balula ntima bubuyai, ti tula ntima na Yandi ?


NSUKA YA LESO 4

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 4

**Yoane songaka bantu nde yandi fweti kita sambu
Yesu Mesia kuvanda nene.**





Leso 4

Yandi (Yesu)

fweti kuma
kuluta nene,
kansi mono fweti
kuma kuluta
fiofi.

Yoane 3 :30

Leso 5. Yesu songaka nkento ya Samaria nde Yandi Mesia.

Yoane 4 :1-44

I. PREPARATIO SAMBU NA MONITEUR-

◎ Kikuma ya Leso :

Beto bakisa nde Yesu kele Mesia--Mvulusi ya Nzambi silaka ntama. Yo yina, muntu na muntu ta ndima Yandi na ntima yonso, ti beto bakristo ta songa bantu ya nkaka nsangu na Yandi.

♥ Verse ya Kulonguka :

25 Nkento tubilaka Yandi nde: "Mono zaba nde Mesia ta kwisa..."

26 Yesu tubilaka yandi nde, "Mono yina ke solula ti nge, Mono Yandi Mesia." Yoane 4 :25-26

↖ Bankunga ya kwenda nzila mosi ti lesò :

Kana Nge Me Vuluswa
Kitoko, Kitoko

II. REVISIO

↑ Kuyindula diaka baleso me luta :

Yesu vandaka penepene na masa ya Jordani, sika balonguki na Yandi vandaka kubotika bantu yina balulaka ntima. [Moniteur, songa Jordani na karte.] Yoane songaka bantu nde Yesu vandaka nani ? (Mwana-dimeme ya Nzambi, yina ta katula masumu ya bantu)

III. KULONGA LESO YAI

→ Kuyantika :

Na nima, Yandi zolaka yutuka na ntoto ya Galilea. Na kati ya sika Yandi vandaka ti na Galilea, sika Yandi zolaka kwenda, vandaka ntoto ya Samaria [moniteur songa Galilea ti Samaria na karte]. Kansi Bayuda zolaka kutambula kuna ve. Mbala mingi bo vandaka kuluta na nzila ya nkaka kuluta nda, kaka sambu bo kukota ve na kati ya bantu ya Samaria. Bayuda zolaka bo ve. Kansi Yesu monaka mfunu kukwenda na Samaria. Yandi kwendaka kuna na bwala ya nene zina ya Sikari.

❖ Malongi ya nene ya lesò yai (developpement) na banti 4 :

5.1 Yesu kwisaka kupema na nto. Bu nkento ya

Samaria kwisaka pana, Yandi lombaka yandi kupesa yandi masa ya kunwa. Yandi yitukaka sambu Bayuda vandaka kusolula ve ti bantu ya Samaria.

❖ Tangila bana baverse yai :

Yoane 4 :6 7...Yandi vandaka na lweka ya nto...Nkento mosi ya Samaria kwisaka kubenda masa na nto. Yesu lombaka yandi nde, "Pesa Mono masa ya kunwa. »

8 Sambu balonguki na Yandi me basika kukwenda na cité kusumba madia.

9 Ntangu yina, nkento ya Samaria yulaka Yandi nde, "Nki mutindu Nge Muyuda ke lomba masa ya kunwa ya mono, nkento ya Samaria ? »
Sambu Bayuda ke solula ve ti bantu ya Samaria.

? Yula bana

↖ Bana sala bageste to mwa-senete

↖ Bana yimba ti kina

5.2 Yesu songaka nkento nde Yandi zolaka kupesa yandi masa ya moyo. Nkento yina bakisaka ve.

❖ Tangila bana baverse yai :

10 Yesu vutulaka, « Kana nge bakisaka makabu ya Nzambi, ti nani ke lomba nge masa ya kunwa, nge zolaka kulomba Yandi, ebuna Yandi zolaka kupesa nge masa ya moyo.

13 Konso muntu ya kunwa masa ya nto yai, nzala ya masa ya kunwa ta simba yandi diaka,

14 kansi konso muntu ya kunwa ya masa ya Mono ta pesa yandi, yandi ta vanda nzala diaka ve ata fioti. Kansi masa ya Mono ta pesa yandi, yo ta kuma na kati na yandi nto ya masa ya ta pesa moyo ya mvula na mvula.

15 Nkento tubilaka Yandi nde, « Tata, pesa mono masa yai, sambu nzala ya masa kusimba mono diaka ve...»

? Yula bana

↖ Bana sala bageste to mwa-senete

↖ Bana yimba ti kina

5.4 Yesu songaka nkento nde yandi vandaka na

**mfunu ya Mvulusi, ti Yandi mosi vandaka
Mesia-Mvulusi yina.**

Tangila bana baverse yai :

16 Yesu songaka yandi nde, « Kwenda, binga bakala na nge. Beno kwisa yutuka awa. »

17 Nkento yutulaka nde, « Mono kele na bakala ve. » Yesu tubilaka yandi nde, “Nge me tuba mbote, ‘Mono kele na bakala ve, ’

18 sambu nge me vanda na babakala tanu, ti bakala ya kele ti nge sesepiyai, yandi kele bakala na nge ya makwela ve. Na yina nge me tuba mbote.”

19 Nkento tubilaka Yandi nde, “Tata, Mono kuwa na nsi ya ntima bonso Nge kele profete.

25 Nkento tubilaka Yandi nde, “Mono zaba nde Mesia ta kwisa (yina ya bo binga Kristo).
Ntangu Yandi kwisa, Yandi ta tendula beto mambu yonso.”

26 Yesu tubilaka yandi nde, “Mono ya ke solula ti nge, Mono Yandi.”

? Yula bana

Bana sala bageste to mwa-senete

Bana yimba ti kina

5.5 Nkento kwendaka kusonga bantu ya yandi zabaka na bwala. Yandi bingaka bo kukwisa kumona Yesu.

Tangila bana baverse yai :

28 Ntangu yina, nkento...kwendaka kukota na bwala, ebuna yandi songaka babakala nde,

29 “Kwisa, Mona bakala mosi ya me songa mono mambu yonso ya mono me sala. Keti Yandi lenda vanda Mesia ?”

30 Ebuna bo...kwisaka na Yandi.

39 Ebuna bantu ya Samaria mingi ya bwala yina kwilaka na Yandi sambu na ntemwe ya nkento yina, “Yandi songaka mono mambu yonso ya mono me sala.”

40 Ebuna...bantu ya Samaria ...bondilaka Yandi kubikala ti bo. Ti Yandi bikalaka kuna bilumbu zole.

42 Ebuna bo songaka nkento, “Ntangu yai,

beto kwikila....beto bakisa nde Yandi kele kieleka Kristo, Mvulusi...”

43 Na nima ya bilumbu zole, Yandi basikaka ti kwendaka na Galilea.

Bana Yimba: Nkunga ‘Kana Nge Me Vuluswa, Tubila Bampangi’

>< Kumanisa Malongi :

Yesu kwendaka na Samaria sambu Yandi zabaka nde kuna, nkento mosi vandaka na mfunu na Yandi. Ntangu nkento yina bakisaka nde Yesu kele Mesia, yandi kwendaka nswalu kusonga bantu ya yandi zabaka na kati ya bwala. Bo kwisaka. ti bo mpi kwikilaka Yandi. Mbote beto mpi songa bampangi na beto nki Yesu me sala sambu na beto.

Devoir sambu na bakristo :

Bana bakristo, devoir mono ke pesa beno, yo yai: Na mposo ke kwisa, lomba nde Nzambi pesa nge ntangu ya mbote kusonga mpangi to nduku mosi nki mutindu Yesu me gulusa nge. Mbala ya nkaka bo ta landa Yandi, mpi !

Verse ya Kulonguka :

Nkento tubilaka Yandi nde: “Mono zaba nde Mesia ta kwisa...” Yesu tubilaka yandi nde, “Mono yina ke solula ti nge, Mono Yandi Mesia.” Yoane 4 :25-26

Bankunga ya kwenda nzila mosi ti lesò :

Kana Nge Me Vuluswa
Kitoko, Kitoko

Invitatio sambu na bo yina me yamba Yesu ntete ve :

Kansi, kana nge me yamba Yesu ntete ve nge mosi, nge ta vanda ve na mpila kusonga bantu ya nkaka nki Yandi me sala na luzingu na nge.

Keti nge me bakisa nde Yesu kele Mvulusi ya Nzambi me silaka kuta ntama ? Keti nge me bakisa nde nge kele na mfunu na Yandi sambu nge me sala mbi mingi na meso na Yandi ? Keti nge ta yamba Yandi bubu bonso Mvulusi na nge ?

NSUKA YA LESO 5

Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 5




Bu nkento ya Samaria
bakisaka nde Yesu
vandaka Mesia-
Mvulusi, yandi
kwendaka nswalu
kusonga bantu ya
nkaka nsangu yina.
Bo kwisaka na Yesu,
ti bo mpi kwikilaka
Yandi.

Leso 5

**Nkento tubilaka Yandi nde :
“Mono zaba nde Mesia ta
kwisa...”**

**Yesu tubilaka yandi nde,
“Mono yina ke solula ti
nge,**



**Mono
Yandi
Mesia.”**

Yoane 4 :25-26

Leso 6. Yesu samunaka na Galilea ti Yandi belulaka mwana na distance.

Marko 1 :14-15, Yoane 4 :45-54

I. PREPARATIO SAMBU NA MONITEUR-

◎ Kikuma ya Leso :

Beto bakisa nde ngolo ya Yesu kele na limite ve, nsuka ve. Yo yina, beto sosa Yandi ntete na bampasi na beto yonso.

♥ Verse ya Kulonguka :

Yesu songaka yandi nde : "Kwenda ka nge. Mwana na nge kele na moyo." Ebuna, yandi kwikilaka ndinga ya Yesu tubaka na yandi, ti yandi kwendaka ka yandi. Yoane 4 :50

♣ Bankunga ya kwenda nzila mosi ti lesò :

Bu Yesu Kele na Mono
Mazono, Bubu, Mvu ya Mvu

II. REVISIO

↑ Kuyindula diaka baleso me luta :

Yesu me baka ntangu kusolula ti muntu mosi, muntu yina ya Bayuda zolaka ve, kansi muntu ya vandaka mfunu na meso ya Nzambi. Yandi songaka nkento mosi nde Yandi Mesia. Nkento yina songaka bantu ya nkaka. Mpidina, bantu mingi na bwala Sikari me kwikila na Yesu.

III. KULONGA LESO YAI

→ Kuyantika :

Na nima ya kisalu na Yandi na ntoto ya Samaria, Yandi yutukaka na Galilea, sika Yandi vandaka kuzinga.

❖ Malungi ya nene ya lesò yai (developpement) na banti 4 :

6.1 Yesu yutukaka na ntoto ya Galilea, ti Yandi samunaka nde bantu balula ntima ti ndima Nsangu ya Mbote.

❖ Tangila bana baverse yai :

Marko 1 :14 ... Yesu kwendaka na ntoto ya Galilea. Yandi vandaka kwenda kulonga Nsangu ya Mbote ya Nzambi nde :"Ntangu me lunga. Kimfumu ya Nzambi me kuma penepene. Beno balula ntima. Beno ndima

Nsangu ya Mbote.

? Yula bana

↗ Bana sala bageste to mwa-senete

↖ Bana yimba ti kina

6.2 Mbuta mosi ya leta sosaka nde Yesu kwisa belula mwana na yandi na bwala ya nkaka.

❖ Tangila bana baverse yai :

Yoane 4 :45 Ebuna ntangu Yandi kumaka na Galilea, bantu kuna yambaka Yandi...

46 ... Kuna vandaka mbuta mosi ya leta. Mwana na yandi ya bakala vandaka na maladi na bwala Kapernaumi.

47 Ntangu yandi waka nde Yesu me bika Yudea, me kuma na Galilea, yandi kwendaka na Yandi. Yandi bondilaka Yesu kukwisa kubelula mwana na yandi, sambu yandi zolaka kufwa.

49 Mbuta ya leta lombaka Yandi nde, « Tata, kwisa nswalu na ntwala mwana na mono kufwa! »

? Yula bana

↗ Bana sala bageste to mwa-senete

↖ Bana yimba ti kina

6.3 Yesu songaka yandi nde mwana me beluka.

❖ Tangila bana baverse yai :

50 Yesu songaka yandi nde: "Kwenda ka nge. Mwana na nge kele na moyo." Ebuna, yandi kwikilaka ndinga ya Yesu tubakilaka yandi, ti yandi kwendaka ka yandi.

? Yula bana

↗ Bana sala bageste to mwa-senete

↖ Bana yimba ti kina

6.4 Bu tata yina yutukaka na bwala, yandi monaka nde mwana me beluka katuka na ntangu Yesu tubaka ndinga. Yo yina, yandi ti fami ya mvimba kwikilaka na Yesu.

❖ Tangila bana baverse yai :

51 Ebuna, bu yandi vandaka na nzila, basielo na yandi kwisaka kukuta yandi. Bo songaka yandi nde "Mwana na nge kele kuzinga !"

52 Ebuna yandi yulaka bo nki lere yandi
yantikaka kubeluka. Bo vutulaka nde,
“Mazono na 13h, fievre na yandi manaka. »

53 Yo yina, yandi zabaka nde yo vandaka kaka
lere ya Yesu songaka yandi nde, « Mwana na
kele kele na moyo. » Yo yina yandi kwikilaka,
ti fami na yandi ya mvimba.

? **Yula bana**

Bana sala bageste to mwa-senete

Bana yimba ti kina

>|< **Kumanisa Malongi :**

Yesu vandaka ve na mfunu ya kuvanda sika mosi ti
muntu ya malade sambu na kubelula yandi. Yandi
vandaka ve na mfunu ya kutula muntu diboko to
kusimba yandi. Yesus kele na ngolo yonso. Yo
yina, ata na distance, Yandi vandaka ngolo kubelula
bantu, ata bo yina vandaka maladi mingi, bo yina
zolaka kufwa.

Yesu kele kiteso mosi bubuyai. Yandi kele na
ngolo yonso mazono, bubu, ti mvu ya mvu. Konso
ntangu ya beto kele na mpasi, beto kwenda ntete na
Yandi, beto sosa lusadisu na Yandi.

Yimba Nkunga :

Mazono, Bubu, Mvu ya Mvu

Devoir sambu na bakristo :

Beno bana bakristo, beno ya me tula ntima dezia na
Yesu, devoir mono ke pesa beno mposo yai, yo yai:
Na konso mpasi nge kele na yo, sosa lusadisu ya
Yesu Kristo. Tula ntima na Yandi, sambu Yandi
kele ngolo na kusadisa.

Verse ya Kulonguka :

Yesu songaka yandi nde : “Kwenda ka nge. Mwana
na nge kele na moyo.” Ebuna, yandi kwikilaka
ndinga ya Yesu tubaka na yandi, ti yandi kwendaka
ka yandi. Yoane 4 :50

Invitatio sambu na bo yina me yamba Yesu ntete ve :

Mpasi ya kuluta nene ya beto ke na yo kele mpasi
ya masumu. Beto me zenga kintwadi na beto ti
Nzambi sambu beto me sala mbi na meso na Yandi.
Beto me lemfuka ve na bansiku na Yandi. Beto
kele na mpimpa ti na lufwa.

Kansi Nzambi zola beto mingi. Yo yina, Yandi
tindaka Mwana na Yandi ya luzolo Yesu Kristo
sambu Yandi baka masumu yonso na beto. Yandi
futaka mfuka, Yandi bakaka ndola ya Nzambi
zolaka kupesa beto sambu na masumu beto me sala.

Na nima Yesu pesaka menga ti moyo na Yandi
sambu na beto, Nzambi songaka nde Yandi me
ndima yonso ya Yandi me sala. Nzambi tedimisaka
Yandi na lufwa !


Yesu samunaka nde bantu balula ntima ti kwikila
nsangu ya mbote. Kiteso mosi, nge ke na mfunu
kubalula ntima ti kukwikila Yesu Kristo sambu nge
kota na fami ya Nzambi.

Kana nge me balula ntima ntete ve, Yesu zola
yamba nge bubuyai, kana nge ta kwenda na Yandi
na lombili ti ndima Yandi na ntima na nge yonso.

NSUKA YA LESO 6

 Kana ntangu lunga, longa ndambu mikanda ya
Bible. Bangindu kele na nsuka ya mukanda yai.

Leso 6



Yesu belulaka
mwana ya
mbuta ya leta,
ata na distance.
Ngolo ya Yesu
kele na limite
ve.

Leso 6

Yesu songaka yandi nde :
“Kwenda ka nge. Mwana
na nge kele na moyo.”
Ebuna, yandi kwikilaka
ndinga ya Yesu tubaka na
yandi, ti yandi kwendaka
ka yandi. *Yoane 4 :50*

Leso 7. Yesu longaka na nzo-Nzambi nde Yandi kele Mesia.

Luka 4 :16-21

I. PREPARATIO SAMBU NA MONITEUR-

Kuyidika na ntwala : Baka papier ti sala yo rouleau. Yai kele mpila Bayuda vandaka kukanga mikanda na bo mosi-mosi.

◎ Kikuma ya Leso :

Yesu me tuba pwelele nde Yandi Mesia-Mvulusi ya Nzambi silaka ntama. Muntu na muntu zenga kana yandi ta ndima Yesu to buya Yandi.

♥ Verse ya Kulonguka :

...bampangi na Yandi yambaka Yandi ve. Kansi bantu ya nkaka yambaka Yandi. Bo ndimaka Yandi mpi na ntima na bo. Ebuna Yandi pesaka bo kiyeka na kikituka bana ya Nzambi, bantu ya butamaka ...ya Nzambi. Yoane 1 :11-13

♣ Bankunga ya kwenda nzila mosi ti leso :

Kana Nge Zaba Nge Me Vuluswa
Kielo Kaka Mosi

II. REVISIO

↑ Kuyindula diaka baleso me luta :

Na mposo me luta, beto monaka ngolo ya Yesu kubelula bantu, ata na distance. Yandi vandaka ngolo kusala yo ata na ndinga na Yandi. Beto me mona mpi nde ata Yesu vandaka kaka na luyantiku ya kisalu na Yandi, Yandi me songa dezia nde Yandi kele Mesia. Yandi me songa yo na nani? (Na nkento ya Samaria)

III. KULONGA LESO YAI

→ Kuyantika :

Bubuyai, beto ta mona mpila Yesu songaka kaka muntu mosi ve, kansi bantu mingi nde Yandi Mesia. Nkento ya Samaria kwikilaka ti songaka bantu ya nkaka mpi. Nki ta vanda reaksio ya bantu mbala yai ?

⇒ Malungi ya nene ya leso yai (developpement) na banti 4 :

7.1 Yesu longaka na banzo-Nzambi na babwala mingi ya Galilea, ti bantu mingi kumisaka Nzambi sambu na malungi na Yandi.

BOOK Tangila bana baverse yai :

Luka 4 :14 Ntangu yina, Yesu vutukaka na Galilea na ngolo ya Mpeve ya Nzambi. Ebuna nsangu na Yandi tambulaka na rayon yina yonso.

15 Ti Yandi longaka na banzo ya bisambu ya Bayuda, ti bantu yonso kumisaka Yandi.

? Yula bana

↗ Bana sala bageste to mwa-senete

↖ Bana yimba ti kina

7.2 Yesu kwendaka na bwala na Yandi Nazareti. Yandi kwenda na nzo-Nzambi bonso kikalulu na Yandi.

BOOK Tangila bana baverse yai :

16 Ebuna Yandi kwisaka na bwala Nazareti, sika Yandi me yela na kileki na Yandi. Kuna, Yandi kwendaka kusamba na nzo-Nzambi na kilumbu ya bisambu, bonso vandaka kikalulu na Yandi. Ebuna Yandi telamaka sambu na kutanga.

? Yula bana

↗ Bana sala bageste to mwa-senete

↖ Bana yimba ti kina

7.3 Yandi tangaka ndambu ya mukanda ya Profete Yezaya ya vandaka kusonga kukwisa ya Mesia. Yandi songaka bo nde Nzambi me lungisa yo na Yandi.

BOOK Tangila bana baverse yai :

17 Ebuna bo pesaka Yandi mukanda ya profete Yezaya...Yandi monaka sika ya vandaka kusonika mutindu yai :

18 Mpeve ya Nzambi kele na zulu na Mono, Sambu Yandi me solaka Mono
Kusamuna nsangu ya mbote na bansukami.
Yandi me tinda Mono kubelula bantu ya ntima ya mawa,
Kusonga bampika mutindu bo lenda katuka na kimpika na bo,
Ti bantu ya kufwa-meso nde bo yantika kumona,
Kusonga bantu ya kele na kizitu na ntima mpila bo lenda katuka na kizitu yina,

19 Kusonga nde ntangu ya Nzambi me tula, yo me lunga.”

20 Na nima....Meso ya bantu yonso na kati ya nzo-Nzambi vandaka kutala Yandi ngolo.

21 Ti Yandi yantikaka kulonga bo nde, «Bubu yai, Nzambi me lungisa baverse yai, ti beno me wa yo. »

? Yula bana

☒ Bana sala bageste to mwa-senete

☛ Bana yimba ti kina

7.4 Bantu ndimaka ve, yo yina bomekaka kufwa Yesu. Kansi Yandi lutaka kaka na kati-kati na bo.

☒ Tangila bana baverse yai :

28 Ntangu bantu na nzo-Nzambi waka mambu yai, bo fulukaka na makasi,

29 ebuna bo telamaka ti pusaka Yandi sambu na kukatula Yandi na bwala. Bo twadisaka Yandi tii na nsongi ya ngumba... Bo zolaka kusimba Yandi, kulosa Yandi na dibengi.

30 Kansi Yesu lutaka na kati-kati na bo, ebuna Yandi kwendaka ka Yandi.

? Yula bana

☒ Bana sala bageste to mwa-senete

☛ Bana yimba ti kina

>|< Kumanisa Malongi :

Bantu mingi yambaka Yesu, kansi bantu ya bwala na Yandi, bo ndimaka Yandi ve. Bo zolaka kufwa Yandi, sambu Yandi songaka bo nde Yandi vandaka Mesia ya Nzambi me sila.

Bubuyai mpi, muntu na muntu fweti zenga kana yandi ta ndima Yesu to buya Yandi.

☛ Devoir sambu na bakristo :

Bana bakristo, beno ya me zenga nde beno ta ndima Yesu, keti beno me solula ti banduku na nge, kusonga bo nde bo fweti zenga mambu yina mpi ?

♥ Verse ya Kulonguka :

...bampangi na Yandi yambaka Yandi ve. Kansi bantu ya nkaka yambaka Yandi. Bo ndimaka Yandi

mpi na ntima na bo. Ebuna Yandi pesaka bo kiyeka na kukituka bana ya Nzambi, bantu ya butamaka ...ya Nzambi. Yoane 1 11-13

☛ Bankunga ya kwenda nzila mosi ti lesò :

Kana Nge Zaba Nge Me Vuluswa
Kiello Kaka Mosi

✚ Invitatio sambu na bo yina me yamba Yesu ntete ve :

Bana, mono ke lomba Nzambi nde beno vanda ve bonso bantu ya Nazareti yina buyaka Yesu. Yesu songaka bo nde Yandi vandaka Mesia. Yandi songaka bo nde Yandi me lungisa mambu yonso ya baprefete tubaka sambu na Mesia. Kansi bo kwikilaka Yandi ve.


O, yo kele mambu ya mawa kubuya Yesu Kristo ! Mpila ya nkaka ikele ve nde beto kuma mbote na meso ya Nzambi. Kaka Yandi.

Kansi, kana beto sala kima ve, kana beto zenga kima ve, yo kele kiteso mosi bonso kubuya Yandi. Beto kele dezia na nzila ya masumu, ya mbi, ya lufwa. Yo lomba nde beto balula ntima. O, kana nge me yamba Yandi ntete ve, bika nzila ya nge mosi, zenga kukota na nzila ya Yesu Kristo bubu. Moyo yai ya mpa ya Nzambi zola pesa nge, yo yantika na ntangu nge tuba na ntima na nge yonso: “E, mono kwikila Nge Yesu kele Mesia. Mvulusi. E, mono ndima nde mono kele na mfunu ya Nge kugulusa mono. »

Kana nge me ndima Yandi ntete ve, ntangu ya mbote, yo yai.

NSUKA YA LESO 7

☞ Kana ntangu lunga, longa ndambu mikanda ya Bible. Bangindu kele na nsuka ya mukanda yai.



...bampangi na Yandi yambaka
Yandi ve. *Kansi* bantu ya nkaka
yambaka Yandi. Bo ndimaka
Yandi mpi na ntima na bo.
Ebuna Yandi pesaka bo kiyeka na
kukituka bana ya Nzambi, bantu
ya butamaka...ya Nzambi.

Yoane 1 :11-13

Leso 8. Yesu bingaka balonguki iya kuloba bantu.

Luka 5 :1-11

Leso na Nkufi : Yesu bingaka balonguki iya sambu na kubika kisalu na bo ya kuloba bambisi ya masa, Yandi longa bo kuloba bantu (Piere, Andre, Yakobo, Yoane).

I. PREPARATIO SAMBU NA MONITEUR-

◎ Kikuma ya Leso :

Beto zabisa bantu ya nkaka nsangu ya Yesu ti lomba bo kulanda Yandi. Beto loba bantu.

♥ Verse ya Kulonguka :

Ebuna Yesu tubilaka bo nde : “Beno kwisa landa Mono. Mono ta kitula beno balobi ya bantu. » Matayo 4:19

♣ Bankunga ya kwenda nzila mosi ti lesò :

Balobi ya Bantu
Balonguki Kumi na Zole

II. REVISIO

↑ Kuyindula diaka baleso me luta :

Na mposo me luta, beto monaka nde Yesu longaka na nzo-Nzambi ya Bayuda. Yandi tangaka ndambu ya mukanda ya Yezaya, mosi ya mikanda ya Kuwakana ya Ntama. Yo vandaka kutuba sambu na kisalu ya Mesia ya Nzambi me sila kutindila bo. Yesu songaka bo nde Yandi vandaka kulungisa profesi yina. Yandi mosi vandaka Mesia. Kansi na kati ya bwala na Yandi, bo ndimaka Yandi ve. Bo zolaka kufwa Yandi, kansi Nzambi lundaka Yandi. Yo yina, bo monaka mpila ve kusala yo.

III. KULONGA LESO YAI

➔ Kuyantika :

Na lesò ya ntete, beto me mona nde dezia Yesu me yantika kubinga balonguki na Yandi. Yandi me binga dezia Andre ti Simoni Piere, Filipo ti Natanaele. Bo me yantika kulanda Yandi, kansi bo me landa mpi kusala kisalu na bo—kuloba bambisi ya masa. Yai kele kisalu ya mbote, kansi ntangu yai, Yesu zolaka bo kubika kisalu yina, kuyantika kutambula ti Yandi. Yandi vandaka na kisalu kuluta mfunu sambu na bo.

❖ Malongi ya nene ya lesò yai (developpement) na banti 3 :

8.1 Yesu vandaka kulonga bantu mingi-mingu penepene na Dizanga ya Galilea. Bantu vandaka kuziunga ti kukangisa Yandi. Yo yina, Yandi kotaka na bwatu ya Simoni. Bo bendaka yo ndambu na kati ya masa, ebuna Yandi vandaka kulonga kuna.

❖ Tangila bana baverse yai :

Luka 5 :1 Bantu mingi-mingi vandaka kuziunga ti kukangisa Yesu sambu na kuwa ndinga ya Nzambi bu Yandi vandaka kutelama penepene na Dizanga ya Galilea...

2 Ebuna Yandi monaka babwatu zole me telama na lweka ya masa, kansi balobi ya bambisi me basika na yo sambu na kuyobisa babukondi na bo.

3 Ntangu yina, Yandi kotaka bwatu mosi na yo, bwatu ya Simoni, ti Yandi lombaka yandi kubenda bwatu ndambu na kati ya masa. Ebuna Yandi vandaka na kati, ti Yandi longaka bantu mingi-mingi yina na kati ya bwatu.

? Yula bana

↗ Bana sala bageste to mwa-senete

↖ Bana yimba ti kina

8.2 Yandi songaka bo kuloba diaka. Ata bo me sala mpimpa ya mvimba kukonda kukanga mbisi, bo lemfukaka, ebuna bo kangaka bambisi mingi-mingi, na mpila nde bo zolaka kudindisa babwatu zole.

❖ Tangila bana baverse yai :

4 Bu Yandi manisaka kutuba, Yandi songaka Simoni nde, «Nata bwatu na sika ya masa kele ndindu, ti kulumusa babukondi na beno sambu beno kanga bambisi ya masa. »

5 Kansi Simoni vutulaka Yandi mvutu nde : « Longi, beto me sala mpimpa ya mvimba, ti beto me kanga kima ve. Kansi ata mpila yina, sambu Nge me songa beto kusala yo, mono ta kulumusa bukondi. »

6 Ebuna ntangu bo me sala mpidina, bo kangaka mambisi ya masa mingi-mingi...

7 Yo yina, bo salaka kidimbu na bantu ya vandaka kusadisa bo...nde bo kwisa kusadisa bo. Ebuna...bo fulusaka babwatu yonso zole na bambisi...

8 Ntangu Simoni Pierre monaka yo, yandi kudilosaka na mabolongo ya Yesu, kutuba nde : « Katuka na mono, sambu mono kele nkwa-masumu, O Mfumu ! »

9 Sambu ...bo yonso vandaka kuyituka na bambisi ya masa ya bo me kanga,

? **Yula bana**

Bana sala bageste to mwa-senete

Bana yimba ti kina

8.3 Yesu songaka bo kulanda Yandi, Yandi kitula bo balobi ya bantu. Yandi bingaka mpi Yokobo ti Yoane, yina vandaka kusala sikamosi ti Simoni Pierre.

Tangila bana baverse yai :

10 Kiteso mosi na Yakobo ti Yoane, bana ya Zebedeo, yina vandaka kusala sikamosi ti Simoni. Ebuna Yesu tubaka na Simoni : « Kuwa boma ve. Yantika ntangu yai tii kuna, beno ta loba bantu. »

11 Yo yina, ntangu bo me nata babwatu na bo na ntoto, bo bikisaka yonso, ti bo landaka Yandi.

? **Yula bana**

Bana sala bageste to mwa-senete

Bana yimba ti kina

>|< **Kumanisa Malongi :**

Balonguki ya Yesu bakisaka kisalu ya kuloba bambisi ya masa. Yesu songaka bo nde Yandi vandaka na ngolo ata na zulu ya mambu yina. Na nima, Yandi bingaka bo kubika kisalu yina sambu bo kwisa kutambula na Yandi na kisalu na Yandi. Yandi ta kitula bo balobi ya bantu.

Beto ke loba bantu ntangu beto songa bo nsangu ya Yesu, beto lomba bo kutula ntima na Yandi. Kisalu na beto, kusonga bantu. Kisalu ya Nzambi, kubenda bo sambu bo kwikila.

Bana yimba nkunga :

Balobi ya Bantu

Devoir sambu na bakristo :

Kana nge me ndima Yesu Kristo, Yesu kele na kisalu sambu na nge. Yandi zola nge kusonga bantu ya nkaka nki Yandi me sala sambu na nge. Kana nge kele kwikama kusonga bantu nsangu na Yandi, Yandi ta vanda kwikama kubenda bantu mingi, bo kwisa na Yandi, bo mpi baka moyo ya mvu ya mvu.

Verse ya Kulonguka :

Ebuna Yesu tubilaka bo nde : “Beno kwisa landa Mono. Mono ta kitula beno balobi ya bantu. » Matayo 4:19

Bankunga ya kwenda nzila mosi ti lesò :

Balobi ya Bantu

Balonguki Kumi na Zole

Invitatio sambu na bo yina me yamba Yesu ntete ve :


Nge lenda loba bantu ve kana nge mosi me yamba Yesu ntete ve. Nge fweti ntete kuma mulonguki na Yandi. Beto yonso me butuka bantu ya masumu. Beto fweti zenga kubika masumu yina, kutula ntima na Yesu Kristo. Beto ke na mfunu kundima nde Yandi lunga katula masumu yonso ya beto. Yandi fwaka na zulu ya kulunsi sambu na kugulusa beto, ti Yandi telemaka na lufwa. Kana nge ta ndima nde, “Ee, Yandi fwaka sambu na mono, ti mono zola landa Yandi, » Nzambi lenda gulusa nge bubuyai.

NSUKA YA LESO 8

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 8

**Yesu sadisaka bantu kuloba
bambisi mingi, ebuna Yandi
lombaka bo kulanda Yandi.
Yandi kitula bo balobi ya
bantu.**



Leso 8

**Ebuna Yesu
tubilaka bo nde :
“Beno kwisa
landa Mono.
Mono ta kitula
beno balobi ya
bantu. »**

Matayo 4:19

Leso 9. Yesu katulaka mpeve ya mbi, ti bantu yitukaka na kiyeka na Yandi.

Luka 4 :31-37

I. PREPARATIO SAMBU NA MONITEUR-

◎ Kikuma ya Leso :

Beto bikisa bampeve ya mbi kusala na kati na beto ve, sambu Yesu kele na kiyeka yonso, ti Yandi kele na kiyeka na zulu na bo.

♥ Verse ya Kulonguka :

Ebuna bo yonso vandaka kuyituka, ti bo tubanaka bo na bo nde : « Nki mutindu ndinga yai ! Sambu, na kiyeka Yandi ke songa bampeve ya mvindu nki kusala, ti bo basika. » Luka 4 :36

↖ Bankunga ya kwenda nzila mosi ti lesò :

Banzambi ya Nkaka
Kana Satana Kwisa

II. REVISIO

↑ Kuyindula diaka baleso me luta :

Na mposo me luta, beto monaka nde Yesu kele na kiyeka na zulu ya bambisi. Balonguki vandaka ya kuloba mpimpa ya mvimba kukonda kukanga ata mbisi ya masa mosi. Kansi na ndinga ya Yesu, bo fulusaka babwatu zole na bambisi ! O, ngolo ya Yesu Kristo !

III. KULONGA LESO YAI

→ Kuyantika :

Bubuyai, beto zola kumona kiyeka ya Yesu ya mutindu ya nkaka.

🕸 Malongi ya nene ya lesò yai (developpement) na banti 4 :

9.1 Yesu vandaka kulonga na kiyeka na nzo-Nzambi na kilumbu ya kupema.

📖 Tangila bana baverse yai :

Luka 4 :31 Na nima, Yandi kwendaka na Kapernaumi...ya ntoto ya Galilea, ti Yandi longaka bo konso kilumbu ya kupema.

32 Ti bo vandaka kuyituka na malongi na Yandi, sambu ndinga na Yandi vandaka ti kiyeka.

? Yula bana

↗ Bana sala bageste to mwa-senete

↖ Bana yimba ti kina

9.2 Bakala mosi kuna vandaka na mpeve ya mbi yina vandaka kuboka na ntangu ya bisambu.

📖 Tangila bana baverse yai :

33-34 Na kati ya nzo ya bisambu...vandaka bakala mosi ya vandaka na mpeve ya... mvindu. Ti yandi dilaka na ndinga ya ngolo nde : « Bikisa beto, beto mosi ! Beto kele na nki mambu ti Nge, Yesu ya Nazareti ? Keti Nge me kwisa sambu na kumanisa beto ? Mono zaba Nge kele nani-Nkwa Santu ya Nzambi ! »

? Yula bana

↗ Bana sala bageste to mwa-senete

↖ Bana yimba ti kina

9.3 Yesu songaka mpeve yina kubasika, ti yo lemfukaka.

📖 Tangila bana baverse yai :

35 Kansi Yesu nganinaka yandi, nde : “Kanga munoko, ti basika na yandi ! » Yo yina, na nima mpeve ya mbi me losa yandi na kati na bo, yo basikaka na yandi, ti yo pesaka yandi mpasi ve.

? Yula bana

↗ Bana sala bageste to mwa-senete

↖ Bana yimba ti kina

9.4 Bantu vandaka kuyituka ti kumwanga nsangu ya Yesu.

📖 Tangila bana baverse yai :

36 Ebuna bo yonso vandaka kuyituka, ti bo tubanaka bo na bo nde : « Nki mutindu ndinga yai ! Sambu, na kiyeka Yandi ke songa bampeve ya mvindu nki kusala, ti bo basika. »

37 Ebuna nsangu yai sambu na Yandi, yo mwanganaka na konso sika na rayon yina yonso.

? Yula bana

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Yesu kele Mwana-Nzambi. Yo yina, Yandi kele na kiyeka yonso na zulu ya bima yonso Yandi me sala. Yandi salaka bambisi ya masa, ti Yandi kele na kiyeka na zulu na bo. Yandi gangaka bampeve yonso kuvanda bawanzio ya mbote kusamba Yandi.

Kansi bawanzio ya nkaka zolaka ve kusamba Yandi. Bo me kuma bampeve ya mbi. Kansi beto wila bo boma ve. Yesu kele na kiyeka na zulu na bo. Bo fweti lemfuka na Yandi.

Beto bakristo fweti pesa bampeve ya mbi nzila ve kusala kisalu na bo na kati na beto. Beto kele na kiyeka ya Yesu Kristo. Beto buya bo ti beto songa bo kubasika na kati na beto na zina na Yandi.

Beto zitisa, beto kumisa kaka Yesu Kristo.

 **Devoir sambu na bakristo :**

Na mposo yai, konso ntangu mpeve ya mbi meka kuyangisa nge, songa yo kubasika na nge na kiyeka ya Yesu Kristo. Lomba lusadisu ya Nzambi, ti nge ta nunga bampeve ya mbi yina. Yesu kele ngolo mingi kuluta bo.

 **Verse ya Kulonguka :**

Ebuna bo yonso vandaka kuyituka, ti bo tubanaka bo na bo nde : « Nki mutindu ndinga yai ! Sambu, na kiyeka Yandi ke songa bampeve ya mvindu nki kusala, ti bo basika. » Luka 4 :36

 **Bankunga ya kwenda nzila mosi ti lesò :**

Banzambi ya Nkaka
Kana Satana Kwisa

 **Invitatio sambu na bo yina me yamba Yesu ntete ve :**

Kansi, kana nge me balula ntima, kana nge me ndima Yesu Kristo ntete ve, zaba nde nge me bikala kaka na kati ya kimfumu ya Satana. Beto yonso me kota moyo yai na ntima ya zola kukwenda nswalu na masumu. Beto zola kusala mambu mingi ya Nzambi ke zola ve. Beto kele na mfunu ya ntima ya mpa.

Yesu ta pesa beto ntima ya mpa bu beto balula ntima na Yandi. Yand ta pesa beto ntima ya zola kulemfuka na Yandi. Yandi fwaka, ti Yandi telamaka na lufwa sambu na kufuta mfuka ya masumu na beto yonso. Keti nge zaba nde nge me tula Yandi ntima, nge me kuma muntu ya mpa na kati na Yandi ?

NSUKA YA LESO 9

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 9

**Bampeve ya mbi lemfukaka
na Yesu. Yandi kele na
kiyeka na zulu na bo.**



Leso 9

**Ebuna bo yonso vandaka
kuyituka, ti bo tubanaka bo na bo
nde :**

**« Nki mutindu ndinga yai !
Sambu, na kiyeka Yandi ke songa
bampeve ya mvindu nki kusala, ti
bo basika. »**

Luka 4 :36

Leso 10. Yesu pusaka na ntwala na kusamuna na babwala ya nkaka

Matayo 3 :23-25, Marko 1:29-39, Luka 4 :38-44

Leso yai na nkufi : Yesu belulaka bamalade mingi—bukilo ya nkento ya Simoni, bantu mingi na Kapernaumi, bafoule ya bantu me katuka na bisika mingi. Kansi Yandi pusanaka na ntwala mpi sambu na kusamuna na babwala ya nkaka.

I. PREPARATIO SAMBU NA MONITEUR-

◎ Kikuma ya Leso :

Beto pusa na ntwala kulonga nsangu ya Yesu na konso sika ya Nzambi ta kangula beto nzila.

♥ Verse ya Kulonguka :

...Yandi tubaka na bo nde, « Ntete Mono fweti samuna Kimfumu ya Nzambi na babwala ya nkaka, sambu yai kele raiso ya Nzambi tindaka Mono. »
Luka 4 :43

♣ Bankunga ya kwenda nzila mosi ti lesò :

Kana Nge Me Vuluswa, Tubila Bampangi
Kwenda Nord, Kwenda Sud

II. REVISIO

↑ Kuyindula diaka baleso me luta :

Beto me mona nde, na nima Yesu basisaka mpeve ya mbi na muntu na kati ya nzo-Nzambi, bantu yantikaka kumwanga nsangu na Yandi na bisika mingi.

III. KULONGA LESO YAI

➔ Kuyantika :

Yesu vandaka na kiese nde bantu kusonga nsangu na Yandi na bisika yonso. Yo kele normal. Kana bantu mingi penepene na nge kele na maladi ya zola kufwa bo, ti kana bo pesa nge cure ya kele sure sambu na yo, keti nge ta kwenda ve kusonga bampangi ? Yesu mpi zolaka kukangama ve na sika mosi, kansi kupusa na ntwala. Bantu na babwala yonso vandaka na mfunu ya malongi na Yandi !

❖ Malongi ya nene ya lesò yai (developpement) na banti 4 :

10.1 Yesu kutaka bukilo ya Simoni ti fievre ya ngolo, ebuna Yandi belulaka yandi.

BOOK Tangila bana baverse yai :

Luka 4 :38 Ebuna Yandi basisaka na nzo-Nzambi ti kotaka nzo ya Simoni. Kansi bukilo ya nkento ya Simoni vandaka na maladi ya fievre ya ngolo, ti bo lombaka Yandi kusadisa yandi.

39 Yo yina, Yandi telamaka na lweka na yandi, ti Yandi songaka fievre yina kukatuka na yandi, ebuna yo katukaka. Nswalu, yandi telamaka ti sadilaka bo.

? Yula bana

✗ Bana sala bageste to mwa-senete

✳ Bana yimba ti kina

10.2 Bo vandaka kunata bamalade mingi na Yesu, Yandi belula bo. Bo nataka mpi bantu yina ya mpeve ya mbi me simba bo, ti Yandi basisaka bampeve yina yonso.

BOOK Tangila bana baverse yai :

? Yula bana

40 Ebuna, bu ntangu yantikaka kudinda, bo yonso yina vandaka na bantu ya maladi mutindu na mutindu, bo nataka bo na Yandi. Yandi tulaka bo yonso maboko mosi-mosi, ti belulaka bo.

41 Ti bampeve ya mbi mpi basikaka na bantu mingi, kuboka nde : « Nge kele Mesia, Mwana ya Nzamb i! » Kansi Yandi...pesaka bo nzila ve kutuba, sambu bo zabaka nde Yandi vandaka Mesia.

? Yula bana

✗ Bana sala bageste to mwa-senete

✳ Bana yimba ti kina

10.3 Bo natilaka Yesu bamalade na bisika mingi, ti Yandi belulaka bo.

BOOK Tangila bana baverse yai :

Matayo 3 :24 Nsangu na Yandi mwanganaka na ntoto ya Syrie ya mvimba, ebuna bo natilaka Yandi bantu yonso yina vandaka na bamalade ti mambu ya pesaka bo mpasi, mutindu na mutindu. Bo nataka mpi bantu yina ya bampeve ya mbi me simba bo, bantu ya

vandaka na maladi ya vandaka kunikisa nitu na bo, bantu ya vandaka kikata, etc., ti Yandi belulaka bo.

25 Bantu mingi vandaka kulanda Yandi, bantu ya Galilea, ya Dekapolis, ya Yeruzalemi, ya Yudea, ti kuluta masa ya Yordani.

? Yula bana

Bana sala bageste to mwa-senete

Bana yimba ti kina

10.4 Bantu zolaka kukanga Yesu, Yandi bikala kaka na bo. Kansi Yandi monaka nde Yandi fweti pusa na ntwala kusamuna na babwala ya nkaka.

Tangila bana baverse yai :

Luka 4 :42 Bu ntangu me basika, Yandi basikaka ti kwendaka na sika Yandi vandaka Yandi mosi. Bantu mingi sosaka Yandi ti kwisaka na Yandi. Bomekaka kukanga Yandi nzila kubasika.

43 Kansi Yandi tubaka na bo nde, « Ntete Mono fweti samuna Kimfumu ya Nzambi na babwala ya nkaka, sambu yai kele raiso ya Nzambi tindaka Mono. »

? Yula bana

Bana sala bageste to mwa-senete

Bana yimba ti kina

>|< Kumanisa Malongi :

Bantu vandaka na kiese nde Yesu bikala na kati na bo, sambu na mpila Yandi vandaka kubelula bamalade ti kubasisa bampeve ya mbi. Yo yina, bo zolaka kukanga Yandi, Yandi bikala na kati na bo. Kansi Yesu kwisaka ve kaka kusadisa bwala mosi. Yandi kwisaka sambu na bantu yonso. Yandi pusaka na ntwala sambu bantu na babwala yonso vandaka na mfunu na kuwa malongi na Yandi.

Na ntwala Yesu yutukaka na zulu, Yandi tulaka kisalu na Yandi na maboko ya balonguki na Yandi. Beto mpi, bakristo ya me balula ntima na Yandi, beto kele balonguki na Yandi. Kisalu ya Yesu kele na maboko na beto. Keti beto mpi ta pusa na ntwala sambu bantu yonso kuwa ndinga na Yandi ?

Devoir sambu na bakristo :

Beto bakristo, kana beto lenda kwenda ntete ve na bisika ya nkaka sambu na kusonga bantu nsangu ya Yesu, beto yonso lenda samba sambu na bantu na babwala ya nkaka ti bansi ya nkaka.

Na bainsi ya nkaka, ata awa na Afrika, bantu mingi ke na mfunu ya kuzaba Yesu. Beto lenda yindula bansi bonso Nigeria, bonso Alzerie, bonso Djibouti, bonso Somalie. Na mposo yai, keti nge ta tula bansi yai na lombilu ? Ketinje nge ta lomba nde Nzambi tinda bantu na bisika yai, mpi na konso nsi ya Afrika, sambu na kusonga bo nsangu ya Yesu ?

Verse ya Kulonguka :

...Yandi tubaka na bo nde, « Ntete Mono fweti samuna Kimfumu ya Nzambi na babwala ya nkaka, sambu yai kele raiso ya Nzambi tindaka Mono. »

Luka 4 :43

Bankunga ya kwenda nzila mosi ti lesò :

Kana Nge Me Vuluswa, Tubila Bampangi Kwenda Nord, Kwenda Sud


Invitatio sambu na bo yina me yamba Yesu ntete ve :

Yesu kwisaka sambu na bantu yonso, ti Yandi kwisaka sambu na nge. Yandi kwisaka sambu na kubaka mbi yonso ya nge me sala na zulu ya mapeka na Yandi mosi. Yandi salaka yo na zulu ya kulunsi, ti na nima, Tata Nzambi tedimisaka Yandi na lufwa.

Nge mosi, keti nge me balula ntima na nge ? Ketinje nge me yamba Yandi ? Kana nge zaba ve, nge lenda zaba bubuyai. Kaka binga Yandi ti songa Yandi nde nge zola bika nzila ya kimuntu, kukota nzila na Yandi. Konso mposso, beno ya ke sosa lusadisu na mambu yina, beno lenda bikala na nima ya ecodim sambu beto kusadisa beno.

NSUKA YA LESO 10

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.



...Yandi tubaka na bo nde,
**« Ntete Mono fweti samuna
Kimfumu ya Nzambi na babwala
ya nkaka, sambu yai kele raiso
ya Nzambi tindaka Mono. »**

Luka 4 :43

Leso 11. Yesu zola sadisa beto.

Matayo 8 :1-4, Marko 2 :1-12

I. PREPARATIO SAMBU NA MONITEUR-

Leso yai na nkufi :

Yesu belulaka muntu ya maladi ya lepre ti muntu ya vandaka kikata. Yandi zola kusadisa beto mpi.

◎ Kikuma ya Leso :

Beto kuwa boma ve kukwenda na Yesu na bampasi na beto, sambu Yandi zola sadisa beto.

♥ Verse ya Kulonguka :

2 Ebuna, atasio ! Muntu ya maladi ya lepre kwisaka ti sambilaka (Yesu). Yandi nde : « Mfumu, kana Nge zola, Nge lenda belula mono. »

3 Ntangu yina, Yesu nangulaka diboko na Yandi, simbaka yandi, ti tubaka : « Mono zola. Beluka ka nge. » Kaka mbala mosi, maladi ya lepre manaka na yandi. Matayo 8 :2-3

↖ Bankunga ya kwenda nzila mosi ti lesò :

Bu Yesu Kele na Mono
Lomba na Nzambi

II. REVISIO

↑ Kuyindula diaka baleso me luta :

Beto me mona nde bo nataka bamalade mingi na Yesu, ti Yandi vandaka kubelula bo. O, nki mutindu Yesu zolaka beto, ata beto kele bantu ya mbi !

III. KULONGA LESO YAI

→ Kuyantika :

Bantu ya nkaka yindula nde yo kele mpasi kukwisa na Yesu. Yandi Mfumu ya nene, Yandi bisalu mingi. Bo kuwa bonso Yandi kele ntama. Bo yindula nde bo fweti kwisa na Nzambi na nzila ya nkaka. Kansi mambu ya kieleka kele nde Yesu zola sadisa beto. Beto kwisa na Nzambi na nzila na Yandi.

❖ Malongi ya nene ya lesò yai (developpement) na banti 4 :

11.1 Bantu zolaka ve kuvanda penepene na muntu ya malade ya lepre. Bo lendaka ve kusimba muntu ya malade yina. Kansi lepre mosi kwisaka na Yesu kutuba nde ‘Kana Nge

zola, Nge lenda belula mono.’ Yesu ndimaka nde Yandi zolaka. Yandi simbaka muntu yina ti belulaka yandi.

❖ Tangila bana baverse yai :

Matayo 8 :1 Ntangu Yesu kulumukaka na ngumba, bantu mingi-mingi landaka Yandi.

2 Ebuna, atasio ! Muntu ya maladi ya lepre kwisaka ti sambilaka Yandi. Yandi nde : « Mfumu, kana Nge zola, Nge lenda belula mono. »

3 Ntangu yina, Yesu nangulaka diboko na Yandi ti simbaka yandi, ti tubaka : « Mono zola. Beluka ka nge. » Kaka mbala mosi, maladi ya lepre manaka na yandi.

? Yula bana

↖ Bana sala bageste to mwa-senete

↖ Bana yimba ti kina

11.2 Yesu longaka ti belulaka bantu mingi.

❖ Tangila bana baverse yai :

Marko 2 :1 Ebuna, Yandi kotaka bwala Kapernaumi diaka na nima ya ndambu bilumbu, ti bantu waka nde Yandi vandaka na kati ya nzo.

2 Na mbala mosi, bantu mingi vandaka kuvukana sika mosi, na mpila nde sika bikalaka ve kuyamba bo yonso, ata penepene na kielo. Ti Yesu samunaka ndinga ya Nzambi na bo.

? Yula bana

↖ Bana sala bageste to mwa-senete

↖ Bana yimba ti kina

11.3 Bantu iya kwisaka na muntu ya vandaka kikata. Bo monaka ve mpila kukwisa na Yesu, sambu bantu vandaka mingi. Yo yina, bo kangulaka ludi ya nzo sambu na kukitisa muntu yina na ntawala ya Yesu. Yesu monaka lukwikilu na bo, ti Yandi belulaka muntu yina.

❖ Tangila bana baverse yai :

3 Ebuna bo kwisaka na Yandi, ti bantu iya vandaka kunatila Yandi muntu ya vandaka kikata.

4 Bo monaka mpila ve kukwisa na Yandi sambu

bantu mingi vandaka kukangama kuna. Yo yina, bo kangulaka munoko na ludi ya nzo sika Yandi vandaka... bo kitisaka matela ya vandaka kusimba yandi.

5 Bu Yesu monaka lukwikilu na bo, Yandi tubaka na muntu ya vandaka kikata, "Mwana, Nzambi lolula masumu na nge."

12 Mbala mosi, muntu yina telamaka, yandi bakaka mbeto na yandi, ti yandi basikaka na meso na bo yonso. Yo yina, bo yonso vandaka kuyituka ti kupesa lukumu na Nzambi...

?

Yula bana

Bana sala bageste to mwa-senete

Bana yimba ti kina

11.4 Yesu lolulaka masumu ya muntu yina mpi. Yandi lenda lolula masumu sambu Yandi kele Nzambi kibeni.

Tangila bana baverse yai :

6 ...balongi ...ya Bible vandaka kuvanda pana. Yo yantikaka kudikuyindua nde :

7 "Nki mutindu Muntu yai ke tuba mpidina ? Nani lenda lolula masumu ? Kaka Nzambi Yandi mosi !"

10-11 Kansi Yandi tubaka ... nde Mwana-Muntu kele na kiyeka na ntoto yai kulolula masumu.

?

Yula bana

Bana sala bageste to mwa-senete

Bana yimba ti kina

>|< Kumanisa Malongi :

Yesu zola sadisa beto. Ntangu muntu ya maladi ya lepre tubaka nde : « Kana Nge zola, Nge lenda belula mono, » Yesu simbaka yandi na diboko. Yesu vutulaka nde, "Mono zola. Beluka ka nge."

Bantu ya nkaka zolaka kaka kubikala na distance ti muntu ya maladi yina. Kansi Yesu simbaka yandi. Yesu zolaka kusadisa yandi.

Na kiese, Yesu belulaka muntu ya maladi ya ngolo bonso kikata. Kansi Yandi monaka nde muntu yina vandaka na probleme ya kuluta ngolo. Masumu na yandi me kanga yandi nzila kuvanda na kinduku ti Nzambi. Yo yina, Yesu lolulaka masumu na yandi.

Yandi sadisaka yandi na mambu ya nitu ti ya kimpeve.

Devoir sambu na bakristo :

Bana bakristo, keti beno ke samba bonso beno ke bakisa nde Yesu zola sadisa beto ? Konso ntangu beto kele na mpasi, beto lenda kwenda na Yandi. Yandi zola sadisa beto.

Verse ya Kulonguka :

2 Ebuna, atasio ! Muntu ya maladi ya lepre kwisaka ti sambilaka (Yesu). Yandi nde : « Mfumu, kana Nge zola, Nge lenda belula mono. »

3 Ntangu yina, Yesu nangulaka diboko na Yandi, simbaka yandi, ti tubaka : « Mono zola. Beluka ka nge. » Kaka mbala mosi, maladi ya lepre manaka na yandi. Matayo 8 :2-3

Bankunga ya kwenda nzila mosi ti lesò :

*Bu Yesu Kele na Mono
Lomba na Nzambi*

Invitatio sambu na bo yina me yamba Yesu ntete ve :

Kansi, kana nge me balula ntima na Yesu ntete ve, mambu ya ntete Yandi zola sala sambu na nge kele kulolula masumu na nge. Beto yonso me butuka bankwa-mbi. Ntima na beto ke kwenda nswalu na mambu ya ke pesa Nzambi kiese ve. Bible ke tuba nde beto yonso me sala masumu (Roma 3 :23).

Dezia, Nzambi me tinda Mwana na Yandi ya luzolo Yesu Kristo awa na nsi-ntoto sambu na kubaka masumu yonso ya beto na zulu na Yandi mosi. Yandi salaka yo ntangu Yandi fwaka na zulu ya kulunsi bonso nkailu na sika na beto.

Nzambi songaka nde Yandi ndimaka yonso ya Yesu salaka na mpila Yandi tedimiska Yandi na lufwa. Bubuyai, kana masumu me lembisa nge, kana nge zola kukota na kinduku, na kintwadi ti Nzambi, Yesu zola sadisa nge.

Balula ntima ti tula kivuvu na Yandi bubuyai. Yandi ta lolula masumu na nge yonso, ti Yandi ta pesa nge ntima ya mpa ya zola kupesa Nzambi kiese.

NSUKA YA LESO 11

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 11

**Yesu simbaka muntu yina vandaka na maladi ya lepre, ti
belulaka yandi. Yandi zola sadisa beto.**



Ebuna, atasio ! Muntu ya maladi ya lepre kwisaka ti sambilaka (Yesu).

Yandi nde : « Mfumu, kana Nge zola, Nge lenda belula mono. »

Ntangu yina, Yesu nangulaka diboko na Yandi, simbaka yandi, ti tubaka :« Mono zola. Beluka ka nge. » Kaka mbala mosi, maladi ya lepre manaka na yandi. Matayo 8 :2-3

Leso 12. Yesu bingaka Matayo, muntu ya masumu.

Matayo 9 :9-13

I. PREPARATIO SAMBU NA MONITEUR-

◎ Kikuma ya Leso :

Beto landa Yesu bonso balonguki na Yandi, ti beto binga bantu ya nkaka kulanda Yandi mpi.

♥ Verse ya Kulonguka :

... Mono kwisaka ve kubinga bantu ya mbote, kansi bantu ya masumu kubalula ntima. Matayo 9 :13

☛ Bankunga ya kwenda nzila mosi ti leso

Yesu Ke Nzila

II. REVISIO

↑ Kuyindula diaka baleso me luta :

Beto me mona mpila Yesu yantikaka kubinga balonguki. Nani bambuka bazina ya balonguki 6 ya Yandi me binga dezia ?

(Simoni ti leki na yandi André, Filipo ti Natanaele, Yakobo ti Yoane)

III. KULONGA LESO YAI

➔ Kuyantika :

Nani lenda kuma longuki ya Yesu ? Keti Yesu ke sosa bo yina me luta mbote sambu Yandi binga bo kukuma balonguki na Yandi ? Beto ta baka mvutu na histoire ya Bible.

❖ Malungi ya nene ya leso yai (developpement) na banti 4 :

12.1 Yesu monaka Matayo na biro na yandi ya kufutisa bantu mpaku. Yesu bingaka yandi kulanda Yandi, ti Matayo landaka.

BOOK Tangila bana baverse yai :

Matayo 9 :9 Bu Yesu katukaka na kisika yina, Yandi monaka muntu mosi zina ya Matayo, me vanda na biro ya kufutisa bantu mpaku. Yesu tubilaka yandi nde : "Kwisa landa Mono." Ebuna Matayo telemaka, ti yandi landaka Yesu.

? Yula bana

✗ Bana sala bageste to mwa-senete

☛ Bana yimba ti kina

12.2 Yesu kudiaka mesa mosi ti bantu ya masumu.

BOOK Tangila bana baverse yai :

10 Ntangu Yesu vandaka na zulu ya mesa na nzo, atasio ! Bantu mingi ...ya masumu kwisaka kuvanda mesa mosi ti Yandi ti balonguki na Yandi.

? Yula bana

✗ Bana sala bageste to mwa-senete

☛ Bana yimba ti kina

12.3 Bantwadisi ya Bayuda nganinaka balonguki sambu na mambu yina.

BOOK Tangila bana baverse yai :

11 Ebuna ntangu Bafarise monaka yo, bo yulaka balonguki na Yandi nde : "Sambu na nki Longi ya beno ke dia mesa mosi ti bantu ya ke futisaka bantu mpaku ti bantu ya masumu ?"

? Yula bana

✗ Bana sala bageste to mwa-senete

☛ Bana yimba ti kina

12.4 Yesu tubaka nde kele bantu ya masumu yina kele na mfunu na Yandi. Yandi kwisaka kubinga bantu ya masumu, bo balula ntima.

BOOK Tangila bana baverse yai :

12 Bu Yesu waka mambu yina, Yandi songaka bo nde : "Bo yina kele na sante ya mbote kele na mfunu ya nganga ve, kansi bo yina kele malade.

13 Kansi kwenda ti longuka disongidila ya bandinga yai : « Mono ke sosa nkenda, kansi bamakabu ve. » (Osée 6 :6) Sambu Mono kwisaka ve kubinga bantu ya mbote, kansi bantu ya masumu kubalula ntima.

? Yula bana

✗ Bana sala bageste to mwa-senete

☛ Bana yimba ti kina

>|< Kumanisa Malungi :

Yesu kudiaka sikamosi ti bantu ya masumu. Yandi solulaka ti bo sambu Yandi me kwisa kugulusa bo.

Nani lenda kuma longuki ya Yesu ? Konso muntu ya zaba nde yandi me sala mbi na meso ya Nzambi, ti ya zola balula ntima, kubika nzila yina, kukota na nzila ya Yesu.

Kieleka, beto yonso me sala mbi. Beto yonso kele bantu ya masumu. Konso muntu lenda landa Yesu kana yandi ta kaka balula ntima. Na nima, Yesu ta songa yandi nzila ya kieleka.

Nge mpi lenda kuma mulonguki ya Yesu. Bantu ya fami na nge, bo lenda kuma balonguki. Banduku na nge, bo lenda kuma balonguki. Muntu kuluta mbi na bwala na nge, yandi lenda kuma mulonguki. Yo lomba kaka nde, muntu na muntu, bo balula ntima.

Devoir sambu na bakristo :

Kana nge kele dezia longuki ya Yesu, keti nge ke songa nsangu ya mbote yai na bantu ya nkaka ?
Keti nge ta lomba Nzambi kukangula nzila nde nge songa yo na muntu mosi ata mposo yai ?

Verse ya Kulonguka :

... Mono kwisaka ve kubinga bantu ya mbote, kansi bantu ya masumu kubalula ntima. Matayo 9 :13

Bankunga ya kwenda nzila mosi ti lesos :

Yesu Ke Nzila

Invitatio sambu na bo yina me yamba Yesu ntete ve :

Mbala ya nkaka nge zaba ntete ve kana nge kele longuki ya Yesu. Beto kele balonguki ve na lubutuku na beto. Beto kele balonguki ve kaka sambu beto kuwa zina ya Yesu. Beto kele balongukai ve kaka sambu beto kwisa na bisambu, to na ecodim. Beto kele balonguki ve kaka sambu bo me pesa beto mbotika. Beto kele balonguki ve kaka sambu beto kele mwana ya mukristo to ya diacre, to ya pasteur.

Muntu kuma longuki ya Yesu kaka ntangu yandi bakisa nde yandi kele na nzila ya masumu, ebuna yandi balula ntima. Yandi yamba Yesu Kristo bonso Mvulusi na yandi. Yandi yantika kulanda Yesu. Kana nge kele longuki, nge ke tula ngolo kusala yina ya Yesu zola.

Kana nge me kuma mulonguki ntete ve, nge lenda balula ntima bubu yai. Yesu ta yamba nge.

NSUKA YA LESO 12

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.



Leso 12

... Mono kwisaka ve
kubinga bantu ya
mbote, kansi bantu ya
masumu kubalula
ntima.

Matayo 9 :13

Leso 13. Yesu songaka mutindu kuzitisa lumbu ya bisambu.

Matayo 12 :1-2, 7-14

I. PREPARATIO SAMBU NA MONITEUR-

◎ Kikuma ya Leso :

Kusonga nde Yesu kele Mfumu ata ya Kilumbu ya Kupema. Yo yina beto sadila lumbu yina na mpila ya pesa Yandi kiese.

♥ Verse ya Kulonguka :

...Mwana-Muntu kele Mfumu, ata ya Kilumbu ya Bisambu. Matayo 12 :8

♣ Bankunga ya kwenda nzila mosi ti lesso :

Baka Lukumu
Beto Mene Kutana

II. REVISIO

↑ Kuyindula diaka baleso me luta :

Beto me mona mpila Yesu yantikaka kubinga balonguki na Yandi. Na mposo me luta, beto monaka mpila Yandi bingaka nani ?

(Yandi bingaka Matayo, muntu yina vandaka kufutisa bantu mpaku, muntu yina vandaka mpi kuyiba bo na mpila yandi salaka.) Kansi na nima yandi balulaka ntima na yandi ti yantika kulanda Yesu, yandi zolaka kulanda nzila ya mbi diaka ve.

III. KULONGA LESO YAI

➔ Kuyantika :

Bubuyai beto ta mona mpila Yesu salaka ntangu Yandi vandaka kutambula ti balonguki na Yandi.

Bambuka nde na bilumbu ya ntama, na luyantiku, Nzambi gangaka bima yonso na bilumbu 6, ebuna Yandi pemaka na kilumbu ya 7. Nzambi sakumunaka lumbu yina, ti Yandi pesaka beto nsiku nde konso mposo, lumbu mosi kuvanda lumbu ya kupema ti ya kusamba.

Bayuda vandaka ngolo kulanda nsiku yina, kansi bo yikaka mabanza na bo mingi na zulu ya ndinga ya Nzambi. Bo vandaka na bansiku mingi ya bo mosi me tula.

Yesu zitisaka lumbu ya bisambu. Na Bible, beto ke tanga nde Yandi me yikama kukwenda na Nzo-

Nzambi. Kansi Yandi landaka ve bansiku ya nkaka ya bantu me yika-yika sambu na lumbu yina.

❖ Malongi ya nene ya lesso yai (developpement) na banti 4 :

13.1 Balonguki waka nzala ntangu bo vandaka kutambula na nzila. Yo yina, bo bukaka ndambu bambuma ya ble ya kudia. Bafarize zolaka yo ve.

❖ Tangila bana bavverse yai :

Matayo 12 :1 ...Yesu lutaka na kati ya bilanga ya ble na kilumbu ya bisambu. Balonguki na Yandi vandaka na nzala. Yo yina, bo yantikaka kubuka bambuma ya blé ti kudia yo.

2 Kansi ntangu Bafarize monaka yo, bo tubilaka Yandi nde :“Tala, balonguki na Nge ke sala mambu ya nsiku ke ndima ve kusala na lumbu ya bisambu.”

? Yula bana

➤ Bana sala bageste to mwa-senete

♣ Bana yimba ti kina

13.2 Yesu vutulaka nde Yandi kele Mfumu, ata ya lumbu ya kupema.

❖ Tangila bana bavverse yai :

3,7 Kansi Yandi songaka bo nde :...kana beno me bakisa disongidila ya bandinga yai, ‘Mono sosa nkenda...’,beno zolaka ve kufunda Mono ya me sala mbi ve.

8 Sambu Mwana-Muntu kele Mfumu, ata ya kilumbu ya bisambu.

? Yula bana

➤ Bana sala bageste to mwa-senete

♣ Bana yimba ti kina

13.3 Yandi kotaka nzo-Nzambi kusamba bonso bifur na Yandi. Kuna Yandi monaka muntu ya kufwa diboko. Bafarize monaka na yo mpila ya bo lenda funda Yandi.

❖ Tangila bana bavverse yai :

9 Bu Yandi me katuka na sika yina, Yandi kotaka Nzo-Nzambi na bo.

10 Kuna vandaka muntu ya vandaka na diboko ya kufwa. Bo yulaka Yandi, “Keti Nsiku ke pesa beto nzila kubelula bantu na kilumbu ya

bisambu?" Bo yulaka Yandi mutindu yina sambu bo sosaka mpila kufunda Yandi.

? Yula bana

☛ Bana sala bageste to mwa-senete

☚ Bana yimba ti kina

13.4 Yesu longaka nde Nsiku ya Nzambi ke pesa beto nzila kusala mambu ya mbote na lumbu ya kupema. Ebuna Yandi belulaka muntu yina. Kansi yo pesaka bafarize kiese ve.

📖 Tangila bana baverse yai :

11 Ebuna Yesu yulaka bo nde : «Nani na kati na beno, kana yandi kele na dimeme mosi, ti kana yo kubwa na kati ya dibulu na kilumbu ya bisambu, yandi ta simba yo ve ti katula yo na dibulu yina ?

12 Ebuna muntu, yandi kele ntalu mingi kuluta mbisi—mpidina ? Yo yina, Bansiku ke pesa beto nzila kusala mbote na kilumbu ya bisambu. »

13 Ebuna Yandi songaka muntu yina nde, ‘Tandula diboko na nge.’ Ebuna yandi tandulaka yo, ti yo kumaka mbote bonso diboko na yandi ya nkaka.

14 Ntangu yina, Bafarize basikaka ti yantikaka kuyidika lukanu, nki mutindu bo lenda kufwa Yandi.

? Yula bana

☛ Bana sala bageste to mwa-senete

☚ Bana yimba ti kina

>|< Kumanisa Malongi :

Yesu sadilaka kilumbu ya kupema na mpila ya pesaka Nzambi kiese. Konso ntangu Yandi kwendaka kusamba na Nzo-Nzambi. Yandi salaka mambu ya mbote ya sadiaka bantu ti ya pesaka Nzambi kiese. Kansi Bafarize sosaka ve kupesa Nzambi kiese to kusadisa bantu ya nkaka. Yesu songaka bo nde Yandi Muntu vandaka Mfumu, bo ve. Ata lumbu ya bisambu, ya kupema, yo vandaka ngindu na Yandi na luyantiku. Yandi Nzambi yina pemaka na lumbu ya nsambwadi ti pesaka beto nsiku nde beto sala lumbu ya bisambu ti ya kupema lumbu mosi konso mposo.

👉 Devoir sambu na bakristo :

Beto bakristo, mbote beto bambuka kusamba ti kupema lumbu mosi konso mposo bonso ndinga ya Nzambi ke tuba. Mukristo, kana nge me yikama ve kusamba ti kupema lumbu mosi konso mposo, mono pesa nge devoir kuyantika na mposo yai.

♥ Verse ya Kulonguka :

...Mwana-Muntu kele Mfumu, ata ya Kilumbu ya Bisambu. Matayo 12 :8

☚ Bankunga ya kwenda nzila mosi ti leso :

Baka Lukumu
Beto Mene Kutana

✚ Invitatio sambu na bo yina me yamba Yesu ntete ve :

Kana beto landa ve bansiku ya Nzambi me pesa beto, yina kele masumu. Yo kele mbi. Yo ke songa nde Yesu kele Mfumu na beto ve. Beto ke landa kaka mabanza to nzala ya beto mosi. Yo pesa Nzambi kiese ve. Yo kele makambu na meso ya Nzambi.


Beto yonso me sala masumu. Beto me landa ve bansiku ya Nzambi. Beto me yindula ve nki mutindu kupesa Yandi kiese. Yindula ! Yandi pesaka beto moyo, kansi beto ke lemfuka na Yandi ve ! O, mbi ya nene ! O, nsoni na beto !

Ntangu Yesu yantikaka kulonga, malongi na Yandi vandaka, “Balula ! Na français beto binga yo repentance. Beto vandaka kukwenda na nzila ya beto mosi, kupesa Nzambi mukongo. Beto fweti mona mpasi sambu na mpila ya mbi ya beto me sala. Beto fweti balula ti kwenda na direction ya nkaka, na nzila na Yandi. Yamba Mwana na Yandi Yesu Kristo na maboko zole. Kwikila Yandi.

Keti nge me balula ? Keti nge me kwikila Yesu Kristo? Kana nge kele na mawa sambu na mbi ya nge me sala, kaka kwenda na Yandi. Ndima masumu na nge. Tula ntima na Yesu, ti Yandi ta yamba nge.


==NSUKA YA LESO 13

☞ Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 13

Balonguki ya Yesu vandaka na nzala. Yo yina, bo bukaka ndambu bambuma ya ble. Yo salaka yo na lumbu ya bisambu. Yo yina, Bafarize zolaka yo ve. Yesu songaka bo nde Yandi Mfumu, ata ya kilumbu ya bisambu.

Leso 13



...Mwana-Muntu
kele Mfumu,
ata ya Kilumbu ya
Bisambu.

Matayo 12 :8

Leso 14. Yesu sambaka, ebuna Yandi solaka balonguki 12.

Luka 6 :12-16

I. PREPARATIO SAMBU NA MONITEUR-

◎ Kikuma ya Leso :

Beto samba Nzambi ngolo na ntwala kuzenga makambu ya mfunu na luzingu na beto.

♥ Verse ya Kulonguka :

Na ntangu yina, lumbu mosi Yesu kwendaka na ngumba sambu na kusamba Nzambi, ebuna Yandi sambaka mpimpa ya mvimba. Luka 6 :12

↖ Bankunga ya kwenda nzila mosi ti lesò :

Lomba na Nzambi Kaka
Nzambi Ta Kuwa Nge

II. REVISIO

↑ Kuyindula diaka baleso me luta :

Beto me mona nde Yesu me binga bantu dezia kulanda Yandi. Beto yonso ya zola kubika masumu ti kulanda malongi na Yandi, beto mpi kele balonguki ya Yesu.

III. KULONGA LESO YAI

➔ Kuyantika :

Kansi mpila vandaka ve nde bantu yonso kulanda Yesu konso sika Yandi kwendaka. Yindula yo ta vanda nki mutindu kana konso mukristo ya dibundu na nge fweti landa pasteur na konso sika yandi kwendaka. Mpasi. Yo yina, na kati ya balonguki, Yesu zolaka kusola ndambu bantu yina ta landa Yandi na konso kisika. Bo ta kuma bantemwe na Yandi. Yandi ta pesa bo kiyeka ya ngolo ya ta luta kiyeka ya konso mulandi na Yandi. Bo ta kuma bantumwa na Yandi.

Yesu vandaka na bifu ya kusamba Nzambi konso ntangu. Kansi yai vandaka mambu ya kuluta mfunu. Mambu yai lombaka lombili ya mingi.

🕸 Malongi ya nene ya lesò yai (developpement) na banti 4 :

14.2 Yesu salaka ntangu mingi na lombilu—mpimpa ya mvimba.

 Tangila bana baverse yai : [NB, Moniteur.

Yai kele verse ya bana ta longuka kutuba bubuyai.]

Luka 6 :12 Na ntangu yina, lumbu mosi Yesu kwendaka na ngumba sambu na kusamba Nzambi, ebuna Yandi sambaka mpimpa ya mvimba.

? Yula bana

↗ Bana sala bageste to mwa-senete

↖ Bana yimba ti kina

14.2 Na suka, Yesu bingaka balonguki, ti bo kwisa na Yandi.

 Tangila bana baverse yai :

13a Bu ntangu me tana, Yandi bingaka balonguki na Yandi, bo kwisa na Yandi.

? Yula bana

↗ Bana sala bageste to mwa-senete

↖ Bana yimba ti kina

14.3 Na kati na bo, Yandi solaka bantu 12 kukuma bantumwa na Yandi.

 Tangila bana baverse yai :

13b Na kati na bo, Yandi solaka bantu kumi na zole na kuvanda bantumwa na Yandi.

? Yula bana

↗ Bana sala bageste to mwa-senete

↖ Bana yimba ti kina

14.4 Bazina ya bantu Yandi solaka, bo yai : Simoni Piere, Andre, Yakobo, Yoane, Filipo, Bartelemi, Matayo, Toma, Yakobo mwana ya Alfeo, Simoni muntu ya zele, Yudasi mwana ya Yakobo, ti Yudasi Iskariote.

 Tangila bana baverse yai :

*13c-16 Bantu yina ya Yandi solaka, bo yai :
Simoni (yina ya Yandi pesaka zina ya nkaka Piere) ti leki na yandi Andre, Yakobo, Yoane, Filipo, Bartelemi, Matayo, Toma, Yakobo mwana ya Alfeo, Simoni (yina ya bo vandaka kubinga ‘muntu ya zele’), Yudasi mwana ya Yakobo, ti Yudasi Iskariote yina tekaka Yandi na nima.*

? Yula bana

Bana sala bageste to mwa-senete

Bana yimba ti kina

>|< Kumanisa Malongi :

Yesu sambaka Nzambi konso ntangu. Kansi, na ntwala ya kuzenga makambu ya nene, Yandi sambaka ya kuluta. Ata Yandi vandaka Mwana ya Nzambi, Yandi monaka mfunu kulomba Tata na Yandi. Ntete, Yandi sambaka. Na nima, Yandi zengaka mambu ya nene, nani ta vanda bantumwa 12 na Yandi.

Kana Yesu, Mwana ya Nzambi, salaka mpidina, nki mutindu beto bantu fweti sala ? Konso ntangu, na ntwala ya kuzenga makambu ya nene ya luzingu na beto, beto ke na mfunu kusamba. Kusamba ngolo. Kusosa luzolo ya Nzambi na mambu yina. Beto samba ve kubenda Nzambi kusala yina ya beto zola. Ve. Beto sambu sambu na kusosa kuzaba nki Yandi zola na mambu yina.

Devoir sambu na bakristo :

Mwana mukristo, keti nge ke sambaka Nzambi na ntwala ya kuzenga nki nge ta sala ? Keti nge ke lomba Yandi kutwadisa nge ? Keti nge ke lomba Yandi kusonga nge nki kusala ? Nge ta kwenda na nki ecole ? Nge ta landa nki cours ? Nge ta sala kinduku ti nani ?

Verse ya Kulonguka :

Na ntangu yina, lumbu mosi Yesu kwendaka na ngumba sambu na kusamba Nzambi, ebuna Yandi sambaka mpimpa ya mvimba. Luka 6 :12

Bankunga ya kwenda nzila mosi ti lesò :

Lomba na Nzambi Kaka
Nzambi Ta Kuwa Nge

Invitatio sambu na bo yina me yamba Yesu ntete ve :

Nzambi me sila nde Yandi ke waka lombilu ya bana na Yandi. Kansi, mbala ya nkaka nge me kuma mwana ya Nzambi ntete ve.

Beto ke butuka ve bana ya Nzambi. Bible ke tuba nde beto me butuka bana ya mbi, bana ya kimfumu ya Satana, bana ya mpimpa. Nzambi ke na kiese na beto ve, sambu beto kele kulanda nzila na Yandi ve, kansi nzila na beto mosi. Beto kele bankwa-masumu. Yo yina, makasi ya Nzambi ke bikala

kaka na zulu ya bantu na beto. Nsuka ya masumu na beto kele lufwa.

Kansi, nsangu ya mbote ! Nzambi zolaka beto, ata ntangu beto vandaka bantu ya masumu. Yandi tindaka Mwana na Yandi, Yesu Kristo. Yesu salaka kaka mbote konso ntangu. Kansi na lukanu ya Nzambi, bantu ya kimpala fwaka Yandi na zulu ya kulunsi. Bo yindulaka nde bo me manisa Yandi. Bo zabaka ve nde yina yonso vandaka lukanu ya Nzambi. Yesu fwaka bonso nkailu na sika na beto. Yandi bakaka masumu yonso na beto na zulu na Yandi mosi. Yandi fwaka sambu na beto.

Kansi lufwa lenda manisa ve Mwana ya Nzambi. Na nima ya bilumbu tatu, Nzambi tedimisaka Yesu na lufwa.

Bubuyai, konso muntu ya ke mona mawa sambu na masumu na yandi, bo lenda kwenda na Yesu. Nge mpi, kana nge balula ntima ti tula kivuvu na Yesu, Nzambi ta lolula masumu na nge. Nzambi ta gulusa nge. Nzambi ta kitula nge mwana na Yandi. Yandi ta vutula kinduku na kati na nge ti Yandi. Yandi ta pesa nge ntima ya mpa, ntima ya mbote ya zola kusala yina ya ke pesa Yandi kiese. Kana nge me yamba Yandi ntete ve, keti nge ta binga Yandi bubuyai ?

NSUKA YA LESO 14

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 14

**Na ntwala kusola
bantumwa 12 na Yandi,
Yesu sambaka mpimpa ya
mvimba.**



Na ntangu yina,
lumbu mosi Yesu
kwendaka na
ngumba sambu na
kusamba Nzambi,
ebuna Yandi
sambaka mpimpa ya
mvimba.

Luka 6 :12

Leso 14

Leso 15. Yesu songaka mpila bantu fweti zinga na kimfumu na Yandi.

(Malongi ya Yesu na Zulu ya Ngumba-kitini ya ntete)

Matayo 5 :1—7 :29 (*Bitini me katuka na bakapu yai*)

I. PREPARATIO SAMBU NA MONITEUR-

◎ Kikuma ya Leso :

Beto tula ntima na Nzambi bonso Tata ya luzolo, ti sosa Kimfumu na Yandi ntete, na ntwala ya mambu yonso ya nkaka.

♥ Verse ya Kulonguka :

Kansi beno sosa Kimfumu ya Nzambi ti mambu ya Yandi ke zolaka, ebuna Yandi ta yika beno bima yina yonso. Matayo 6 :33

♣ Bankunga ya kwenda nzila mosi ti leso :

Kana Beno Ke Zolaka Mono
Sosa Ntete

II. REVISIO

↑ Kuyindula diaka baleso me luta :

Na mposo me luta, beto monaka mpila Yesu solaka bantu 12 kuvanda bantumwa na Yandi.

III. KULONGA LESO YAI

➔ Kuyantika :

Kulanda Yesu kele bonso kundima Yandi bonso Mfumu. Nki mutindu bantu fweti zinga na Kimfumu na Yandi ? Na leso ya bubu, beto ta mona mpila Yesu yantikaka kulonga bo mambu yina.

❖ Malongi ya nene ya leso yai (developpement) na banti 4 :

15.1 Yesu mataka na zulu ya ngumba, ti kuna Yandi longaka balonguki na Yandi nki mutindu kuzinga na kimfumu na Yandi. Bantu mingi ya nkaka mpi vandaka kuwa Yandi. Matayo 5 :1-2

❖ Tangila bana baverse yai :

5:1-2 Ntangu Yesu monaka bantu mingi-mingi, Yandi mataka na zulu ya mwa-ngumba mosi. Balonguki na Yandi kwisaka penepene na Yandi, ebuna Yandi yantikaka kulonga bo nde:

? Yula bana

↗ Bana sala bageste to mwa-senete

↖ Bana yimba ti kina

15.2 Yesu nde : Kiese ti lusakumunu kele ve na mpila bantu mingi yindula, kansi na nzila ya Nzambi. Beto wa nzala na yo, ebuna Nzambi ta fulusa beto na yo. Matayo 5 :6

❖ Tangila bana baverse yai :

5:6 “Kiese na bantu yina ke waka nzala mingi na kusala mambu ya Nzambi ke zolaka, sambu Nzambi ta pesa bo mambu yonso ya kufwana.

? Yula bana

↗ Bana sala bageste to mwa-senete

↖ Bana yimba ti kina

15.3 Yesu nde : Na Kimfumu ya Nzambi, beto buya makasi ti nzala ya kuvutula bantu mbi. Beto zola bantu yonso, ata bambeni na beto. Matayo 5 :21-22, 43-44, 46.

❖ Tangila bana baverse yai :

5 :21 « Beno me waka nde Nzambi tubilaka bankaka na beno nde : ‘Kufwa muntu ve. Konso muntu yina me fwa muntu ya nkaka, bo ta sambisa yandi.’

22 Kansi Mono ke tubila beno nde : Konso muntu yina me wila mpangi na yandi makasi, bo ta sambisa yandi. Konso muntu yina tuba na mpangi na yandi nde : ‘Nge kele muntu mosi ya mpamba,’ bo ta sambisa yandi...Konso muntu ya tuba na mpangi na yandi nde : ‘Zoba !’, yandi me fwana na kukwenda na tiya ya bilungi !

43-44 « Beno me waka nde Nzambi tubilaka beno nde : ‘Zola mpangi na nge’...kansi Mono ke tubila beno nde : Beno zola bambeni na beno. Samba Nzambi sambu na bantu yina ke monisaka beno mpasi.

46 Kana beno ke zolaka kaka bantu yina ke zolaka beno, na nki Nzambi fweti pesa beno matabisi ? Ata bakalaki ya ke futisaka bantu mpaku...ke zolaka...bantu ya ke zolaka bo !

? Yula bana

 **Bana sala bageste to mwa-senete**

 **Bana yimba ti kina**

15.4 Yesu nde : Na Kimfumu ya Nzambi, beto sosa Nzambi ntete, ti beto tula Yandi ntima nde Yandi ta pesa beto yonso ya mfunu. Matayo 6 :25-34

 **Tangila bana baverse yai :**

25 “Yo yina, Mono ke tubila beno nde : Beno mona mpasi ve nki beno ta dia to nki beno ta nwa. Beno mona mpasi ve nki bilele beno ta lwata...

26 Beno tala bandeke : Bo ke kunaka ve. Bo ke katula madia ve na bilanga. Bo ke bumba madia na nzo ve. Keti beno me luta bandeke ve na mfunu ?

28 “Sambu na nki beno ke tulaka mabanza na beno na bilele ? Beno tala bintuntu ya nseke, nki mutindu yo ke kulaka. Yo ke salaka ve. Yo ke kuditungilaka bilele ve.

29 Kansi...Ata yandi mosi Salomo, na lukumu ya kimfumu yonso na yandi, Iwataka bilele ya kitoko ve bonso kintuntu mosi yai.

31-32 Beno kumona mpasi ve na kuyula nde: ‘Beto ta dia nki? Beto ta nwa nki? Tata na beno na zulu zaba nde beno ke na mfunu ya bima yina yonso.

33 Kansi beno sosa Kimfumu ya Nzambi ti mambu ya Yandi ke zolaka, ebuna Yandi ta yika beno bima yina yonso. [Verse ya Kulonguka Bubuyai]

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Balonguki vandaka kaka kuyantika kuzinga na nsi ya luyalu ya Nzambi. Yai lombaka nde bo balula mabanza na bo na mambu mingi. Bo fweti bika mabanza na bo ya ntama, ata mabanza ya bankaka na bo. Bo fweti vanda na nzala ya kupesa Nzambi kiese. Bo fweti katula kimbeni ti yantika kulanda luzolo na bantu yonso. Bo fweti landa Nzambi ntete ti tula Yandi ntima nde Yandi ta yika bo

mambu yonso ya mfunu.

 **Devoir sambu na bakristo :**

Beno bakristo, keti beno zaba muntu ya zola nge ve ? Muntu ya me sala nge mbi ? Mposo yai, tula yandi na lombilu, ti sosa mambu ya nki mambu ya mbote ya nge lenda sala sambu na yandi.

 **Verse ya Kulonguka :**

Kansi beno sosa Kimfumu ya Nzambi ti mambu ya Yandi ke zolaka, ebuna Yandi ta yika beno bima yina yonso. Matayo 6 :33

 **Bankunga ya kwenda nzila mosi ti lesò :**

Kana Beno Ke Zolaka Mono
Sosa Ntete

 **Invitatio sambu na bo yina me yamba Yesu ntete ve :**

Keti nge kele kuzinga na Kimfumu ya Nzambi ? Yesu tubaka nde, “Ata muntu mosi ve lenda mona Kimfumu ya Nzambi, kana yandi me butuka diaka mbala ya zole ve” (Yoane 3 :3b) Keti nge me butuka diaka mbala ya zole ? Keti nge me bakisa nde nge kele muntu ya masumu, mpi nde masumu na nge me kanga nge nzila kuvanda na kinduku ti Nzambi ? Kana nge bakisa yo, kele Mpeve ya Nzambi me songa nge mambu yina.

Kansi Nzambi monaka probleme na beto ya masumu, ti Yandi pesaka beto Mwana na Yandi ya kitoko Yesu Kristo. Yesu pesaka moyo ti menga na Yandi bonso makabu ya Nzambi lenda ndima sambu na masumu na beto. Nzambi songaka nde Yandi me ndima makabu ya Yesu, ntangu Yandi tedimisaka Yandi na lufwa.

Bible ke tuba nde konso muntu ya masumu ya balula ntima ti binga zina ya Nzambi kulomba mpulusu, Nzambi ta gulusa Yandi. Kana nge me binga zina na Yandi ntete ve, nge lenda sala yo bubuyai. Kana nge ke na mfunu ya lusadisu, bikala na nima ya ecodim ti beto ta sadisa nge.

NSUKA YA LESO 15

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 15

**Yesu vandaka na zulu ya ngumba ti balonguki ti bantu
mingi ya landaka Yandi. Yandi longaka bo nki mutindu bo
fweti zinga na Kimfumu ya Nzambi.**



Leso 15

Kansi beno sosa
Kimfumu ya
Nzambi ti
mambu ya Yandi
ke zolaka, ebuna
Yandi ta yika
beno bima yina
yonso. *Matayo 6 :33*

Leso 16. Yesu belulaka sielo ya soda ti tedimisaka mwana ya mufwidi ya nkento.

Matayo 8 :5-13, Luka 7 :11-17

I. PREPARATIO SAMBU NA MONITEUR-

◎ Kikuma ya Leso :

Bana bakisa nde Yesu kele Mwana ya Nzambi ti Nzambi kibeni. Yo yina, ngolo na Yandi kele na nsuka ve, limite ve. Beto tula Yandi ntima na mambu yonso.

♥ Verse ya Kulonguka :

« ...Nzambi me kwisa kusadisa bantu na Yandi ! »
Luka 7 :16b

♣ Bankunga ya kwenda nzila mosi ti leso :

Nzambi Ta Kuwa Nge
Yesu Ikele Awa

II. REVISIO

↑ Kuyindula diaka baleso me luta :

Na mposo me luta, beto monaka nki mutindu beto balandi ya Yesu fweti zinga na Kimfumu na Yandi. Na lesu ya bubu, beto ta mona nki kele ngolo ya Yesu, Mfumu na beto.

III. KULONGA LESO YAI

➔ Kuyantika :

Beto zaba nde Yesu kele ngolo, kansi nki kele nsuka to limite ya ngolo na Yandi ? Yindula yo ntangu nge kuwa mambu yai zole ya Yesu salaka.

❖ Malungi ya nene ya lesu yai (developpement na banti 4 :

16.1 Mfumu ya basoda lombaka Yesu kubelula sielo na yandi, ata Yandi vandaka ntama ti sielo yina. Matayo 8 :5-8

❖ Tangila bana baverse yai :

8.5-6 *Ntangu Yesu kotaka na bwala Kapernaumi (sika Yandi vandaka kuzinga ntangu yina), mfumu mosi ya basoda...kwisaka na Yandi. Yandi bondilaka Yesu nde : « Mfumu, sielo na mono mosi kele na zulu ya mbeto na nzo...yandi ke mona mpasi mingi... »*

7 *Yesu tubilaka yandi nde : « Mono ke kwisa kubelula yandi. »*

8 *Mfumu yina nde : « Mfumu, mono me fwana ve na kuyamba Nge na nzo na mono. Kansi tuba...ebuna sielo na mono ta beluka. »*

? Yula bana

✗ Bana sala bageste to mwa-senete

✖ Bana yimba ti kina

16.2 Yesu vandaka na kiese na lukwikulu ya muntu yina. Yandi belulaka sielo yina mpila mfumu yina lombaka. Matayo 8 :10, 13

❖ Tangila bana baverse yai :

10 *Bu Yesu waka kutuba na yandi, Yandi yitukaka. Yandi...nde « Mono ke songa beno mambu ya kieleka. Mono me mona lukwikulu bonso yai ntete ve, ata na bantu ya Israele. »*

13 *Ebuna Yesu songaka mfumu ya basoda nde : « Vutuka na nzo. Bika yo kusalama na nge mpila ya nge me kwikila. » Kaka na ntangu yina, sielo ya mfumu yina belukaka.*

? Yula bana

✗ Bana sala bageste to mwa-senete

✖ Bana yimba ti kina

16.3 Yesu ti balonguki kwendaka na bwala Naini. Ntangu bo kumaka penepene, bo kutaka bantu ya kudila bakala mosi ya me fwaka. Yandi vandaka mwana mosi kaka ya mama na yandi. Luka 7 :11-12

❖ Tangila bana baverse yai :

Luka 7 :11 ...Yesu kwendaka na bwala...Naini. Balonguki na Yandi ti bantu mingi ya nkaka kwendaka ti Yandi.

12 Ntangu Yandi kumaka penepene...Yandi monaka bantu ke kwisa kunata muntu ya kufwa na maziamu. Mama ya mwana yina vandaka mufwidi, ti yandi vandaka na mwana mosi kaka ya bakala, yandi yina ya fwaka.

? Yula bana

✗ Bana sala bageste to mwa-senete

✖ Bana yimba ti kina

16.4 Yesu songaka bakala yina kutelama, ti moyo na yandi yutukaka. Yandi yantikaka kutuba. Yo yina nsangu ya Yesu mwanganaka na bisika mingi. Luka 7 :13-17

 **Tangila bana baverse yai :**

13-14 *Ntangu Mfumu Yesu monaka yandi, Yandi wilaka yandi mawa... Yesu kwendaka penepene na sanduku... Yandi simbaka yo... Yesu nde : "...Mono ke songa nge: telama ka nge!"*

15 *Muntu yango telamaka na sanduku na yandi. Yandi yantikaka kutuba. Ebuna Yesu vutulaka yandi na mama na yandi.*

16 *Boma simbaka bantu yina yonso. Bo vandaka kupesa Nzambi lukumu nde : ...Nzambi me kwisa kusadisa bantu na Yandi !"*

17 *Mambu yai...yo wakanaka na (bisika mingi).*

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Bana, nki beno mona ? Nki kele nsuka ya ngolo ya Yesu ? Nki kele limite na Yandi ? Yandi belulaka bantu, ata bo vandaka ntama ti Yandi, kaka na ndinga na Yandi. Yandi tedimisaka muntu ya lufwa yina vandaka dezia na nzila kukwenda na maziamu sambu bo zika yandi. Kaka na ndinga na Yandi.

Kieleka, mono ke mona nde ngolo ya Yesu kele na nsuka ve, limite ve. Yandi kele kieleka Mwana ya Nzambi ti Nzambi kibeni. O, bana, beto tula Yandi ntima !

 **Devoir sambu na bakristo :**

Bana bakristo, nki kele mambu ya ngolo mingi, ya mpasi mingi na luzingu na nge ? Yesu kele na ngolo yonso. Keti beno ta tula Yandi ntima mposo yai sambu Yandi sadisa beno na mambu yina ?

 **Verse ya Kulonguka :**

« ...Nzambi me kwisa kusadisa bantu na Yandi ! »
Luka 7 :16b

 **Bankunga ya kwenda nzila mosi ti lesò :**

Nzambi Ta Kuwa Nge
Yesu Ikele Awa

 **Invitatio sambu na bo yina me yamba Yesu ntete ve :**

Beto me wa mpila Yesu tedimisaka muntu ya lufwa. Kansi Bible ke songa beto nde, tii ntangu beto ndima Yesu Kristo, beto yonso kele ya kufwa na mambu ya kimpeve (Efezo 2 :1).

Yesu tedimisaka nitu ya muntu ya lufwa ya nitu. Kiteso mosi, Yandi lenda tedimisa bantu ya kufwa ya kimpeve. Yandi lenda pesa beto moyo ya mpa, moyo na Yandi, moyo ya kimpeve.

Kana nge ta bika nzila ya masumu ti kwisa na Yandi bubuyai na lukwikilu, Yandi me sila nde Yandi ta buya nge ve (Yoane 6 :37).

Kana nge me kwisa na Yandi dezia, zaba nde Yandi pesaka nge moyo ntangu yina. Kansi kana nge me kwisa na Yandi ntete ve, nki ke kanga nge nzila kubalula ntima bubuyai ?

Kana nge kele na nzala yina, bikala na nima ya ecodim sambu beto solula mbote ti nge.

NSUKA YA LESO 16

 **Kana ntangu lunga, longa ndambu mikanda ya Bible. Bangindu kele na nsuka ya mukanda yai.**



Leso 16

Leso 16

« ...Nzambi me
kwisa kusadisa
bantu na
Yandi ! »



Luka 7:16b

Leso 17. Yoane sosaka kuzikisa kana kieleka Yesu vandaka Mesia.

Matayo 11 :1-6, Luka 7 :18-23

I. PREPARATIO SAMBU NA MONITEUR-

◎ Kikuma ya Leso :

Ata na ntangu ya kiese to ya mpasi, beto tula Yesu ntima, sambu beto bakisa nde Yandi kele Mesia.

♥ Verse ya Kulonguka :

(Yesu ke tuba) *Mono me songa beno mambu yina yonso sambu beno kuvanda na ngemba. Beno ta mona mpasi awa na nsi-ntoto. Kansi beno vanda na kiese ! Mono me nunga nsi-ntoto yai.*

Jean 16 :33

♣ Bankunga ya kwenda nzila mosi ti lesò :

Mono Me Sila Kulanda Yesu (verse 3, Ata Mpasi Ikele, Mo' Ta Landa Kaka)
Mwana Yina Nani ?

II. REVISIO

↑ Kuyindula diaka baleso me luta :

Na mposo me luta, beto monaka ndambu ya mpila Yesu belulaka bantu ya maladi. Yandi tedimisaka ata bantu ya kufwa ! Ngolo na Yandi kele na nsuka ve.

III. KULONGA LESO YAI

➔ Kuyantika :

Yoane, yina botikaka Yesu, waka mpila Yesu vandaka kusala bimpa. Yoane vandaka kumona mpasi ntangu yina. Mfumu ya ntoto zolaka ve malongi na yandi, yo yina, yandi me tula Yoane na boloko. Mpasi ! Ntangu Yesu yantikaka kisalu na Yandi, Yoane songaka bantu nde Yesu vandaka Mwana-Dimeme ya Nzambi, yina vandaka kukatula masumu ya bantu yonso. Kansi ntangu yai, Yoane vandaka kumona mpasi na boloko. Yandi sosaka kuzikisa diaka nde kieleka Yesu vandaka Mesia.

❖ Malongi ya nene ya lesò yai (developpement) na banti 4 :

17. 1 Na kati ya boloko, Yoane wakaka mpila Yesu vandaka kusala bimpa. Ebuna, yandi tindaka balandi zole na yandi kuyula Yesu keti Yandi vandaka kieleka Mesia. Matayo 11 :2-3

BOOK Tangila bana baverse yai :

Matayo 11 :2-3 *Ntangu Yoane-Baptiste vandaka na boloko, yandi waka bantu ke tuba sambu na bisalu ya Kristo (Mesia) vandaka kusala, yo yina yandi tindaka balonguki na yandi kuyula Yesu nde : « Keti Nge kele Mesia ya fweti kwisa, to beto vingila muntu ya nkaka ?*

? Yula bana

↗ Bana sala bageste to mwa-senete

↘ Bana yimba ti kina

17.2 Kaka ntangu yina, Yandi belulaka bantu mingi. Luka 7 :21

BOOK Tangila bana baverse yai :

Luka 7 :21 *Na ntangu yo yina kaka, Yesu belulaka bantu mingi yina vandaka na maladi, na mpasi, na bampeve ya mbi. Yandi vandaka kumonisa mpi bantu mingi ya kufwa-meso.*

? Yula bana

↗ Bana sala bageste to mwa-senete

↘ Bana yimba ti kina

17. 3 Yesu vutudilaka balonguki ya Yoane nde bo songa Yoane mpila bo ke mona bimpa ya Yandi me sala ti mpila Yandi ke samuna nsangu ya mbote na bansukami. Bisalu ti malongi na Yandi ke songa nde Yandi kele Mesia. Matayo 11 :4-5

BOOK Tangila bana baverse yai :

Matayo 11 :4 Yesu vutudilaka bo nde : « Beno kwenda kuzabisa Yoane mambu yai ya beno ke wa ti ya beno ke mona :

5 Bantu ya kufwa-meso ke mona diaka. Bantu ke na makulu ya kifu ke tambula. Bantu ke na maladi ya lepre ke beluka. Bantu ya kufwa-makutu ke wa. Bantu yina me fwa ke telama na

lufwa. Bansukami ke wa Nsangu ya Mbote.

?

Yula bana

Bana sala bageste to mwa-senete

Bana yimba ti kina

17.4 Profete Yezaya tubaka nde bantu ya nkaka ta mona offense sambu na Mesia (Yezaya 8 :14). Yesu tubaka nde kiese na bo ya mona offense na Yandi ve. Matayo 11 :6

Matayo 11:6 Kiese na muntu yina ke na ntima zole ve sambu na Mono !”

?

Yula bana

Bana sala bageste to mwa-senete

Bana yimba ti kina

>|< **Kumanisa Malongi :**

Yoane zabaka nde Yesu vandaka Mesia, kansi na mpasi ya boloko, yandi yantikaka kumona ndambu keti-keti. Yandi tindaka balonguki na yandi kuzikisa, ti Yesu songaka bo nde kele Yandi vandaka Mesia. Bisalu ti malongi na Yandi yonso songaka yo pwelele. Beto bakristo lenda yula bangiufula, kansi beto losa lukwikelu na beto ve, ata na konso mpasi ya ntoto yai.

Devoir sambu na bakristo :

Beno bakristo, na konso mpasi ya beno ta mona na mposo yai, bambuka kutula Yesu ntima.

Verse ya Kulonguka :

(Yesu ke tuba) Mono me songa beno mambu yina yonso sambu beno kuvanda na ngemba. Beno ta mona mpasi awa na nsi-ntoto. Kansi beno vanda na kiese ! Mono me nunga nsi-ntoto yai.

Jean 16 :33

Bankunga ya kwenda nzila mosi ti lesò :

Mono Me Sila Kulanda Yesu (verse 3, Ata Mpasi Iklele, Mo' Ta Landa Kaka)
Mwana Yina Nani ?

Invitatio sambu na bo yina me yamba Yesu ntete ve :

Beto me tuba nde bakristo kulosa lukwikelu na bo ve. Kansi nge, keti nge kele na lukwikelu ? Keti

nge me bakisa nde mambu ya mbi ya nge me sala me fwa kinduku na nge ti Nzambi ? Keti nge me balula ntima, me yamba Yesu Kristo bonso Mvulusi ti Mfumu na nge ? Keti nge me kota nzila ya Yesu ? Keti nge me kuna madesu na nge na kilanga ya Yesu ? Kana ve, keti nge me yilama na ntima kuyamba Yandi bubuyai ? Konso mposo, beto kele awa na nima ya ecodim, kana muntu ke na mfunu ya lusadisu na mambu ya kubalula ntima.

NSUKA YA LESO 17

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.



Bu Yoane vandaka na boloko, yandi tindaka balonguki na yandi zole kuyula Yesu keti kieleka Yandi vandaka Mesia. Yesu vutudilaka yandi nde bisalu na Yandi songaka pwelele nde ee, Yandi Mesia.

Mono me songa
beno mambu yina
yonso sambu beno
kuvanda na ngemba.
Beno ta mona mpasi
awa na nsi-ntoto.
Kansi beno vanda na
kiese ! Mono me
nunga nsi-ntoto yai.

Jean 16 :33

Leso 18. Yesu nganinaka babwala ya buyaka kabalula ntima, kansi Yandi yambaka bo ya kwisaka na Yandi.

Matayo 11 :20-30

I. PREPARATIO SAMBU NA MONITEUR-

◎ Kikuma ya Leso :

Beto zaba nde mpasi na mpasi ke kwisila bo yina buya kabalula ntima, kansi Yesu ke yambaka konso muntu ya kwisa na Yandi.

♥ Verse ya Kulonguka :

(Yesu nde) « Beno kwisa na Mono, beno yonso bantu yina me lemba, sambu beno ke nata kilo ya nene, ebuna Mono ta pesa beno ntangu ya kupema. » Matayo 11 :28

↖ Bankunga ya kwenda nzila mosi ti lesò :

Kizitu Yonso
Kwisa na Yesu Kristo

II. REVISIO

↑ Kuyindula diaka baleso me luta :

Na mposo me luta, beto monaka nde Yoane yina pesaka Yesu mbotika, yandi monaka mpasi. Bo tulaka yandi na boloko. Yandi tindaka balonguki zole na yandi na Yesu kuyula keti Yandi vandaka Mesia, to bo kinga muntu ya nkaka. Yesu songaka bo nde bimpa ya Yandi salaka, yo songaka pwelele nde Yandi vandaka Mesia.

III. KULONGA LESO YAI

→ Kuyantika :

Kansi bantu yonso ndimaka ve nde Yesu vandaka Mesia, Mvulusi. Yesu salaka bimpa ya nene na babwala ya nkaka, kansi bantu kuna balulaka ntima ve. O, mawa na bo !

⇒ Malungi ya nene ya lesò yai (developpement) na banti 3 :

18.1 Yesu yantikaka kunganina babwala sika Yandi salaka bimpa mingi ya nene, sambu bantu kuna balulaka ntima ve. Matayo 11 :20

BOOK Tangila bana baverse yai :

20 *Ntangu yai, Yesu yantikaka kunganina bantu vandaka na babwala sika ya Yandi salaka bimpa mingi ya kuyituka, sambu bo balulaka ntima ve.*

? Yula bana

↗ Bana sala bageste to mwa-senete

↖ Bana yimba ti kina

18.2 Yesu monaka mawa sambu na babwala ya nkaka sambu ndola na bo ta vanda mingi na kilumbu ya Nzambi ta sambisa bantu. Matayo 11 :21-24

BOOK Tangila bana baverse yai :

21 *Yandi nde :« Mawa na beno, bantu ya bwala Korazini ! Mawa na beno bantu ya bwala Betsaida ! Sambu bidimbu yina ya beno monaka, kana bantu ya babwala (ya nkaka) monaka yo, nga ntama bo zolaka kulwata basaki, bo zolaka...kabalula ntima.*

22 *Kansi Mono ke tubila beno nde, na kilumbu yina ya Nzambi ta sambisa bantu, ndola ya bantu ya babwala (yai ya nkaka) ta vanda fioti, kansi ndola ya beno ta vanda mingi.*

23 *Ebuna beno bantu ya bwala Kapernaumi, beno ke banza nde Nzambi ta tombula beno tii na zulu ? Ve, Yandi ta losa beno na bilungi ! Sambu, bidimbu yina ya beno monaka na bwala na beno, kana bantu ya bwala Sodome monaka yo, nga bwala yina zolaka kuvanda tii bubu yai ! [NB : Sodome vandaka bwala ya Nzambi fwaka sambu na mbi na bo. Beto tangaka histoire yina na Kuyantika 19.]*

24 *Kansi Mono ke tubila beno nde, na kilumbu ya Nzambi ta sambisa bantu, ndola ya bantu ya bwala Sodome ta vanda fioti, kansi ndola ya beno ta vanda mingi ! »*

? Yula bana

↗ Bana sala bageste to mwa-senete

↖ Bana yimba ti kina

18.3 Yesu bingaka bantu yonso yina ke mona kizitu ya masumu, bo kwisa na Yandi Matayo 11 :28-30

BOOK Tangila bana baverse yai :

28 « *Beno kwisa na Mono, beno yonso bantu*

yina me lemba, sambu beno ke nata kilo ya nene. Ebuna Mono ta pesa beno mpila ya kupema.

29 Beno kangama kutambula nzila mosi ti Mono, beno kuma balonguki na Mono, sambu Mono kele Muntu ya pima ti kudikulumusa. Mpidina beno ta mona mpila ya kupema. Kukangama kutambula nzila mosi ti Mono kele mpasi ve. Kilo ya Mono ta pesa beno kunata, yo kele kizitu ve.

? Yula bana

Bana sala bageste to mwa-senete

Bana yimba ti kina

>|< **Kumanisa Malongi :**

Bantu waka malongi ya Yesu na bisika mingi. Bantu mingi monaka bimpa ya yituka ya Yandi salaka. Ya nkaka buyaka Yandi, bo kwendaka ka bo. Mawa na bo ! Yesu tubaka nde ndola na bo ta vanda ya ngolo.

Kansi Yesu zolaka ve nde bantu kubaka ndola. Yandi bingaka bantu kukwisa na Yandi. Yandi zabaka nde bo vandaka kunata kizitu ya masaumu. Yandi zolaka kukatula yo, kuyamba bo. Kana bo ta landa Yandi, Yandi ta pesa bo mpila ya kupema.

Devoir sambu na bakristo :

Bana bakristo, mbote beto samba mingi nde bantu ya ke wa nsangu ya Yesu na bwala na beto, bo yamba yo ti bo yamba Yesu. Mpidina, kiese ta vanda na bo na lumbu ya Nzambi ta sambisa bantu. Keti nge ta samba sambu na bo na mposo yai ?

Verse ya Kulonguka :

(Yesu nde) « Beno kwisa na Mono, beno yonso bantu yina me lemba, sambu beno ke nata kilo ya nene, ebuna Mono ta pesa beno ntangu ya kupema. » Matayo 11 :28

Bankunga ya kwenda nzila mosi ti lesò :

Kizitu Yonso

Kwisa na Yesu Kristo

Invitatio sambu na bo yina me yamba Yesu ntete ve :

Nge mpi me waka ndinga ya Nzambi mingi. Nge ke wa yo bubuyai na ecodim. Keti nge kele na katì ya bantu ya yambaka Yesu, to na katì ya bantu ya monaka bimpa na Yandi, kansi bo landaka Yandi ve ? Kana Yesu tala nge bubu, keti Yandi ke tuba ‘kiese’ to ‘mawa’?

Kana nge kele na katì ya bantu ya mawa, bantu ya me yamba Yesu ntete ve, mambu ya kiese ikele yai : Tii bubu, Nzambi me kanga kielo ntete ve. Tii bubu, Yesu kele kutuba nde, “Balula ntima. Kwisa na Mono.”

Keti nge me wa ndinga ya Yesu bubu na ntima na nge ? Kwisa na Yandi bubuyai. Yandi ta pesa nge moyo ya ta suka ve.

NSUKA YA LESO 18

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 18

**Yesu nganinaka bantu ya babwala ya
ndimaka Yandi ve.**



« Beno kwisa na Mono,
beno yonso bantu yina me
lemba, sambu beno ke nata
kilo ya nene,
ebuna Mono ta pesa beno
ntangu ya kupema. »

Matayo 11 :28

Leso 19. Nkento ya masumu pakulaka makulu ya Yesu mafuta.

Luka 7 :36-48

I. PREPARATIO SAMBU NA MONITEUR-

◎ Kikuma ya Leso :

Beto bakwikidi songa luzolo na beto na Yesu na ntima ya lutondo sambu Yesu me lolula masumu yonso na beto.

♥ Verse ya Kulonguka :

Beto zola sambu Yandi zolaka beto ntete.

1 Yoane 4 :19

☛ Nkunga ya kwenda nzila mosi ti lesò :

Mono Zola Yesu Ngulusi

II. REVISIO

↑ Kuyindula diaka baleso me luta :

Na mposo me luta, beto me mona mpila Yesu nganinaka bantu ya balulaka ntima ve ntangu bo monaka bimpa na Yandi, ti mpila Yandi waka kiese na bo ya yambaka Yandi. Mposo yai beto ta mona mbandu ya muntu mosi ya yambaka Yandi, ti mpila yandi songaka kiese na yandi.

III. KULONGA LESO YAI

➔ Kuyantika :

Kana nge zola muntu mingi, nki mutindu nge lenda songa yo ? [Moniteur, kuwa mabanza ya bana ndambu.]

❖ Malungi ya nene ya lesò yai (developpement) na banti 4 :

19.1 Bu Yesu vandaka kudia na nzo ya Farize mosi, nkento ya masumu kotaka kudila. Yandi vandaka kudipa makulu ya Yesu na nsuki na yandi, kupesa Yandi beze na makulu, ti kupakula makulu na Yandi mafuta ya nsudi ya kitoko. Luka 7 :36-38

❖ Tangila bana baverse yai :

36 Mufarize mosi bingaka Yesu na kwisa kudia na nzo na yandi. Yesu kwisaka kuna, ebuna Yandi vandaka na mesa sambu na kudia.

37 Na bwala yina, kuvandaka nkento mosi ya bantu vandaka kuzaba bonso muntu ya masumu. Ntangu yandi waka nde Yesu ke dia na nzo ya Mufarize yina, yandi nataka mulangi mosi ya bo salaka na ditadi ya kitoko... Mulangi yina vandaka kufuluka na mafuta ya nsudi ya kitoko....

38 Yandi telamaka na makulu ya Yesu, kudila. Mansanga na yandi vandaka kubwa na makulu ya Yesu. Yandi dipaka makulu ya Yesu na nsuki na yandi, yandi pesaka yo beze ti pakulaka yo mananasi.

? Yula bana

↗ Bana sala bageste to mwa-senete

☛ Bana yimba ti kina

19.2 Farize yina vandaka kubokuta sambu Yesu buyaka nkento yina ve, sambu yandi muntu ya masumu. Luka 7 :39

❖ Tangila bana baverse yai :

Mufarize yina bingaka Yesu, ntangu yandi monaka mambu yina. Yandi yantikaka kutuba na ntima nde : « Kana ya kieleka Muntu yai vandaka profete, yandi zolaka kuzaba nde nkento yai kele muntu ya masumu ! »

? Yula bana

↗ Bana sala bageste to mwa-senete

☛ Bana yimba ti kina

19.3 Yesu songaka Farize kingana kusonga nde bantu ya Nzambi me lolula mingi, bo mpi zola Yandi mingi. Luka 7 :41-43, 47

❖ Tangila bana baverse yai :

41 Ebuna Yesu tubilaka mufarize yina kingana yai : « Kuvandaka bantu zole. Bo vandaka na mfuka ya muntu mosi...Muntu ya ntete defaka bibende nkama tanu. Ya zole defaka makumu tanu.

42 Bo vandaka na mbongo ve ya kufuta mfuka yina. Yo yina, muntu ya defisaka bo mbongo, yandi katulaka bo yonso zole mfuka yina. Na kati na bo, nani ta zola yandi ya kuluta ?

43 Mufarize nde : ‘Mono banza nde muntu ta zola yandi mingi kele muntu yina defaka

mbongo mingi. » Yesu nde, « Nge me tuba mbote. »

47 ...Mono ke tubila nge nde kuzola yina ya nene ya yandi me songa, yo ke songa nde Nzambi me lolula yandi, ata yandi salaka masumu mingi. Kansi muntu ya salaka masumu mingi ve, kana Nzambi lolula yandi, yandi ta songa kuzola mingi mpi ve.

? **Yula bana**

⤓ **Bana sala bageste to mwa-senete**

⤒ **Bana yimba ti kina**

19.4 Yesu songaka nkento yina nde Yandi me lolula masumu na yandi Luka 7 :48

⠀ **Tangila bana baverse yai :**

48 Ntangu yai, Yesu tubilaka nkento yango nde : « Nzambi me lolula nge. »

? **Yula bana**

⤓ **Bana sala bageste to mwa-senete**

⤒ **Bana yimba ti kina**

>|< Kumanisa Malongi :

Nkento ya me sala masumu mingi kwisaka kupakula makulu ya Yesu. Yandi salaka yo sambu na kusonga nde yandi zolaka Yesu mingi. Yandi zolaka Yesu mingi sambu Yesu me lolula yandi masumu mingi.

♥ **Verse ya Kulonuka :**

Beto zola sambu Yandi zolaka beto ntete.

I Yoane 4 :19

⤒ **Nkunga ya kwenda nzila mosi ti lesos :**

Mono Zola Yesu Ngulusi

⤕ **Devoir sambu na bakristo :**

Kana nge me balula ntima, me tula kivuvu na Yesu Kristo, Yesu me lolula nge masumu na nge yonso. Mbote nge kuvanda na ntima ya lutondo. Mbote nge sosa nki mutindu kusonga Yandi luzolo. Beto zaba nde beto songa luzolo ntete na mpila beto lemfuka na Yesu. Beto mpi songa luzolo na mpila beto samba, ti na mpila beto sadila Yandi na kiese. Na mposo yai, sosa nki mpila nge lenda songa Yesu nde nge ke zola Yandi.


✚ Invitatio sambu na bo yina me yamba Yesu ntete ve :

Kana nge me balula ntima ntete ve, yai ke songa nde Nzambi me lolula nge ntete ve. Nge me kuma mwana ya Nzambi ntete ve. Kansi vanda na mawa ve. Nzambi tindaka Mwana na Yandi Yesu Kristo na ntoto yai sambu na kugulusa beto, bantu ya mbi. Yesu fwaka na zulu ya kulunsi bonso makabu na kubaka ndola yonso ya masumu na nge.

Bubuyai, kana nge mona mpasi sambu na mambi ya nge me sala, nge lenda balula ntima ti kwisa na Yandi. Ata masumu na nge vanda mingi to ndambu, Yandi ta lolula nge yonso. Kana nge zaba mbote-mbote ntete ve nde nge me kwisa na Yandi, nge lenda zenga mambu yina bubuyai.

NSUKA YA LESO 19

⠀ **Kana ntangu lunga, longa ndambu mikanda ya Bible. Bangindu kele na nsuka ya mukanda yai.**





Leso 19

**Beto zola sambu
Yandi zolaka
beto ntete.**

1 Yoane 4 :19

Leso 20. Bantu monaka bimpa ya Yesu mutindu na mutindu.

Luka 8 :1-3, Matayo 12 :22-24

I. PREPARATIO SAMBU NA MONITEUR-

⦿ Kikuma ya Leso :

Beto yamba malongi ya Nzambi na lukwikelu ti na kiese. Yo benda beto kulanda Yandi, kusadila Yandi.

♥ Verse ya Kulonguka :

*Kana muntu sadila Mono, bika yandi landa
Mono...kana muntu sadila Mono, Tata ta zitisa
yandi. Yoane 12 :26*

⦿ Bankunga ya kwenda nzila mosi ti lesò :

Ee, Mfumu, Ee
Kana Nge Zaba Nge Me Vuluswa

II. REVISIO

↑ Kuyindula diaka baleso me luta :

Na mposo me luta, beto monaka nki nkento mosi salaka na nima Yesu lolulaka masumu mingi na yandi. Yandi salaka nki ?
(Yandi pakulaka makulu ya Yesu mafuta ya nsudi ya mbote, ya ntalu mingi, kaka kusonga luzolo ti lutondo.)

III. KULONGA LESO YAI

➔ Kuyantika :

Bubuyai beto ta mona mvutu ya bantu ya nkaka ntangu bo monaka bisalu ya mbote ya Yandi salaka.

❖ Malongi ya nene ya lesò yai (developpement) na banti 4 :

20.1 Yesu ti balonguki na Yandi salaka bimpa mingi, bwala na bwala. Yo yina, ndambu bankento landaka Yandi na nima Yandi belulaka bo. Bo sadisaka Yandi na bima ya bo vandaka na yo. Luke 8 :1-3

❖ Tangila bana baverse yai :

*Luke 8 :1 Ntangu yai, Yesu kwendaka kutambula na babwala ya nene ti ya fioti.
Yandi vandaka kulonga Nsangu ya Mbote ya*

Kimfumu ya Nzambi. Balonguki na Yandi kumi na zole kwendaka ti Yandi.

2 Bankento ya nkaka yina belukaka na bampeve ya mbi ti na maladi kwendaka ti Yandi mpi. Bo vandaka Maria ya bwala Magdala, yina ya Yesu basisaka bampeve ya mbi nsambwadi na yandi,

3 Yoana nkento ya Kuza,...Suzana, ti mingi ya nkaka ya vandaka kusadila bima na bo sambu na kusadisa Yesu.

? Yula bana

⤓ Bana sala bageste to mwa-senete

⤓ Bana yimba ti kina

20.2 Yesu belulaka muntu yina vandaka na maladi ya mpeve ya mpi me pesa yandi. Muntu yina yantikaka kumona ti kutuba.

❖ Tangila bana baverse yai :

Matayo 12 :22 Ntangu yai, bo kwisaka kunatila Yesu baba mosi. Meso na yandi mpi vandaka ya kufwa. Yandi vandaka mpidina sambu yandi vandaka na mpeve ya mbi. Yesu belulaka muntu yango, ebuna yandi yantikaka kutuba ti kumona.

? Yula bana

⤓ Bana sala bageste to mwa-senete

⤓ Bana yimba ti kina

20.3 Bantu mingi yitukaka ti yulanaka bo na bo nde, “Yai kele Mesia, mpidina?” Matayo 12 :23

❖ Tangila bana baverse yai :

23 Bantu mingi vandaka kuyituka. Bo vandaka kuyulana bo na bo nde : “Yai kele Mesia, mpidina ?”

? Yula bana

⤓ Bana sala bageste to mwa-senete

⤓ Bana yimba ti kina

20.4 Kansi Bafarize buyaka. Bo nde Yesu vandaka kubasisa bampeve ya mbi na ngolo ya Belezebule, mfumu na bampeve ya mbi. Matayo 12 :24

 **Tangila bana baverse yai :**

24 Kansi ntangu Bafarize waka mambu yina,
bo tubaka nde : « Muntu yai ke basisa bampeve
ya mbi kaka na ngolo ya mfumu na bampeve ya
mbi Belezebule. »

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Bantu yai yonso monaka bimpa ya Yesu salaka.
Kansi mvutu na bo vandaka kiteso mosi ve. 1.
Bankento mingi landaka Yandi, ti bo sadisaka
Yandi mpi na bima ya bo vandaka na yo—ata
mbongo, ata madia.

2. Bantu ya nkaka yitukaka ti yulakanaka bo na bo
keti Yesu lenda vanda Mesia. 3. Bantu ya nkaka
buyaka Yandi ti tubaka nde Yandi salaka na ngolo
ya Satana.

Nki nge ke sala na malongi ya nge ke waka sambu
na Yesu ?

 **Devoir sambu na bakristo :**

Beno bakristo, beno me yamba ndinga ya Nzambi.
Beno me yamba Yesu Kristo bonso Mvulusi ti
Mfumu na beno. Keti beno mpi ta sadisa kisalu na
Yandi bonso Maria ti Yoana ti Susanna ? Nki
mutindu beno lenda sadisa kisalu ya Yesu ? Nki
beno banza ?

[Moniteur, bana lenda tuba bima bonso kupesa makabu,
kusambilia bapasteur Nzambi, kukomba Nzo-Nzambi, kunatila
bintuntu sambu na kutula Nzo-Nzambi kitoko, kupesa pasteur
orange to nguba to ndinga ya enkurazema, etc.]

 **Verse ya Kulonguka :**

*Kana muntu sadila Mono, bika yandi landa
Mono...kana muntu sadila Mono, Tata ta zitisa
yandi. Yoane 12 :26*

 **Bankunga ya kwenda nzila mosi ti lesò :**

Ee, Mfumu, Ee
Kana Nge Zaba Nge Me Vuluswa

 **Invitatio sambu na bo yina me yamba Yesu
ntete ve :**

Kestio ya nene-nene kele, keti nge me yamba Yesu
bonso Mvulusi na nge. Zaba nde, kana nge yamba

Yandi ve, kele kiteso mosi bonso kubuya Yandi.
Nge kele ve mukristo kaka sambu nge kwisa na
ecodim, to kaka sambu papa ti mama kele bakristo.
Konso muntu fweti zenga yandi mosi Yesu kele
nani. Konso muntu fweti zenga yandi mosi kana
yandi ta balula ntima ti landa Yesu, to ve.

Kana nge ke zaba ve kana nge me yamba Yesu,
bakisa nde nge lenda balula ntima bubuyai. Yesu
fwaka na zulu ya kulunsi, ti Yandi telemaka na
lufwa, yonso sambu na kupesa nge moyo. Kana
nge me yamba Yandi ntete ve, ntangu ya mbote, yo
yai.

NSUKA YA LESO 20

 Kana ntangu lunga, longa ndambu mikanda ya
Bible. Bangindu kele na nsuka ya mukanda yai.



Leso 20

Bankento ya nkaka
yambaka malongi ya
Yesu ti landaka
Yandi. Bantu ya
nkaka mpi buyaka
Yandi.

Keti nge bambuka banzina ya ndambu bankento yina landaka Yesu ?

Leso 28

Kana muntu
sadila Mono,
bika yandi landa
Mono...kana
muntu sadila
Mono, Tata ta
zitisa yandi.

Yoane 12 :26

Leso 21. Bampangi ya Yesu ti Bafarize yindulaka nde Yesu me lauka to Yandi vandaka na mpeve ya mbi.

Marko 3 :20-30

I. PREPARATIO SAMBU NA MONITEUR-

◎ Kikuma ya Leso :

Beto yindula mbote-mbote Yesu kele nani.

♥ Verse ya Kulonguka :

Konso muntu yina ndima Mwana ya Nzambi kele na moyo ya mvula na mvula, kansi konso muntu yina lemukila Yandi ve, yandi ta mona moyo ve, kansi makasi ya Nzambi ke bikala na zulu na yandi.
Yoane 3 :36

♣ Bankunga ya kwenda nzila mosi ti lesò :

Kielo Kaka Mosi
Mono Kele na Nzo Kitoko
Yesu Ke Nzila

II. REVISIO

Kuyindula diaka baleso me luta :

↑ Beto me mona mpila Yesu kutaka muntu ya vandaka kumona ve ti kutuba ve, yonso sambu mpeve ya mbi me kanga yandi. Yesu belulaka muntu yina ti basisaka mpeve ya mbi yina, kansi Bafarize tubaka nde Yandi me sala yo na ngolo ya Satana.

III. KULONGA LESO YAI

➔ Kuyantika :

Bubuyai, beto ta mona nde kaka bo mpamba ve vandaka kuyindula mabanza ya mbi sambu na Yesu. Ti beto ta mona nki mvutu Yesu pesaka na bantu ya buyaka Yandi.

🕸 Malungi ya nene ya lesò yai (developpement) na banti 4 :

21.1 Bantu mingi landaka Yesu ti pusanaka penepene na Yandi. Mark 3 :20

BOOK Tangila bana baverse yai :

20 Yesu kotaka na nzo, ti bantu mingi kwisaka

kufuluka diaka, na mpila nde bo monaka ve mpila ata ya kudia.

? Yula bana

↗ Bana sala bageste to mwa-senete

↖ Bana yimba ti kina

21.2 Bampangi ya Yesu yindulaka nde Yandi me lauka. Yo yina bo kwendaka na Yandi na mabanza kukanga Yandi. Mark 3 :21

BOOK Tangila bana baverse yai :

21 Ntangu bampangi ya Yandi waka yo, bo kwendaka sambu na kusimba Yandi, sambu bo tubaka nde Yandi me lauka.

? Yula bana

↗ Bana sala bageste to mwa-senete

↖ Bana yimba ti kina

21.3 Balungi ya bansiku tubaka mpi nde Yandi vandaka kusala na ngolo ya Satana. Mark 3 :22

BOOK Tangila bana baverse yai :

22 Ti Balungi ya Bansiku yina me katuka na Yeruzalemi tubaka nde Yandi vandaka na mpeve ya mbi Beelzebule, ti Yandi ke basisa bampeve ya mbi na ngolo na yandi.

? Yula bana

↗ Bana sala bageste to mwa-senete

↖ Bana yimba ti kina

21.4 Yesu tubaka nde Satana lenda nwanisa yandi mosi Satana ve. Kutuba na bo vandaka kuvwenza Mpeve ya Nzambi—masumu ya nene-nene. Mark 3 :23-30

BOOK Tangila bana baverse yai :

23 Na nima Yesu bingaka bo, Yandi tubaka na bo na bingana, kuyula nde 'Nki mutindu Satana lenda basisa Satana ?

24 Kana bantu ya kimfumu mosi ke nwana bo na bo, kimfumu yina lenda zinga diaka ve.

26 Ti kana nwanisaka yandi mosi Satana, yandi ke kabanaka, ti yandi ta telama ve, kansi yandi fweti kubwa.

29-29 Mono ke tubila beno...konso muntu yina

ta vwenza Mpeve ya Nzambi, Nzambi ta lolula yandi ve, kansi yandi kele kupable ya masumu ya ke konda nsuka. »

30 Sambu bo vandaka kutuba nde Yandi kele na mpeve ya mbi.

?

Yula bana

Bana sala bageste to mwa-senete

Bana yimba ti kina

>|< Kumanisa Malongi :

Beto me mona mpila bantu ya nkaka diaka monaka bimpa ya Yesu salaka. Bantu mingi fulukaka sambu na kumona bimpa yina. Nzala kumona mambu ya yituka fulusaka ntima na bo. Bafami ya Yesu monaka nde Yandi me lauka. Bo zolaka kukanga Yandi, kuvutula Yandi na nzo, mbala ya nkaka sambu Yandi kupesa fami nsoni ve. Balongi ya Bansiku ya Bayuda tubaka kiteso mosi na Bafarize. Bo tubaka nde Yesu vandaka kusala na ngolo ya Satana.

Yesu songaka bo nde ngindu yina, bo me yindula yo ve mbote-mbote. Nki mutindu Satana lenda katula Satana ? Nki mutindu Satana ta zola kubasisa mpeve na yandi mosi ? Mambu yina lenda salama ve !

Yesu songaka mpi nde bo yina tubaka nde Yandi vandaka na mpeve ya mbi, bo vandaka kusala masumu ya nene. Bo vandaka kuvwenza Nzambi. Yina vandaka masumu ya ngolo. Mambu ya nene !

Devoir sambu na bakristo :

Bana bakristo, beto yindula mbote-mbote nki beto ke tuba sambu na Yesu, nki mutindu beto ke yindula Yandi na ntima. Beto bakristo, beto zaba nde Yandi kele Mwana ya Nzambi kibeni. Yo yina, beto pesa Yandi lukumu lumbu na lumbu. Yandi ke lunga na yo.

♥ Verse ya Kulonguka :

Konso muntu yina ndima Mwana ya Nzambi kele na moyo ya mvula na mvula, kansi konso muntu yina lemrukila Yandi ve, yandi ta mona moyo ve, kansi makasi ya Nzambi ke bikala na zulu na yandi.

Yoane 3 :36

Bankunga ya kwenda nzila mosi ti lesò :

Kielo Kaka Mosi
Mono Kele na Nzo Kitoko
Yesu Ke Nzila

Invitatio sambu na bo yina me yamba Yesu ntete ve :

Kuzenga Yesu Kristo kele nani kele kestio me luta nene na luzingu na nge ya mvimba. Yo kele kestio ya mfunu mingi. Nge me wa mpila Yandi salaka bimpa. Yandi salaka yo nki mutindu ? Yandi vandaka nani ?

Yesu Yandi mosi tubaka nde Yandi vandaka Mwana ya Nzambi ke katuka na zulu. Yandi vandaka Mesia ya bantu me kinga bamvula mingi. Yandi bikisaka kintwadi na Yandi ti Tata na Yandi. Yandi kulumukaka awa na nsi-ntoto yai sambu na kugulusa beto. Yandi monaka mpasi sambu Yandi bakaka ndola ya masumu na beto na zulu na Yandi. Yandi telamaka na lufwa.

Yandi kele muntu ya luvunu ve. Kieleka Yandi kele Mwana ya Nzambi bonso Yandi tubaka. Yandi songaka bantu kubalula ntima ti kukwikila nsangu ya mbote. Keti nge zaba nde nge me balula ntima? Keti nge kele kutula Yandi ntima, kutambula na nzila na Yandi?

NSUKA YA LESO 21

Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 21

Bantu ya nkaka yambaka Yesu ve bonso Mesia—ata bampangi na Yandi ti balongi ya Bansiku.



Leso 20

Konso muntu yina ndima
Mwana ya Nzambi kele na
moyo ya mvula na mvula,
kansi konso muntu yina
lemfukila Yandi ve, yandi ta
mona moyo ve, kansi makasi
ya Nzambi ke bikala na zulu
na yandi.

Yoane 3 :36

Leso 22. Fami ya Yesu bo ya lemfuka na Nzambi.

Marko 3 :31-35

I. PREPARATIO SAMBU NA MONITEUR-

◎ Kikuma ya Leso :

Bana ta yindula kana kieleka bo ke landa Yesu, sambu bo zaba nde kaka bo yina sala mambu ya Yandi zola ke songa nde bo kele bakristo ya kieleka.

♥ Verse ya Kulonguka :

Sambu konso muntu yina sala mambu ya Nzambi ke zolaka, yandi muntu kele leki na Mono ya bakala to ya nkento, to mama na Mono. Marko 3 :35

↖ Bankunga ya kwenda nzila mosi ti leso :

Kana Beno Ke Zolaka Mono
Nani Ta Lemfuka ?

II. REVISIO

Kuyindula diaka baleso me luta :

➤ Na mposo me luta, beto monaka nde Baferize tubaka nde Yesu vandaka kusala bimpa na Yandi na ngolo ya Satana ! Masumu ya nene ! Nani diaka monaka nde Yesu me lauka ? (Ee, bampangi na Yandi. Bo landaka Yandi sambu bo vutula Yandi na nzo. Mbala ya nkaka bo monaka nde Yandi vandaka kupesa fami na bo nsoni na mpila Yandi vandaka kulonga.)

III. KULONGA LESO YAI

➔ Kuyantika :

Na Matayo 13 :55-56, beto mona nde Yesu vandaka na baleki ya babakala ti ya bankento. Yesu vandaka mbuta na kati ya fami, ti Nzambi vandaka Tata na Yandi, ata Yozefi sansaka na fami. Na nima ya lubutuku ya Yesu, Yozefi ti Maria butaka bana ya nkaka, bo mosi. Baleki ya Yesu ya babakala Yakobo ti Yozefi, Simoni ti Yudasi. Yudasi yai kele ve yina ya tekaka Yesu, kansi Yudasi, leki ya Yesu. Yandi vandaka na baleki ya bankento mpi.

Baleki ya Yesu ya bakala vandaka kulanda Yandi ti mama na Yandi, Maria. Yesu vandaka kulonga na kati ya nzo mosi, kansi bo kotaka ve. Bo bikalaka na nganda.

❖ Malongi ya nene ya leso yai (developpement) na banti 4 :

22.1 Fami ya Yesu telamaka na nganda ya sika Yandi vandaka kulonga. Bo vandaka kubinga Yandi kukwisa na bo. Bantu songaka Yandi mpila bo vandaka kubinga Yandi.

Marko 3 :31-32

❖ Tangila bana baverse yai :

31 *Ntangu yai, mama ya Yesu ti baleki na Yandi kwisaka kukuma na nzo sika ya Yesu vandaka. Bo telamaka na nganda, ebuna bo tindaka muntu kubinga Yandi.*

32 *Bantu mingi vandaka na kuziunga Yandi na balweka yonso. Ebuna bo songaka Yandi nde, « Pardo, mama na Nge ti baleki na Nge kele na nganda ya kusosa Nge. »*

? Yula bana

↖ Bana sala bageste to mwa-senete

↖ Bana yimba ti kina

22.2 Kansi Yesu kwendaka na bo ve. Yandi vutulaka kestio yai nde : “Mama na Mono ti baleki na Mono nani ? Marko 3 :33

❖ Tangila bana baverse yai :

33 « *Kansi Yandi vutulaka nde : « Mama na Mono, baleki na Mono banani ? »*

? Yula bana

↖ Bana sala bageste to mwa-senete

↖ Bana yimba ti kina

22.3 Yandi talaka bo yina vandaka na lweka na Yandi, ti Yandi tubaka nde bo yina waka ndinga ya Nzambi, bo mama ti baleki na Yandi ya kieleka. Marko 3 :34

❖ Tangila bana baverse yai :

34 *Ebuna Yandi talaka bantu yina vandaka kuziunga Yandi ndambu na ndambu. Yandi nde : « Tala ! Mama ti baleki na Mono, bo yai*

? Yula bana

↖ Bana sala bageste to mwa-senete

↖ Bana yimba ti kina

22.4 Yandi tubaka nde konso muntu yina sala mambu ya Nzambi ke zolaka, yandi muntu kele leki na Yandi, mama na Yandi. Marko 3 :35

Tangila bana baverse yai :

[Moniteur, yai kele verse ya kulonguka bubuyai.]

35 Sambu konso muntu ya sala mambu ya Nzambi ke zolaka, yandi muntu kele leki na Mono ya bakala to ya nkento, to mama na Mono.

Yula bana

Bana sala bageste to mwa-senete

Bana yimba ti kina

>|< Kumanisa Malongi :

Yesu zolaka fami na Yandi, kansi Yandi bakisaka nde fami ya kuluta mfunu kele yina ya kimpeve. Mama ti baleki vandaka ntete ve fami na Yandi ya kimpeve. (Beto zaba nde na nima Yandi telamaka na lufwa, mingi na bo kwikilaka. Ntangu yina bo kumaka fami na Yandi ya kimuntu ti ya kimpeve.)

Na kutuba ya Yesu, Yandi zolaka ve kubuya fami na Yandi, kansi kulonga nde mambu ya kuluta mfunu kele kulemfuka na Nzambi—kusala yina ya Yandi ke zolaka. Bantu mingi tuba nde bo kele bakristo, kansi Yesu ke sosa ve bantu ya kele bakristo kaka na munoko. Bo ya kwikila ya kieleka kele bo ya sala luzolo ya Nzambi.

Devoir sambu na bakristo :

Nge mukristo, keti nge ke sala luzolo ya Nzambi ? Ketin nge ke lemfuka na yina ya ndinga ya Nzambi ke longa nge ? Samba bubuyai nde Nzambi sadisa nge kulemfuka, kusala luzolo na Yandi.

Verse ya Kulonguka :

Sambu konso muntu yina sala mambu ya Nzambi ke zolaka, yandi muntu kele leki na Mono ya bakala to ya nkento, to mama na Mono. Marko 3 :35

Bankunga ya kwenda nzila mosi ti lesos :

Kana Beno Ke Zolaka Mono

Nani Ta Lemfuka ?

Invitatio sambu na bo yina me yamba Yesu ntete ve :

Kaka Yesu Kristo salaka luzolo ya Nzambi yonso. Kansi kana nge ke zola ve kulemfuka, kana nge ke sosa ve kusala yina ke pesa Yandi kiese, kestio Yesu ta yula nge, yo yai : Ketin ya kieleka nge me balula ntima ? Ketin ya kieleka nge me tula Yandi ntima ?

Kana muntu me yamba Yesu Kristo ya kieleka, Yesu ke changer ntima na Yandi. Muntu ya me kuma mukristo ta zola kulemfuka na Nzambi.

Kana nge lenda sala masumu ti yo pesa nge mpasi ve, yai lenda songa nde nge me kota fami ya Nzambi ntete ve.

Yindula yo mbote. Kana nge me yilama kubalula ntima, nge lenda binga zina na Yandi na konso sika nge kele. Beto kele awa konso mposo kusadisa bantu ya zola muntu kusamba ti bo na mambu yina.

NSUKA YA LESO 22

Kana ntangu lunga, longa ndambu mikanda ya Bible. Bangindu kele na nsuka ya mukanda yai.



Leso 22

**Mama ti baleki ya Yesu zolaka kubinga Yandi. Kansi Yesu tubaka nde bo ya kuwa ndinga na Yandi ti sala
luzolo ya Nzambi, bo fami na Yandi ya kieleka.**

Sambu konso muntu
yina sala mambu ya
Nzambi ke zolaka, yandi
muntu kele leki na Mono
ya bakala to ya nkento,
to mama na Mono.

Marko 3 :35

Leso 23. Yesu yantikaka kulonga na bingana—kingana ya ntoto ya mbote ti ya mbi.

Matayo 13 :1-23

I. PREPARATIO SAMBU NA MONITEUR-

◎ Kikuma ya Leso :

Ntangu beto kuwa nsangu ya mbote, beto yamba yo na ntima ya kulemfuka.

♥ Verse ya Kulonguka :

Bantu ya nkaka kele bonso ntoto ya mbote. Bo kuwa ndinga ya Nzambi na ntima ya kulemfuka. Bo buta bambuma—bankaka mbala nkama, bankaka mbala makumi sambanu, bankaka mbala makumi tatu. Matayo 13 :23

↖ Bankunga ya kwenda nzila mosi ti lesò :

Beto Me Wa
Kana Beno Ke Zolaka Mono

II. REVISIO

↑ Kuyindula diaka baleso me luta :

Beto me mona nde Yesu tubaka nde bo yina kuwa ndinga na Yandi ti sala yo, bo bantu kele fami na Yandi ya kieleka. Beto me mona nde bantu mingi waka malungi ya Yesu, kansi bantu ya nkaka, ata na fami ya Yesu Yandi mosi, bo ndimaka yo ve.

III. KULONGA LESO YAI

→ Kuyantika :

Nki Yesu yindulaka sambu na bo ya landaka Yandi ve ? Keti yai vandaka bonso surprize sambu na Yandi ?

❖ Malungi ya nene ya lesò yai (developpement) na banti 4 :

23.1 Kaka na lumbu ya fami ya Yesu bingaka Yandi, Yesu basikaka na nzo sika Yandi vandaka kulonga. Yandi kwendaka kuvanda penepene na dizanga. Bantu mingi ziungaka Yandi, yo yina Yandi kotaka na maswa sambu na kulonga bo. Matayo 13 :1-2

BOOK Tangila bana baverse yai :

1 Kaka na kilumbu yina, Yesu katukaka na nzo. Yandi kwendaka kuvanda penepene na dizanga.

2 Bantu mingi kangamaka penepene na Yandi. Yo yina Yandi kotaka bwatu ti vandaka na kati. Bantu yonso telamaka penepene na masa.

? Yula bana

↖ Bana sala bageste to mwa-senete

↖ Bana yimba ti kina

23.2 Yesu longaka bo na bingana. Kingana mosi tadilaka muntu yina kunaka bankeni ya kubwaka na bantoto ya mutindu na mutindu.

Matayo 13 :3-9

BOOK Tangila bana baverse yai :

3 Yandi longaka bo mambu mingi na bingana. Yandi nde : Muntu mosi kwendaka kukuna bilanga.

4...bambuma ya nkaka kwendaka kubwa na kati ya nzila. Bandeke kwisaka ti kudiaka yo.

5-6...ya nkaka kubwaka na ntoto ya matadi...bambuma menaka nswalu, kansi bu ntangu pelaka ngolo, yo zikisaka nswalu sambu misisa vandaka ve ya nda.

7 Bankeni ya nkaka bwaka na kati ya bansende, ebuna bansende kangisaka bimenina yina.

8 Kansi, bankeni ya nkaka kubwaka na ntoto ya mbote. Yo butaka bambuma-ya nkaka bambuma nkama, ya nkaka makumi sambanu, ya nkaka makumi tatu.

9 Ebuna Yesu nde : « Konso muntu yina ke na makutu, bika yandi wa ! »

? Yula bana

↖ Bana sala bageste to mwa-senete

↖ Bana yimba ti kina

23.3 Balonguki yulaka Yesu sambu na nki Yandi longaka na bingana. Yesu vutulaka nde Yandi salaka mpidina na mpila nde kaka bo ya ntima ya mbote kubakisa yo. Matayo 12 :10-17

BOOK Tangila bana baverse yai :

10 ...balonguki kwisaka kuyula Yesu nde :

« *Sambu na nki Nge ke tubilaka bo na bingana ?*

11,15 Yesu nde...sambu...bo me kangaka meso na bo. Kana mpidina ve,...bo zolaka kubalula ntima sambu Mono kubelula bo.

16 Ebuna beno, beno ke na kiese ! Beno ke monaka na meso na beno...

? **Yula bana**

☛ **Bana sala bageste to mwa-senete**

☛ **Bana yimba ti kina**

23.4 Yesu tendulaka nde bantu mingi vandaka bonso ntoto ya mbi, kansi bo yina yamba ndinga na Yandi na ntima ya kulemfuka, bo bonso ntoto ya mbote. Ndinga ya Nzambi ta buta bambuma na kati na bo. Matayo 13 :23

📖 **Tangila bana baverse yai :**

23 Bantu ya nkaka kele bonso ntoto ya mbote. Bo kuwa ndinga ya Nzambi na ntima ya kulemfuka. Bo buta bambuma—bankaka mbala nkama, bankaka mbala makumi sambanu, bankaka mbala makumi tatu. Matayo 13 :23

? **Yula bana**

☛ **Bana sala bageste to mwa-senete**

☛ **Bana yimba ti kina**

>|< **Kumanisa Malongi :**

Yesu longaka na bingana sambu bantu mingi me tula ntima na bo ngolo. Bo zolaka kuwa na kuwa mpamba, kansi bo vandaka na nzala ve kulanda malongi na Yandi. Bo vandaka ve na ntima ya kulemfuka.

Kana beto kuwa ndinga ya Nzambi ti beto tula ngolo kulemfuka na yo, beto kele bonso ntoto ya mbote. Ndinga ya Nzambi na kati na beto ta buta bambuma. Bantu ya nkaka ta buta bambuma mingi-mingi, ya nkaka mingi, ya nkaka ndambu. Kansi beto yonso ta buta bambuma kana beto yamba ndinga ya Nzambi na kieleka yonso.

❖ **Devoir sambu na bakristo :**

Bana bakristo, ntangu nge kuwa ndinga ya Nzambi, keti nge ke baka yo na ntima ya kele na nzala

kulanda yo ? Kana ve, lomba Nzambi kupesa nge ntima ya nzala ya kulemfuka, sambu ndinga ya Nzambi kubuta bambuma na kati ya luzingu na nge.

♥ **Verse ya Kulonguka :**

Bantu ya nkaka kele bonso ntoto ya mbote. Bo kuwa ndinga ya Nzambi na ntima ya kulemfuka. Bo buta bambuma—bankaka mbala nkama, bankaka mbala makumi sambanu, bankaka mbala makumi tatu. Matayo 13 :23

☛ **Bankunga ya kwenda nzila mosi ti lesò :**

Beto Me Wa
Kana Beno Ke Zolaka Mono

✚ **Invitatio sambu na bo yina me yamba Yesu ntete ve :**

Mbala ya nkaka nge me wa ndinga ya Nzambi mingi, kansi ntima na nge kele ngolo. Nge me wa yo kaka bonso bahistoire, kaka bonso bituba. Nge me yidika ntima na nge ve kulanda Yesu Kristo. Nge zaba Yandi ntete ve bonso Mvulusi na nge.

Yesu zola buta bambuma na kati ya luzingu na nge, kansi ntima na nge me fuluka na bima mingi ya ntoto yai. Keti nge ta yidika ntima sambu na kusosa Yandi ? Kana nge bakisa nde kele Yesu ve kansi nge mosi ya kele kutwadisa luzingu na nge, kana yina ke pesa nge mawa, kele Mpeve ya Nzambi kele kubenda nge. Kwisa na Yesu Kristo na kieleka yonso. Yandi ta pesa nge moyo ya mpa bu nge kwisa na Yandi.

NSUKA YA LESO 23

☞ **Kana ntangu lunga, longa ndambu mikanda ya Bible. Bangindu kele na nsuka ya mukanda yai.**

Leso 23

Yesu tubaka nde bantu ya kuwa Ndinga na Yandi na ntima ya kulemfuka, bo bantu kele fami na Yandi ya kieleka.



**Bantu ya nkaka kele bonso ntoto
ya mbote. Bo kuwa ndinga ya
Nzambi na ntima ya kulemfuka.
Bo buta bambuma—
bankaka mbala nkama,
bankaka mbala makumi sambanu,
bankaka mbala makumi tatu.**

Matayo 13 :23

Leso 24. Yesu longaka bingana ya nkaka.

Matayo 13 :24-30, 36-43

I. PREPARATIO SAMBU NA MONITEUR-

◎ Kikuma ya Leso :

Beto kuwa boma ve kana beto mona bantu ya mbi na kati ya dibundu. Nzambi zaba bantu na Yandi, ti ata muntu mosi ve ta kusa Yandi.

♥ Verse ya Kulonguka :

« ... Na ntangu ya nsuka ya ntoto, bawanzio ta kwisa, bo ta katula bantu ya mbi na kimvuka ya bantu ya mbote. Matayo 13 :49

♣ Bankunga ya kwenda nzila mosi ti lesò :

Bu Basantu Kota Zulu
Kielo Kaka Mosi

II. REVISIO

↑ Kuyindula diaka baleso me luta :

Beto me mona nde Yesu yantikaka kulonga mingi na bingana. Kaka bantu ya ntima ya mbote lendaka kubakisa bingana yina.

III. KULONGA LESO YAI

➔ Kuyantika :

Bu Yesu vandaka kulonga, bantu ya ntima ya mbote waka malongi yina, ti bo landaka yo. Bantu ya nkaka na ntima ya mbi, bo mpi waka Yandi. Bantu yina vandaka kuwa Yandi vandaka kuvanda sikamosi, bo yonso--bo ya kwikilaka ti landaka, ti bo ya kwikilaka ve.

Yo kele kiteso mosi bubuyai, mpi. Bantu mingi vanda na mabundu na beto. Bantu mingi kuwa malongi ya ndinga ya Nzambi. Kana beto tala na kati ya dibundu, beto ta mona bantu ya nkaka ya landa Yesu mbote mingi ve. Keti yai fweti pesa beto mpasi ? Kingana ya beto ta longuka bubuyai ke pesa beto mvutu.

❖ Malongi ya nene ya lesò yai (developpement) na banti 4 :

24.1 Yesu telaka kingana ya muntu yina kunaka bankeni ya mbote na kilanga, kansi na nima, mbeni kwisaka kukuna matiti ya mpamba-

mpamba na kati ya kilangi yina mpi. Matayo 13 :24-25

❖ Tangila bana bavverse yai :

24 Yesu telaka bo kingana ya nkaka, nde:
Kimfumu ya Nzambi ke fwana na muntu yina kunaka nkeni ya mbote na kilanga na yandi.

25 Kansi ntangu bantu vandaka kulala mpongi, mbeni kwisaka ti kunaka matiti ya mbi na kati ya yina ya mbote, ebuna yandi kwendaka ka yandi.

? Yula bana

✗ Bana sala bageste to mwa-senete

❖ Bana yimba ti kina

24.2 Sielo songaka nkwa kilanga mambu yina, ti bo bakisaka nde mbeni me kuna matiti yina ya mpamba-mpamba. Matayo 13 :26-28

❖ Tangila bana bavverse yai :

26 Kansi ntangu matiti ya mbote yantikaka kumena ti kubuta bambuma, matiti ya mbi monikaka mpi.

27 Yo yina basiolo ya nkwa-bilanga kwisaka na yandi kuyula nde : « Mfumu, keti nge kunaka ve bankeni ya mbote na kilanga na nge ? Matiti yai ya mbeni me katuka na wapi ?

28 Yandi vutudilaka bo nde : Mbeni me sala mambu yai. Basiolo yulaka yandi diaka nde : « Ketin ge zola beto kukwenda kukatula yo ? »

? Yula bana

✗ Bana sala bageste to mwa-senete

❖ Bana yimba ti kina

24.3 Nkwa kilanga songaka basiolo nde bo bika yonso zole kuyela ntete. Na ntangu ya kukatula bambuma, bo ta katula matiti ya mbi ti zika yo tiya, kansi bambuma ya mbote, bo ta kotisa yo na nzo na yandi. Matayo 13 :29-30

❖ Tangila bana bavverse yai :

29 Kansi yandi nde : « Ikele ve. Mbaimbai ntangu beno ke katula matiti ya mbi, beno ta katula mpi matiti ya mbote.

30 Bika yonso zole yela sika mosi tii ntangu ya

kukatula bambuma. Ntangu yina, mono ta songa bantu ya kisalu nde bo katula ntete matiti ya mbi. Bo kanga yo sambu na kuyoka yo tiya. Kansi bo ta nata bambuma ya matiti ya mbote, bo ta tula yo na nzo ya mono sika mono ke bumba madia.

?

Yula bana

 **Bana sala bageste to mwa-senete**

 **Bana yimba ti kina**

24.4 Kingana yai ke songa nde ntangu yai, bantu ya Nzambi ti ya Satana ke monika sikamosi na kimvuka, kansi na nsuka, Yesu ta tinda bawanzio na Yandi sambu na kukatula bantu ya mbi, bo kwenda na sika ya Satana. Matayo 13: 26-33

Tangila bana baverse yai :

36 Ntangu yina, Yesu basisaka foule ya bantu ya vandaka kulanda Yandi. Yandi kotaka na kati ya nzo. Ebuna balonguki na Yandi kwisaka na Yandi kulomba nde : « Tendudila beto kingana ya matiti ya mbi. »

37 Yandi vutudilaka bo nde : « Muntu ya ke kunaka matiti ya mbote kele Mono, Mwana-Muntu.

38 Kilanga kele nsi-ntoto ya mvimba, ti bankeni ya mbote kele bana ya Kimfumu (ya Nzambi). Kansi matiti ya mbi kele bana ya Nkwa-Mbi.

39 Mbeni yina kunaka bo kele Satana. Ntangu ya kukatula bambuma kele nsuka ya ntoto yai, ti bantu ya kisalu kele bawanzio.

40 Mutindu bantu ya kisalu katulaka matiti ya mbi ti yokaka yo tiya, yo ta vanda kiteso mosi na nsuka ya nsi-ntoto yai.

41 Mwana-Muntu ta tinda bawanzio na Yandi, ti bo ta katula na Kimfumu na Yandi mambu yonso ti bantu yonso ya mbi.

42 Bo ta yoka bo yonso tiya, sika bantu ta dila ti mona mpasi.

43 Ntangu yina, bantu ya mbote ta pela bonso ntangu na Kimfumu ya Tata na bo. Yandi ya kele na makutu, bika yandi kuwa.

?

Yula bana

 **Bana sala bageste to mwa-senete**

 **Bana yimba ti kina**

>|< **Kumanisa Malongi :**

Yesu telaka kingana kutuba nde e, bantu ya mbi, bantu ya Satana lenda monika na kati ya bantu ya Nzambi. Kansi vanda na boma ve. Nzambi zaba bantu na Yandi. Yai kele mpasi ve, sambu Nzambi ke mona ntima ya bantu. Na nsuka ya ntoto, Nzambi ta tinda bawanzio na Yandi sambu na kukula bo ya kele ya Yandi ve. Yandi ta losa bo na bilungi.

Devoir sambu na bakristo :

Nge mukristo, mbala ya nkaka bantu me songa nge nde bo lenda ve kota na dibundu sambu bo ke mona kuna bantu ya mbi. Nge lenda vutula nki ?

Nge lenda vutula nde ee, bantu ya mbi lenda vanda, kansi Nzambi zaba bantu na Yandi. Na nsuka, Yandi ta zenga nani muntu na Yandi ti nani muntu na Yandi ve.

Verse ya Kulonguka :

« ... Na ntangu ya nsuka ya ntoto, bawanzio ta kwisa, bo ta katula bantu ya mbi na kimvuka ya bantu ya mbote. Matayo 13 :49

Bankunga ya kwenda nzila mosi ti lesò :

Bu Basantu Kota Zulu
Kielo Kaka Mosi

Invitatio sambu na bo yina me yamba Yesu ntete ve :

Kestio ya nene kele yai : Nge, keti nge kele muntu ya Nzambi ? Kana Nzambi tala nge sesepiyai, keti Yandi ta ndima nde, “E, awa muntu na Mono ?” To keti Yandi ta buya nde, “Yai, Mono ke zaba yandi ve”?

Mawa mingi kana na kilumbu ya nsuka Nzambi tinda bawanzio na kukula bantu ya kele ya Yandi ve, ti bo simba nge, bo losa nge na bilungi. Mawa na mawa !

Mambu ya kieleka ikele nde beto yonso yantika na makambu ti Nzambi. Beto yonso me vilaka nzila.

Bibuti na beto ya ntete fwaka kinduku ti Nzambi, yo yina beto yonso me kabana ti Yandi.

Kana nge me kwisa kubakisa nde nge kele nkwasamu, nge fweti balula ntima, vutuka na Yandi. Yamba Yesu Kristo na maboko yonso zole. Tula Yandi ntima kugulusa nge. Yandi kele Mwana-Nzambi yina fwaka sambu na kusumba pardo na nge. Yandi telamaka na lufwa. Yandi kele na

moyo. Yandi lenda kuwa kana nge binga zina na Yandi. Keti nge zaba nde nge me kwisa na Yandi ? Keti nge zaba nde nge kele mwana na Yandi ?

NSUKA YA LESO 24

¶ Kana ntangu lunga, longa ndambu mikanda ya Bible. Bangindu kele na nsuka ya mukanda yai.



Na kingana mosi, Yesu longaka nde matiti ya mbote ti matiti ya mbi ke yela sikamosi na kilanga. Kansi na ntangu ya kukatula bambuma, bantu ya kisalu ta katula bambuma ya mbi ti yoka yo tiya. Ntangu yina, nkwa-bilanga ta baka matiti ya mbote ti tula yo na nzo na yandi.

Nzambi zaba bantu na Yandi. Nani zaba kana muntu kele kieleka ya Yandi to ya mbeni Satana.

Leso 24

« ... Na ntangu
ya nsuka ya
ntoto, bawanzio
ta kwisa, bo ta
katula bantu ya
mbi na kimvuka
ya bantu ya
mbote.

Matayo 13 :49

Leso 25. Yesu longaka bingana kusonga nki me luta mfunu.

Matayo 13 :44-46,51,53

I. PREPARATIO SAMBU NA MONITEUR-

◎ Kikuma ya Leso :

Kimfumu ya Nzambi kele mfunu ti ntalu kuluta mambu yonso ya nkaka. Beto sala yonso sambu na kukota yo mpi sambu na kunata yo na bantu ya nkaka.

♥ Verse ya Kulonguka :

« Kimfumu ya Nzambi me fwanana na bima ya ntalu ya bo me bumbaka na kilanga. Kana muntu mosi kumona yo, yandi ta bumba yo ntete. Ebuna sambu na kiese na yandi, yandi ta kwenda kuteka bima na yandi yonso sambu yandi kusumba kilanga yina. » Matayo 13 :44

♣ Bankunga ya kwenda nzila mosi ti leso:

Kitoko, Kitoko
Sosa Ntete

II. REVISIO

↑ Kuyindula diaka baleso me luta :

Yesu me vanda kulonga na bingana. Yandi me songa beto nsuka ya mawa ya bantu yina ke monika na kati ya bantu ya Nzambi, kansi bo kele bantu ya Nzambi ve.

III. KULONGA LESO YAI

➔ Kuyantika :

Bubuyai beto ta longuka nki mutindu beto fweti yamba Kimfumu ya Nzambi.

❖ Malongi ya nene ya leso yai (developpement) na banti 3 :

25.1 Na bingana zole, Yesu longaka nde Kimfumu ya Nzambi kele ntalu mingi kuluta bima yonso ya nkaka ya muntu ke na yo.
Matayo 13 :44-46

❖ Tangila bana baverse yai :

(Yesu ke longa na bingana) 44 « Kimfumu ya Nzambi me fwanana na bima ya ntalu ya bo me bumbaka na kilanga. Kana muntu mosi

kumona yo, yandi ta bumba yo ntete. Ebuna sambu na kiese na yandi, yandi ta kwenda kuteka bima na yandi yonso sambu yandi kusumba kilanga yina. » Matayo 13 :44

[Moniteur, atasio ! Yai mpi kele Verse ya Kulonguka sambu na leso yai.]

45-46 « Diaka, Kimfumu ya Nzambi me fwanana na komersa ya ke sosa mayaka ya ntalu. Bu yandi me mona diyaka mosi ya kuluta ntalu mingi, yandi tekaka bima yonso yandi vandaka na yo sambu na kusumba diyaka yina. »

? Yula bana

↗ Bana sala bageste to mwa-senete

↖ Bana yimba ti kina

25.2 Balonguki ndimaka nde bo me bakisa bingana Yesu tubaka. Matayo 13 :51

❖ Tangila bana baverse yai :

51 Yesu yulaka bo nde : « Beno me bakisa mambu yina yonso ? » Bo nde, « Ee, Mfumu. »

? Yula bana

↗ Bana sala bageste to mwa-senete

↖ Bana yimba ti kina

25.3 Ntangu Yesu manisaka kutela bingana yina, Yandi basikaka na sika yina. Matayo 13 :53

❖ Tangila bana baverse yai :

53 Ntangu Yesu manisaka kutela bingana yina imene, Yandi katukaka pana.

? Yula bana

↗ Bana sala bageste to mwa-senete

↖ Bana yimba ti kina

>|< Kumanisa Malongi :

Yesu telaka bingana yai zole, kansi disongidila na yo vandaka kaka kiteso mosi. Mbala ya nkaka Yandi tubaka yo mutindu zole sambu leso vandaka mfunu mingi ya kuluta. Leso yo yai : nde Kimfumu ya Nzambi kele ya valere mingi, ntalu mingi, mfunu mingi. Ata muntu bikisa bima yonso ya nkaka, yandi ta zola kusala yo sambu na kubaka Kimfumu

ya Nzambi. Yo yina, beto sala yonso na kuzwa yo.
Yo kele mfunu kuluta bima yonso ya nkaka ya ntoto
yai.

Devoir sambu na bakristo :

Beto bakristo, mbote beto kudiyula kana beto ke
baka Kimfumu ya Nzambi bonso kima ya ntalu.
Keti Nzambi kele Muntu kuluta nene na luzingu na
beto ? Keti beto ke sosa Kimfumu na Yandi ntete,
na ntwala ya bima ya nkaka ? Kana yo kele mfunu
mutindu yina, keti beto ke songa bantu ya nkaka
nsangu yina ?

Verse ya Kulonguka :

*« Kimfumu ya Nzambi me fwanana na bima ya
ntalu ya bo me bumbaka na kilanga. Kana muntu
mosi kumona yo, yandi ta bumba yo ntete. Ebuna
sambu na kiese na yandi, yandi ta kwenda kuteka
bima na yandi yonso sambu yandi kusumba kilanga
yina. » Matayo 13 :44*

Bankunga ya kwenda nzila mosi ti leso:

Kitoko, Kitoko
Sosa Ntete


Invitatio sambu na bo yina me yamba Yesu ntete ve :

Yai mpi kele ntangu ya mbote kudiyula mbote-
mbote kana nge mosi me kota Kimfumu ya Nzambi.
Beto bankwa-masumu, na luyantiku mabanza na
beto kele kaka ya beto mosi. Profete Yezaya tubaka
yo mutindu yai : “Beto yonso me yungana bonso
mameme, konso muntu na nzila na yandi” (Yezaya
53 :6a).

Nzambi lomba beto kubika nzila ya beto mosi,
kubalula ntima, kukota nzila na Yandi. Yai kele
kubutuka mbala ya zole (Yoane 3 :3). Kana muntu
me sala yo, yandi ta vanda kulanda luzolo ya
Nzambi. Kimfumu ya Nzambi ta kuma nene ti
mfunu na mabanza ti na luzingu na yandi.

Keti nge me kota Kimfumu ya Nzambi ? Kana nge
mona nde tii bubu, nge kele kulanda kaka nzila ya
nge mosi, nge lenda balula ntima bubuyai. Konso
mposo, beto kele awa na nima ya ecodim sambu na
kusadisa bantu ya zola lusadisu na mambu yina.

 Kana ntangu lunga, longa ndambu mikanda ya
Bible. Bangindu kele na nsuka ya mukanda yai.



Yesu telaka bingana zole kulonga nde Kimfumu ya Nzambi kele mambu ya kuluta mfunu. Yandi fwanikisaka Kimfumu ya Nzambi na tresor ya ntalu ya muntu monaka na bilanga. Yandi tekaka bima yonso na yandi sambu na kusumba ntoto yina, sambu tresor me luta ntalu. Yandi fwanikisaka Kimfumu diaka na diyaka mosi ya ntalu mingi. Beto fweti sosa Kimfumu ya Nzambi ntete, na ntwala ya mambu ya nkaka ti kuluta mambu ya nkaka.

« Kimfumu ya Nzambi me fwanana

*na bima ya ntalu ya bo me bumbaka
na kilanga.*

*Kana muntu mosi kumona yo,
yandi ta bumba yo ntete.*

*Ebuna sambu na kiese na yandi,
yandi ta kwenda kuteka bima na
yandi yonso sambu yandi kusumba
kilanga yina. »*

Matayo 13 :44

Leso 26. Yesu kangaka mupepe ya ntembo.

Marko 4:35-41

I. PREPARATIO SAMBU NA MONITEUR-

◎ Kikuma ya Leso :

Beto vanda na ngemba ti tula ntima na Yesu ata na ntangu ya mpasi ti ya kingonsa.

♥ Verse ya Kulonguka :

...Nzambi kele Ngulusi na beto. Beto ta tula Yandi ntima. Beto ta wa boma ve... Yezaya 12 :2b

♣ Bankunga ya kwenda nzila mosi ti lesò :

Bu Yesu Kele na Mono
Sika Yonso Mono Kwenda na Yesu, vs. 1 & mvutu

II. REVISIO

↑ Kuyindula diaka baleso me luta :

Beto me mona mpila Yesu longaka na bingana. Bubu beto ta mona mpila Malongi na Yandi tadelaka luzingu na bo lumbu na lumbu. Na français beto binga yo “la vie quotidienne.”

III. KULONGA LESO YAI

➔ Kuyantika :

Nki ke pesaka beto boma ? Nani lenda songa kima mosi ? [Moniteur, bana 3 to 4 lenda tuba na nkufi.]
Mambu mingi lenda pesa beto bantu boma. Na histoire ya bubu, balonguki ya Yesu mpi kotaka ntangu mosi ya boma.

❖ Malongi ya nene ya lesò yai (developpement) na banti 4 :

26.1 Yesu vandaka kutela bingana na kati ya bwatu na masa ya nzadi. Yandi tubaka na balonguki, “Beto sabukeno na simu.” Yo yina, bo kotaka na bwatu. Marko 4 :35-36

BOOK Tangila bana baverse yai :

35 Kilumbu yo yina, ntangu mpimpa me yantika kubwa, Yesu songaka balonguki na Yandi nde : « Beto sabukeno na simu. »

36 Bo bikisaka bantu yonso ya vandaka pana. Balonguki nataka Yesu na bwatu ...

? Yula bana

✗ Bana sala bageste to mwa-senete

✳ Bana yimba ti kina

26.2 Kitembo ya nene yantikaka. Masa yantikaka kufuluka na bwatu. Kansi Yesu vandaka kulala mpongi kaka. Bo tedimisaka Yandi ti nganinaka Yandi na mabanza nde Yandi vandaka kulunda bo ve. Marko 4 :37-38

BOOK Tangila bana baverse yai :

37 Mupepe ya ngolo kwisaka kaka mbala mosi. Kitembo ya masa yantikaka kukota na kati ya bwatu. Yo yina, bwatu yantikaka kufuluka na masa.

38 Kansi Yesu vandaka na nima ya bwatu. Yandi vandaka me lala mpongi, ntu na Yandi na zulu ya kusene. Balonguki tedimisaka Yandi, ebuna bo yulaka Yandi, « Longi, keti Nge mona mpasi ve nde beto zola kuvila ? »

? Yula bana

✗ Bana sala bageste to mwa-senete

✳ Bana yimba ti kina

26.3 Yesu telamaka ti songaka kitembo kuvanda pima. Yo lemfukaka na Yandi. Ebuna Yandi nganinaka balongi sambu bo tulaka Yandi ntima ve na ntangu yina. Marko 4 :39-40

BOOK Tangila bana baverse yai :

39 Yesu telamaka na mpongi. Yandi nganinaka mupepe ti masa nde : « Bika makelele. Vanda pima. » Ebuna mupepe manaka. Yonso kumaka nie.

40 Ebuna Yesu yulaka bo nde : « Sambu na nki beno ke wa boma ? Ketin beno ke na lukwikilu ve ? »

? Yula bana

✗ Bana sala bageste to mwa-senete

✳ Bana yimba ti kina

26.4 Yai yonso pesaka balonguki boma. Bo yulanaka bo na bo nde Yesu nani, sambu ata mupepe ti masa lemfukaka na Yandi. Marko 4 :41

 **Tangila bana baverse yai :**

41 Boma mingi simbaka bo. Yo yina, bo yantikaka kuyulana bo na bo nde : « Muntu yai Nani, nde ata mupepe ti masa lemfuka na Yandi ? »

 **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Balonguki vandaka na boma sambu bo talaka kaka mpasi na bo, situation na bo. Bo yindulaka ve nde, « Yesu kele ti beto. Yandi lunga sadisa beto. Beto tula Yandi ntima. »

Ntangu bo lombaka lusadisu na Yandi, Yandi manisaka probleme na bo nswalu. Yandi kele Nzambi. Yo yina, Yandi kele na ngolo ata na zulu ya bima ya ntoto bonso mupepe ti masa. Yandi kele na ngolo yonso.

Bampasi ke kwisa na beto yonso, kansi beto bakristo fweti kuwa boma ve, sambu beto zaba nde Yesu kele na beto. Ntangu ya nkaka, Yesu manisa mpasi kana beto binga zina na Yandi. Ntangu ya nkaka, Yandi manisa yo ve, kansi Yandi pesa beto ngolo ti ngemba na kati na yo. Konso ntangu Yandi kele ti beto na kati na yo. Beto tula Yandi ntima ntangu yonso, ata konso mambu bwila beto.

 **Devoir sambu na bakristo :**

Mwana mukristo, ata na mposo yai, nge lenda mona mpasi mutindu na mutindu. Devoir mono ke pesa nge kele kubambuka nde Yesu kele sikamosi ti nge, ebuna kulomba lusadisu na Yandi. Tula Yandi ntima, ata na kiese, ata na mpasi.

 **Verse ya Kulonguka :**

...Nzambi kele Ngulusi na beto. Beto ta tula Yandi ntima. Beto ta wa boma ve... Yezaya 12 :2b

 **Bankunga ya kwenda nzila mosi ti lesos :**

Bu Yesu Kele na Mono

Sika Yonso Mono Kwenda na Yesu, vs. 1 & mvutu

 **Invitatio sambu na bo yina me yamba Yesu ntete ve :**

Kestio ya nene ikele, keti Yesu ikele ti nge. Yandi kele na beto ya me bakisa nde beto me sala mbi, me balula kubika nzila ya mbi yina, me tula Yandi ntima. Yai kele kubutuka mbala ya zole, to kukuma mukristo. Kana Mpeve ya Nzambi ke songa nge nde nge kele na mfunu kabalula ntima, kukinga ve. Kwenda na Yandi bubuyai. Yandi me sila nde Yandi ta yamba nge (Yoane 6 :37b).

NSUKA YA LESO 26

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.



Leso 26

Balonguki ya Yesu waka boma sambu kitembo ya nene zolaka kudindisa bwata.
Yesu kangaka mupepe ti masa kumaka nie. Beto lenda tula Yandi ntima na ntangu
ya mpasi.

Leso 26

...Nzambi kele Ngulusi
na beto.

Beto ta tula Yandi
ntima.

Beto ta wa boma ve...

Yezaya 12 :2b

Leso 27. Yesu katulaka mpeve ya me tula muntu lauka.

Marko 5 :1-20, Luka 8 :27

I. PREPARATIO SAMBU NA MONITEUR-

◎ Kikuma ya Leso :

Beto bakristo kuwa boma ve sambu na bampeve ya mbi, sambu beto bakisa nde Yesu ke na kiyeka na zulu na bo.

♥ Verse ya Kulonguka :

« ...Ata bampeve ya mbi ke lemfukila beto na zina na Nge. » Luka 10 :17b

↖ Bankunga ya kwenda nzila mosi ti leso :

Banzambi ya Nkaka
Kana Satana Kwisa
Nani Kele Ngolo ?

II. REVISIO

↑ Kuyindula diaka baleso me luta :

Na mposo me luta, beto monaka nde Yesu kele na kiyeka na zulu ya nki ?

(Masa ti mupepe. Yai zola tuba, mambu yonso ya Yandi me sala. Yandi kele Ngangi ya bima yonso. Yo yina, Yandi ke na kiyeka na zulu ya bima yonso.)

III. KULONGA LESO YAI

→ Kuyantika :

Yesu gangaka bima yonso ya beto ke mona, kansi Yandi mpi gangaka bima ya beto ke mona ve. Yandi gangaka bawanzio. Yandi salaka bo yonso mbote, kansi wanzio mosi zolaka ve kusambilila Yandi. Wanzio yina twadisaka bawanzio ya nkaka kusala mavanga, ti Nzambi katulaka bo na zulu. Bo kumaka bampeve ya mbi. Na leso ya bubu, Yesu ta kuta ndambu na bo.

⇒ Malungi ya nene ya leso yai (developpement) na banti 4 :

27.1 Na simu, Yesu ti balonguki kutaka muntu yina vandaka na mpeve ya mbi ya vandaka kupesa yandi mpasi mingi. Matayo

5 :1-6, Luka 8 :27

BOOK Tangila bana baverse yai :

1 Bo kumaka na simu ya dizanga ya Galilea...

2 Ebuna bu Yesu me basika na bwatu, muntu mosi ya mpeve ya mbi kwisaka kubasika na maziamu, kukuta Yandi.

(Luke 8 :27 ke yika nde 'Katuka ntama, yandi vandaka kulwata bilele ve.')

3 Yandi vandaka kuzinga kaka na kati ya maziamu...

4 Mbala mingi bo me kanga yandi na miniololo, na maboko ti na makulu, kansi yandi vandaka kaka kupasula yo.

5 Ntangu yonso, mpimpa ti mwini, yandi vandaka ...kuboka ti kudilwadisa na matadi.

6 Ntangu yandi monaka Yesu ntama, yandi bakaka ntinu kufukama na ntwala ya Yesu.

? Yula bana

↗ Bana sala bageste to mwa-senete

↖ Bana yimba ti kina

27.2 Mpeve zabaka mbote Yesu vandaka nani. Yandi bondilaka Yesu kupesa yandi ndola ve. Matayo 5 :6-8

BOOK Tangila bana baverse yai :

7 Ebuna yandi bokaka na ndinga ya ngolo nde : « Yesu, Mwana ya Nzambi-Mpungu, nki mambu Nge ti mono ? Pardon, mono bondila Nge...kumonisa mono mpasi ya ndola ve.

8 Yandi tubaka mpidina sambu Yesu vandaka kutuba nde « basika, nge mpeve ya mbi, na muntu yai. »

? Yula bana

↗ Bana sala bageste to mwa-senete

↖ Bana yimba ti kina

27.3 Bampeve vandaka mingi. Bo bondilaka Yesu kutinda bo na bangulu ya vandaka penepene. Ntangu Yesu pesaka bo nzila, bo kotaka. Ebuna bangulu yonso kubwaka na dizanga ti fwaka. Marko 5 :9-13

BOOK Tangila bana baverse yai :

9 Ebuna Yesu yulaka yandi nde : « Zina na nge nani ? » Mpeve nde : Zina na mono 'Ndonga ya nene', sambu beto kele mingi. »

11 Bangulu mingi vandaka kudia pana, penepene na bangumba.

12 Bampeve ya mbi bondilaka Yesu nde : « Tinda beto kukota na bangula.

13 Yesu pesaka bo nzila. Ebuna bampeve ya mbi basikaka na muntu yango, bo kwendaka kukota na bangulu. Bangulu yina yonso katukaka ntinu, bo kwendaka kubwa na dizanga. Yo yina, bo fwaka na masa, kiteso ya 2,000.

? Yula bana

 Bana sala bageste to mwa-senete

 Bana yimba ti kina

27.4 Bu nsangu yai panzanaka, bantu bondilaka Yesu kukatuka pana. Muntu ya vandaka na mpeve zolaka kulanda Yesu, kansi Yesu songaka yandi kuvutuka kusonga bampangi kimpa Nzambi me sala yandi. Marko 5 :14-20

Tangila bana baverse yai :

14 Bo yina vandaka kutala bangulu, bo tinaka ka bo. Bo kwendaka kupanza nsangu yango na bwala ti na nseke. Ebuna bantu kwendaka sambu na kutala nki mambu me bwa.

15 Bo kwisaka kukuma na Yesu. Bo monaka muntu yina vandaka na mpeve ya mbi, Yandi vandaka kuvanda, me lwata bilele, me vanda na mabanza ya mbote. Tbuna boma simbaka bo.

16 Bantu yina monaka mambu yina, bo songaka nki me kwisila muntu yina vandaka na mpeve ya mbi ti mambu ya bangulu.

17 Ebuna bo yantikaka kubondila Yesu nde Yandi basika na ntoto na bo.

18 Ntangu Yesu me kota na bwatu, muntu yina vandaka na bampeve ya mbi bondilaka Yesu nde yandi kubikala ti Yandi.

19 Kansi Yesu pesaka yandi nzila ve, kansi songaka yandi : « Kwenda na nzo na nge ti na bampangi na nge, ti songa bo mambu ya nene

ya Nzambi me sala sambu na nge... »

20 Ebuna yandi kwendaka ti yantikaka kusonga... yonso ya Yesu me sala sambu na yandi. Ti bantu yonso vandaka kuyituka.

? Yula bana

 Bana sala bageste to mwa-senete

 Bana yimba ti kina

>< Kumanisa Malongi :

Bampeve ya mbi vandaka kupesa muntu mpasi mingi. Bo pesaka yandi ve mpila kulwata bilele to zinga na nzo to na kati ya bantu. Bo twadisaka yandi kuzinga kaka na kati ya maziamu. Bo bendaka yandi na kudilwadisa na matadi. Bo bendaka yandi kusala mavanga na mpila nde bantu monaka mfunu kukanga yandi ata na miniololo, ti bo pesaka yandi ngolo mingi kukatula miniololo yina.

Yesu vandaka na kiyeka na zulu ya bampeve yina, ti bo zabaka yo mbote. Bo lemfukaka na ndinga na Yandi.

Bubuyai mpi, Yesu kele na kiyeka na zulu ya konso mpeve ya mbi. Bo fweti lemfuka na beto bakristo na zina na Yandi. Beto vanda na bo boma ve, kansi beto tula ntima na Yesu ti sadila zina na Yandi. Yandi ta keba beto ya ke landa Yandi.

Devoir sambu na bakristo :

Mwana mukristo, keti bampeve ya mbi ke pesa nge mpasi ? Kula bampeve yina na zina ya Yesu Kristo. Ketia bantu ya nkaka zola kuloka nge ? Vanda na boma ya magie na bo ve. Binga zina ya ngolo ya Yesu. Yandi kele na ngolo na zulu na bampeve ya mbi yonso.

Verse ya Kulonguka :

« ...Ata bampeve ya mbi ke lemfukila beto na zina na Nge. » Luka 10 :17b

Bankunga ya kwenda nzila mosi ti lesò :

Banzambi ya Nkaka

Kana Satana Kwisa

Nani Kele Ngolo ?

✚ Invitatio sambu na bo yina me yamba Yesu ntete ve :

Kansi, kana nge me balula ntima, me tula kivuvu na Yesu ntete ve, zaba nde nge me bikala mwana ya Satana. Yandi kele na ngolo na zulu ya nge. Yandi kele kutwadisa nge.

Kana Mpeve ya Nzambi ke benda nge, nge lenda kota na Kimfumu na Yandi. Balula ntima bubu. Bika nzila ya Satana. Kota na nzila ya Yesu.

Bampeve ya mbi fweti yala nge ve. Bo fweti pesa nge mpasi ve. Binga zina ya Yesu Kristo sesepiyai ti songa Yandi nde nge zola kuma mwana ya Nzambi, nge ke kuma na Yandi. Yandi kaka kele na ngolo kugulusa nge.

NSUKA YA LESO 27

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 27

« ...Ata bampeve
ya mbi ke
lemfukila beto na
zina na Nge. »

Luka 10 :17b



Leso 28. Yesu tedimisaka mwana ya Yairusi ti belulaka nkento ya simbaka lele na Yandi.

Marko 5 :21-43

I. PREPARATIO SAMBU NA MONITEUR-

◎ Kikuma ya Leso :

Beto sosa lusadisu ya Yesu na konso maladi sambu beto bakisa nde Yandi zola sadisa beto.

♥ Verse ya Kulonguka :

(Yesu nde :) « ...Zaba nde Tata na beno kele na zulu ta pesa mpenza bima ya mbote na bantu yina ke lombaka Yandi yo ! » Matayo 7 :11

♣ Bankunga ya kwenda nzila mosi ti lesò :

Mazono, Bubu, Mvu ya Mvu
Nzambi Ta Kuwa Nge

II. REVISIO

↑ Kuyindula diaka baleso me luta :

Na mposo me luta, beto monaka nde Yesu ikele na kiyeka na zulu ya bampeve ya mbi.

III. KULONGA LESO YAI

→ Kuyantika :

Beto me mona dezia nde Yesu ikele na kiyeka na zulu ya bamaladi. Bubuyai, beto mona diaka mpila Yandi wilaka bantu mawa na bampasi na bo.

🕸 Malongi ya nene ya lesò yai (developpement) na banti 4 :

28.1 Yairusi bondilaka Yesu kukwisa tedimisa mwana na yandi ya nkento yina zolaka kufwa.
Marko 5 :21-23

📖 Tangila bana baverse yai :

21 Ntangu Yesu sabukaka diaka dizanga imene, bantu mingi kwisaka na Yandi...

22-23 Ebuna muntu mosi kwisaka zina ya Yairusi, mosi ya bantwadisi ya nzo ya bisambu ya Bayuda. Ntangu yandi monaka Yesu, yandi fukamaka na makulu na Yandi ti bondilaka Yandi : « Mwana na mono ya nkento ke zola kufwa. Kwisa tula yandi maboko sambu yandi

beluka, yandi zinga.

? Yula bana

↗ Bana sala bageste to mwa-senete

↖ Bana yimba ti kina

28.2 Na nzila kukwenda, nkento yina vandaka na maladi bamvula 12 simbaka lele ya Yesu, ebuna yandi belukaka. Matayo 5 :24-29

📖 Tangila bana baverse yai :

24 Ebuna Yesu kwendaka nzila mosi ti yandi. Bantu mingi mpi vandaka kulanda Yandi ti kukangisa Yandi ndambu yonso.

25-26 Nkento mosi vandaka na bantu yina, menga vandaka kubasika yandi katuka bamvula 12. Yandi me mona mpasi mingi, me manisa mbongo yonso na yandi na minganga, kansi maladi me kuma kaka kuluta.

27-28 Bu yandi waka bantu kutuba sambu na Yesu, yandi kwisaka na kati ya bantu ya nkaka. Yandi simbaka lele na Yandi, sambu yandi yindulaka nde : « Kana mono lenda kaka simba lele na Yandi, mono ta beluka. »

29 Nswalu, menga kangamaka. Mono waka na nitu nde yandi me beluka.

? Yula bana

↗ Bana sala bageste to mwa-senete

↖ Bana yimba ti kina

28.3 Yesu songaka yandi kukwenda na ngembä. Lukwikilu na yandi me belula yandi. Marko 5 :30-34

📖 Tangila bana baverse yai :

30 Yesu zabaka nswalu mpi nde ndambu ngolo me basika na Yandi. Yo yina Yandi balulaka ti yulaka : « Nani me simba Mono na lele ? »

31 Kansi balonguki na Yandi yutulaka nde : « Nge ke mona bantu mingi ke kangisa Nge. Nki mutindu Nge me yula, « Nani me simba Mono ? »

32 Ebuna Yandi talaka na lweka na Yandi yonso kumona muntu yina me sala yo.

33 Kansi nkento yango, na boma ti kutekita yonso, kwisaka kufukama na ntawala na Yandi,

kusonga Yandi kieleka yina yonso.

34 Ebuna Yesu songaka yandi nde : « *Mwana na mono, lukwikilu na nge me belula nge. Kwenda na ngemba. Nitu na nge baka ngolo. Maladi me mana.*

? **Yula bana**

 **Bana sala bageste to mwa-senete**

 **Bana yimba ti kina**

28.4 Yesu tediumisaka mwana ya Yairusi na lufwa. Marko 5 :35-42

 **Tangila bana baverse yai :**

35 *Ntangu Yesu vandaka kaka kutuba, bantu katukaka na nzo ya Yairusi. Bo tubaka nde : « Mwana na nge me fwa. Nki mfunu kuyangisa Longi diaka ? »*

36 *Bu Yesu waka mpila bo tubaka, Yandi tubilaka Yairusi nde : « Kuwa boma ve. Tula ntima kaka.*

38 *Ebuna Yandi kwisaka na nzo ya Yairusi, ti Yandi monaka bantu mingi ke tula makelele, ke dila, ke tula milolo.*

39 *Yandi kotaka nzo, ye Yandi yulaka bo : « Sambu na nki beno ke tula makelele, ke dila ? Mwana me fwa ve. Yandi ke lala mpongi kaka.*

40 *Ebuna bo sekaka Yandi. Kansi Yandi basisaka bo yonso. Ebuna Yandi bakaka mama ya mwana ti bantu yina kwisaka ti Yandi, bo kotaka sika ya mwana vandaka kulala.*

41 *Ebuna Yandi simbaka diboko ya mwana, ti Yandi tubilaka yandi nde : « Mwana-nkento, Mono songa nge nde, Telama ! »*

42 *Nswalu mwana-nkento telamaka ti tambulaka... Ebuna bo yonso yitukaka ngolo.*

? **Yula bana**

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Beto me mona mpila Yesu belulaka nkento ya Yandi kutaka na nzila. Yandi zabaka mambu yonso ya me salama, kansi Yandi kangaka na nzila sambu na kupesa kikesa na nkento yina.

Kukanga yina tulaka Yesu na retard. Na ntangu Yesu vandaka kusadisa nkento na nzila, mwana ya Yairusi kufwaka. Kansi Yesu zolaka kaka kusadisa fami yina. Yandi kwendaka na nzo na bo ti tedimisaka mwana yina na lufwa.

Ntangu lenda vanda nde Nzambi kele na lukanu kuluta mbote sambu na muntu ya maladi, yandi kufwa. Kansi beto fweti tula Yand ntima. Beto fweti bakisa nde Yandi zola sadisa bantu na Yandi.

 **Devoir sambu na bakristo :**

Beno bakristo, devoir mono ke pesa beno na mposo yai, yo yai : Na konso mpasi beno mona na mposo yai, sosa lusadisu ya Yesu. Yandi zola sadisa bantu na Yandi.

 **Verse ya Kulonguka :**

(Yesu nde :) « ...*Zaba nde Tata na beno kele na zulu ta pesa mpenza bima ya mbote na bantu yina ke lombaka Yandi yo !* » Matayo 7 :11

 **Bankunga ya kwenda nzila mosi ti lesò :**

Mazono, Bubu, Mvu ya Mvu
Nzambi Ta Kuwa Nge

 **Invitatio sambu na bo yina me yamba Yesu ntete ve :**

Beto lenda tula ntima na Yesu kaka na mambu ya maladi ve. Beto lenda tula Yandi ntima mpi na mambu kuluta nene, kuluta mfunu—mambu ya mpulusu. Nki mfunu kubeluka na maladi, kana na nima, nge kwenda na bilungi ?


Yesu kele Mwana ya Nzambi ya me bika zulu, me kulumuka awa na nsi-ntoto, me sala mambu kaka ya mbote, me longa malongi kaka ya kitoko, me fwa na zulu ya kulunsi na sika na beto, me telama na lufwa.

Kana nge bakisa nde masumu na nge me fwa kinduku ya nge ti Nzambi, kele Mpeve ya Nzambi ya ke songa nge mpidina. Nki ta kanga nge nzila kubalula ntima, kutula kivuvu yonso na Yandi?


NSUKA YA LESO 28

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 28



**Yesu zola
kusadisa
beto bantu
na Yandi.
Yandi
bakaka
ntangu
kupesa
kikesa na
nkento ya
vandaka na
maladi ya
menga.**



**Mwana ya
Yairusi
fwaka bu
Yesu
vandaka na
nzila
kukwisa
kubelula
yandi. Yo
yina, Yesu
tedimisaka
yandi na
lufwa.**

« ...Zaba nde
Tata na beno
kele na zulu ta
pesa mpenza
bima ya mbote
na bantu yina ke
lombaka Yandi
yo ! » *Matayo 7:11*

Leso 29. Yesu songaka balonguki kulomba Nzambi kutinda bantu ya kisalu sambu na kukatula bambuma na Yandi.

Matayo 9:27-38

I. PREPARATIO SAMBU NA MONITEUR-

⦿ Kikuma ya Leso :

Beto bakristo lomba Nzambi kutinda bantu mingu na kusamuna nsangu ya Yesu tii ntangu nde bantu yonso me wa.

⦿ Bankunga ya kwenda nzila mosi ti leso :

Kwenda Nord, Kwenda Sud
Ngolo Yonso Nzambi Me Pesa na Nge

♥ Verse ya Kulonguka :

37 Ebuna Yesu tubilaka balonguka na Yandi nde : « Kieleka, bambuma kele mingu na bilanga, kansi bantu ya kisalu kele fioti.

38 Yo yina, lomba Nkwa-Bilanga kutinda bantu ya kisalu na kukatula bambuma na Yandi. Matayo 9:37-38

II. REVISIO

↑ Kuyindula diaka baleso me luta :

Beto me mona mpila Yesu belulaka bantu.
Ntima na Yandi vandaka na mawa sambu na bo.
Bubuyai beto ta mona mawa yina fweti twadisa beto bakristo kusala nki.

III. KULONGA LESO YAI

➔ Kuyantika :

Bantu yina vandaka na mfunu ya lusadisu ya Yesu vandaka kusosa Yandi konso ntangu. Bu Yesu me kaka manisa kutedimisa mwana ya Yairusi, bantu zole ya nkaka kutaka Yandi kusosa Yandi kubelula bo mpi.

❖ Malongi ya nene ya leso yai (developpement) na banti 4 :

29.1 Bantu zole ya kufwa meso sosaka Yesu sambu Yandi wila bo mawa, ye Yandi belulaka bo. Matayo 9:27-30a

BOOK Tangila bana baverse yai :

27 Bu Yesu katukaka pana, bantu zole ya kufwa meso landaka Yandi. Bo vandaka kuboka nde : « Mwana ya Davidi ! (Mesia !) Wila beto mawa ! »

28 ... Yesu yulaka bo nde, « Keti beno ke kwikila nde Mono lenda sala mambu yai ? » Bo nde, « Ee, Mfumu. »

29-30a Ebuna Yandi tulaka musapi na zulu ya meso na bo ye tubaka, “Bonso lukwikili ya beno, bika yo kusalama.” Ebuna meso na bo kangukaka.

? Yula bana

➤ Bana sala bageste to mwa-senete

⦿ Bana yimba ti kina

29.2 Yesu ti balonguka na Yandi kutaka muntu ya vandaka na mpeve ya mbi ya pesaka yandi nzila ve ya kutuba. Yesu katulaka mpeve yina, ebuna yandi tubaka. Matayo 9:32-33a

BOOK Tangila bana baverse yai :

32 Bu bo vandaka kubasika na nzo, bo nataka na Yesu muntu mosi ya vandaka ve na mpila kutuba sambu yandi vandaka na mpeve ya mbi.

33a Ntangu Yesu basisaka mpeve yina, muntu yango tubaka.

? Yula bana

➤ Bana sala bageste to mwa-senete

⦿ Bana yimba ti kina

29.3 Yesu longaka, samunaka ti belulaka bantu na babwala mingu. Yandi wilaka bo mawa sambu bo vandaka bonso mameme ya vandaka na mvungi ve.

Matayo 9:35-36

BOOK Tangila bana baverse yai :

35 Ebuna Yesu tambulaka na babwala yonso ya nene ti ya fioti, kulonga na banzo na bo ya bisambu, kusamuna Nsangu ya Mbote ya Kimfumu, kubelula mpi bamaladi yonso mutindu na mutindu.

36 Kansi ntangu Yesu monaka bantu mingu,

Yandi wilaka bo mawa, sambu bo me lemba ya kuyungana, bonso mameme kukonda mvungi kutwadisa bo.

? **Yula bana**

⤓ **Bana sala bageste to mwa-senete**

⤒ **Bana yimba ti kina**

29.4 Yesu songaka balonguki nde kisalu vandaka mingi kansi bantu ya kisalu fioti. Yo yina, bo lomba Mfumu kutinda bantu ya kisalu na kukatula bambuma na Yandi. Matayo 9 :37-38

⠀ **Tangila bana baverse yai :**

[Moniteur, NB: Yai kele verset ya kulonguka bubuyai.]

37 Ebuna Yesu tubilaka balonguka na Yandi nde : « Kieleka, bambuma kele mingi na bilanga, kansi bantu ya kisalu kele fioti.

38 Yo yina, lomba Nkwa-Bilanga kutinda bantu ya kisalu na kukatula bambuma na Yandi.

? **Yula bana**

⤓ **Bana sala bageste to mwa-senete**

⤒ **Bana yimba ti kina**

>|< Kumanisa Malongi :

Yesu vandaka kusala ngolo-kubelula bantu, kubasisa bampeve ya mbi, kulonga, kusamuna. Yandi salaka ngolo sambu Yandi wilaka bantu mawa. Kansi Yandi monaka nde kisalu me luta muntu mosi. Yo me luta balonguki ya Yesu. Yo lombaka bantu mingi. Nzambi me sala dezia na ntima ya bantu mingi, kubenda bo kubalula ntima ti kutula ntima na Yandi. Bantu ya kisalu mingi vandaka mfunu sambu na kusadisa bantu yina.

Nki kusala ? Yesu tubaka nde beto lomba Nzambi nde Yandi tinda bantu ya kisalu. Beto lomba Nzambi nde balongi ecodim kuvanda mingi, baevangeliste kuvanda mingi, bapasteur kuvanda mingi, bamisionere kuvanda mingi.

⤓ **Devoir sambu na bakristo :**

Nge mukristo, keti nge kele kusamba nde bantu ya ke sadila Nzambi kuma mingi ? Keti nge ta yantika kusamba mutindu yina mposo yai ?

⤒ **Bankunga ya kwenda nzila mosi ti lesò :**

Kwenda Nord, Kwenda Sud
Ngolo Yonso Nzambi Me Pesa na Nge

之心 **Verse ya Kulonguka :**

37 Ebuna Yesu tubilaka balonguka na Yandi nde : « Kieleka, bambuma kele mingi na bilanga, kansi bantu ya kisalu kele fioti.

38 Yo yina, lomba Nkwa-Bilanga kutinda bantu ya kisalu na kukatula bambuma na Yandi. Matayo 9 :37-38

✚ **Invitatio sambu na bo yina me yamba Yesu ntete ve :**

Nge mosi, keti nge kuwa Mpeve ya Nzambi ke songa nge nde nge kele na mfunu ya Yesu ? Kuwa ndinga yina. Kwisa na Yesu bubuyai. Tula ntima na Yandi. Yandi me sila kuvulusa konso muntu yina kwisa na Yandi.

NSUKA YA LESO 29

⠀ **Kana ntangu lunga, longa ndambu mikanda ya Bible. Bangindu kele na nsuka ya mukanda yai.**



Yesu songaka balonguki na Yandi nde bo lomba Nzambi kutinda bantu ya kisalu sambu na kukatula bambuma na bilanga na Yandi. Beto lomba Nzambi kutinda bamisionere mingi, baevangeliste mingi, bapasteur mingi, bamoniteur ya ecodim mingi. Bantu yina ke songa bantu nsangu ya Yesu, bo kuma mingi ya kuluta.

Ebuna Yesu tubilaka balonguka na Yandi nde :

« Kieleka, bambuma
kele mingi na
bilanga, kansi bantu
ya kisalu kele fioti.

Yo yina, lomba
Nkwa-Bilanga
kutinda bantu ya
kisalu na kukatula
bambuma na Yandi.

Matayo 9 :37-38

Leso 30 Bantu ya bwala ya Yesu buyaka Yandi mbala ya zole.

Marko 6 :1-6

I. PREPARATIO SAMBU NA MONITEUR-

◎ Kikuma ya Leso :

Beto tula ntima mingi na Yesu na mambu yonso.

☛ Bankunga ya kwenda nzila mosi ti lesò :

Nzambi Ta Kuwa Nge

♥ Verse ya Kulonguka :

Revise diaka : (Yesu nde :) « ...Zaba nde Tata na beno kele na zulu ta pesa mpenza bima ya mbote na bantu yina ke lombaka Yandi yo ! » Matayo 7 :11

II. REVISIO

↑ Kuyindula diaka baleso me luta :

Beto me mona nde bantu mingi, mingi ziungaka Yesu sambu na kumona Yandi mpi sambu na kuwa malongi na Yandi. Ya nkaka ndimaka ti landaka Yandi, kansi ya nkaka buyaka.

III. KULONGA LESO YAI

➔ Kuyantika :

Nki mutindu bantu ya bwala na yandi monaka Yandi—bantu ya Nazareti, sika Yesu yelaka na kimwana na Yandi ?

❖ Malongi ya nene ya lesò yai (developpement) na banti 4 :

30.1 Yesu ti balonguki na Yandi kwendaka na Nazareti. Kuna, Yesu longaka na Nzo-Nzambi.
Marko 6 :1-2a

BOOK Tangila bana baverse yai :

1 Yesu katukaka pana ti kwisaka na bwala na Yandi (Nazareti, sika Yesu zingaka na kimwana na Yandi), ti balonguki landaka Yandi.

2a Ebuna na lumbu ya bisambu, Yandi yantikaka kulonga na Nzo-Nzambi ya Bayuda

? Yula bana

☛ Bana sala bageste to mwa-senete

☛ Bana yimba ti kina

30.2 Bantu mingi vandaka kuyituka na malongi na Yandi. Bo bakisaka ve, sambu bo zabaka fami na yandi. Yo yina, bo bakaka yandi kaka bonso muntu. Marko 6 :2b-3

BOOK Tangila bana baverse yai :

2b Ti bantu mingi ya waka yandi vandaka kuyituka. Bo vandaka kudiyula nde : ‘Muntu yai me baka malongi yai wapi ? Yandi me baka mayele mutindu yai wapi ? Nki mutindu Yandi ke sala bimpa ya nene mutindu yai ?

3 Keti yai kele ve sharpentie ya bwala ? Mwana ya Maria ? Mbuta ya Yakobo, Yosesi, Yude ti Simoni ? Keti baleki na Yandi ya bankento kele ve awa ti beto ? Yo yina bo vandaka na mabanza ya kubuya Yandi.

? Yula bana

☛ Bana sala bageste to mwa-senete

☛ Bana yimba ti kina

30.3 Yesu tubaka nde bantu yonso ke zitisa profete, kansi na bwala na yandi ti na fami na yandi, bo ke zitisa yandi ve. Marko 6 :4

BOOK Tangila bana baverse yai :

4 Ebuna Yesu tubilaka bo nde, « Bo ke zitisaka profete ndambu yonso, kansi na bwala na yandi ti na dikanda na yandi, bo ke zitisaka yandi ve. »

? Yula bana

☛ Bana sala bageste to mwa-senete

☛ Bana yimba ti kina

30.4 Yesu belulaka kaka ndambu ya bantu kuna, sambu bo kwikilaka Yandi ve. Yo yina, Yandi kwendaka na babwala ya nkaka. Marko 6 :5-6

BOOK Tangila bana baverse yai :

5 Ebuna Yandi monaka mpila ve kusala bimpa ya nene kuna. Kaka Yandi tulaka ndambu ya bantu ya maladi maboko ti belulaka bo.

6 Ti Yandi yitukaka sambu na mpila bo kondaka lukwikilu. Ti Yandi kwendaka kulonga na babwala ya nkaka penepene.

? Yula bana

 **Bana sala bageste to mwa-senete**

 **Bana yimba ti kina**

>|< Kumanisa Malongi :

Na bwala ya kimwana ya Yesu, bantu monaka Yandi kaka bonso muntu. Bo zabaka fami na Yandi yonso. Yo yina bo monaka Yandi bonso muntu ya nkaka ya bwala. Ata bo monaka bimpa, bo vandaka na mpasi na kukwikila. Yo yina, Yesu salaka bimpa mingi ve na kati na bo. Yandi basikaka nswalu kukwenda kulonga na bisika ya nkaka.

Beto vanda ve bonso bwala ya buyaka Yesu. Beto yamba Yesu Kristo ti tula Yandi ntima na mambu yonso.

 **Devoir sambu na bakristo :**

Devoir mono ke pesa beno bakristo na mposo yai, yo yai : Na mambu yonso ya kwisila nge, tula ntima na Yesu ti sosa lusadisu na Yandi.

 **Bankunga ya kwenda nzila mosi ti lesò :**

Nzambi Ta Kuwa Nge

 **Verse ya Kulonguka :**

Revise diaka : (Yesu nde :) « ...Zaba nde Tata na beno kele na zulu ta pesa mpenza bima ya mbote na bantu yina ke lombaka Yandi yo ! » Matayo 7:11

 **Invitatio sambu na bo yina me yamba Yesu ntete ve :**

Probleme na beto ya kuluta ngolo ikele ve maladi. Yo kele masumu. Beto me zwa makambu ya ngolo ti Ngangi, sambu beto me landa nzila na beto mosi. Beto me landa ve bansiku na Yandi. Beto me sala ve yina ya ke pesa Yandi kiese.

Nzambi monaka probleme na beto, ti Yandi mosi pesaka mvutu sambu na yo. Yandi tindaka Mwana na Yandi Yesu, yina me zinga na zulu ti Yandi mvu ya mvu. Yesu pesaka menga na Yandi makabu sambu na kufuta mfuka ya masumu na beto na zulu ya kulunsi. Nzambi tedimisaka Yandi na lufwa.


Keti nge me ndima yina ya Yandi salaka sambu na nge ? Keti nge me balula ntima, me bika mabanza ya kulanda nzila ya nge mosi, me tula ntima na Yandi ? Kana nge me yamba Yandi ntete ve, zaba

nde Yandi kele kukinga nge kubinga zina na Yandi, kutula Yandi ntima.

NSUKA YA LESO 30

 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 30



Bantu ya bwala Nazareti zabaka Yozefi ti Maria ti baleki ya Yesu ya babakala ti ya bankento. Bo monaka yandi bonso mwana ya bwala. Yo yina, bo buyaka Yandi. Mawa !

Leso 130

« ...Zaba nde Tata na
beno kele na zulu
ta pesa mpenza
bima ya mbote na bantu
yina ke lombaka Yandi
yo !

Matayo 7:11

Leso 31 Yesu tindaka balonguki na Yandi zole-zole.

Marko 6 :7-13

I. PREPARATIO SAMBU NA MONITEUR-

◎ Kikuma ya Leso :

Beto sadisa bantu ya ke samuna ndinga ya Nzambi.

♥ Verset ya Kulonguka :

(Yesu nde :) *Mono ke tubila beno mambu ya kieleka : Konso muntu yina ta pesa beno dikopa ya masa ya kunwa sambu beno kele bantu na Mono, yandi ta vila matabisi na yandi ata fioti ve. »*

Marko 9 :41

↖ Bankunga ya kwenda nzila mosi ti lesò :

Beto Bakristo Sadisana
Sambilia Bantwadisi Nzambi

II. REVISIO

↑ Kuyindula diaka baleso me luta :

Beto me mona nde Yesu tambulaka na babwala mingi kulonga, kusamuna, ti kubelula bantu. Kansi Yesu vandaka muntu mosi, ti Yesu me songa bo nde kisalu vandaka nene.

III. KULONGA LESO YAI

→ Kuyantika :

Yesu solaka balonguki kumi na zole. Bo me landa Yandi, bo me wa malongi na Yandi, ti bo me mona Yandi belula bantu ti basisa bampeve ya mbi. Na nima, Yesu tindaka bo, bo kwenda kumwanga nsangu na Yandi na bantu ya nkaka.

🕸 Malongi ya nene ya lesò yai (developpement) na banti 4 :

31.1 Yesu bingaka balonguki 12, bo kwisa na Yandi. Yandi pesaka bo kiyeka na zulu ya bampeve ya mbi, ebuna Yandi yantikaka kutinda bo na bisika ya nkaka, zole-zole.

Marko 6 :7

📖 Tangila bana baverse yai :

7 Ebuna Yesu bingaka bantumwa kumi na zole bo kwisa na Yandi, ebuna Yandi pesaka bo kiyeka na zulu ya bampeve ya mbi.

? Yula bana

↖ Bana sala bageste to mwa-senete

↖ Bana yimba ti kina

31.2 Yesu songaka bo nde bo kwenda maboko mpamba. Bo nata kaka nti ya kutambula ti basandali na makulu na bo. Marko 6 :8-9

📖 Tangila bana baverse yai :

8-9 Yandi songaka bo kukwenda kukonda kunata bima ya mfunu sambu na voyage. Bo kwenda ve ti saki to mampa to mbongo na poshe to bilele zole. Bo kwenda kaka na nti ya kutambula ti sandali na makulu.

? Yula bana

↖ Bana sala bageste to mwa-senete

↖ Bana yimba ti kina

31.3 Bantu ya yamba balonguki ya Yesu, bo ta pesa bo yonso bo ke na yo mfunu. Marko 6 :10-11

📖 Tangila bana baverse yai :

10 Yandi songaka bo nde, « Na konso sika beno kota nzo mosi, lala kaka na nzo yina tii ntangu beno bika bwala yina.

11 Bo yina yamba beno ve to wila beno ve, ntangu beno basika na bwala yina, beno nikisa makulu ya beno sambu na kukatula pusiere ya sika yina, sambu na kusonga bantu yonso mpila bo me sala mbi. Kieleka, bo ta baka ndola na lumbu ya zuzema kuluta yina ya babwala Sodomie ti Gomora !

? Yula bana

↖ Bana sala bageste to mwa-senete

↖ Bana yimba ti kina

31.4 Yo yina, balonguki kwendaka : kusamuna nde bantu balula ntima, kubasisa bampeve ya mbi, ti kubelula bantu ya maladi. Mark 6 :12-13

📖 Tangila bana baverse yai :

12 Yo yina, bo kwendaka, bo samunaka nde bantu fweti balula ntima.

13 Ti bo basisaka bampeve ya mbi mingi, bo

*pakulaka bantu ya maladi mingi mafuta ti
belulaka bo.*

?

Yula bana

Bana sala bageste to mwa-senete

Bana yimba ti kina

>|< Kumanisa Malongi :

Bantumwa ya Yesu kwendaka kusala kisalu na bo kukonda bima ya vandaka mfunu sambu na luzingu. Yesu zolaka bo zaba nde Nzambi ta lunda bo, ti Yandi zolaka bantu ya yambaka bo kusadisa bo na yonso bo vandaka na yo mfunu. Beto yina kuwa ndinga ya Nzambi kele na privilaz ya kusadisa bantu ya ke longa beto.

❖ Devoir sambu na bakristo :

Beno bakristo, nki mutindu nge lenda sadisa bantu ya ke longa nge ndinga ya Nzambi ? [Moniteur, bana pesa bangindu na bo. Bo lenda sambila bo Nzambi, pesa bandinga ya enkurazema, komba lupangu na bo, natila bo nkuni to masa, pesa bo oranze, avocat to ndambu nguba, etc.]

♥ Verset ya Kulonguka :

(Yesu nde :) *Mono ke tubila beno mambu ya kieleka : Konso muntu yina ta pesa beno dikopa ya masa ya kunwa sambu beno kele bantu na Mono, yandi ta vila matabisi na yandi ata fioti ve. »*
Marko 9 :41

❖ Bankunga ya kwenda nzila mosi ti lesò :

Beto Bakristo Sadisana

Sambila Bantwadisi Nzambi

† Invitatio sambu na bo yina me yamba Yesu ntete ve :

Kana nge me yamba Yesu Kristo ntete ve, keba !
Nge kele bonso babwala ya waka malongi ya bantumwa, kansi wilaka yo ve. Yesu tubaka nde ndola na bo ta luta yina ya bwala Sodomi. Keti beno bambuka bwala yina ya mbi ? Beto tanga histoire na yo na mukanda ya ntete ya Bible. Nzambi losaka bo tiya ti mungwa. Yandi fwaka bwala ya mvimba na tiya yina, sambu na mbi na bo.

Beto yonso me sala mbi na meso ya Nzambi. Yandi lenda ve pesa nzila nde mbi kota na bwala na

Yandi. Kana beto balula ntima ve, kaka tiya ya bilungi ke vingila beto.

Kansi beno fweti kwenda kuna ve. Nzambi pesaka Mwana ya kitoko na Yandi Yesu Kristo, ti Yesu fwaka na sika na beto. Yandi telamaka na lufwa. Kana beto balula ntima ti yamba Yandi, Yandi ta gulusa beto. O, vanda ve bonso babwala ya buyaka, kansi vanda bonso bo ya yambaka Yesu Kristo na ntima na bo!

NSUKA YA LESO 31

¶ Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 31



Yesu tindaka balonguki na Yandi zole-zole. Yandi songaka nde bantu ya yambaka bo ti sadisaka bo, makabu na bo lenda vila ve.

Leso 31

Mono ke tubila beno mambu ya kieleka :

**Konso muntu yina ta pesa beno dikopa ya masa ya kunwa sambu beno kele bantu na Mono,
yandi ta villa matabisi na yandi ata fioti ve. »**

Marko 9 :41

Leso 32 Kutuba ya buzoba ya Erode natilaka yandi makambu.

Marko 6 :14-28

I. PREPARATIO SAMBU NA MONITEUR-

◎ Kikuma ya Leso :

Beto keba na mpila beto tuba, sambu kutuba ya mpamba lenda natila beto makambu.

♥ Verse ya Kulonguka :

Kaka na kima mosi yai munoko bantu ke pesaka mersi ti ke singaka bantu ya nkaka. Bampangi na mono, mambu yina lunga vanda mpidina ve.
Yakobo 3 :10

♣ Bankunga ya kwenda nzila mosi ti leso :

Nto Mosi
O Keba Munoko Nki Nge Tuba (mpamba-mpamba ve !)

II. REVISIO

↑ Kuyindula diaka baleso me luta :

Na mposo me luta, beto monaka nde Yesu tindaka bantumwa 12 na Yandi kusamuna ti kusala kisalu na Yandi na babwala ya nkaka. Ntangu bo vutukaka na Yesu, bo vandaka na rapport ya kisalu ya kiese, kansi rapport ya mawa mpi.

III. KULONGA LESO YAI

➔ Kuyantika :

Rapport ya mawa vandaka kutadila Mfumu ya sika yina—Mfumu Erode. Yandi tubaka na mpila mosi ya buzoba, ti makambu ya nene landaka.

❖ Malongi ya nene ya leso yai (developpement) na banti 4 :

32.1 Mfumu Erode waka boma nde Yesu lenda vanda Yoane Baptiste me telama na lufwa, sambu yandi me zenga Yoane ntu. Marko 6 :14-17a

❖ Tangila bana baverse yai :

14 Ntangu yai, Erode Antipasi waka bantu ke tuba sambu na Yesu, sambu zina na Yandi me zabanaka mbote. Erode tubaka nde, « Yandi

Yoane Baptiste me telama na lufwa ! Yo yina Yandi kele na ngolo kusala bimpa yai !

17a Sambu yandi mosi me tinda bantu kusimba Yoane, kukanga yandi na boloko...

? Yula bana

✗ Bana sala bageste to mwa-senete

✳ Bana yimba ti kina

32.2 Yandi fwaka Yoane mutindu yai: Nkento ya Erode salaka lukanu ya mbi sambu Yoane kufwa. Yandi zolaka Yoane ve sambu yandi songaka Erode nde makwela na bo vandaka kulanda nsiku ve. Marko 6 :17b-20

❖ Tangila bana baverse yai :

17b (Erode) salaka mpidina sambu na kupesa kiese na...nkento ya mbuta na yandi Filipo, sambu yandi me kwela yandi.

18 Yandi salaka mpidina sambu Yoane songaka yandi nde, « Nsiku ke pesa nge ve nzila kukwela yandi. »

19 Yo yina (nkento yina) bakaka Yoane kimbeni. Yandi zolaka kufwa yandi, kansi yandi monaka mpila ve.

? Yula bana

✗ Bana sala bageste to mwa-senete

✳ Bana yimba ti kina

32.3 Kansi lumbu mosi, makina ya mwana na yandi pesaka Erode kiese. Kukonda kuyindula mbote, Erode silaka kupesa yandi konso yina yandi ta lomba. Mama na yandi songaka yandi kulomba ntu ya Yoane. Aii ! Marko 6 :21-25

❖ Tangila bana baverse yai :

21-22 Okasio monikaka lumbu mosi na fete ya lubutuku ya Erode... Mwana-nkento ya (nkento na yandi) vandaka kukina, ti yo pesaka yandi kiese... Ebuna Erode songaka yandi nde: “Lomba mono konso kima nge zola, ti mono ta pesa yo.”

24 Yandi basikaka ti yulaka mama na yandi, “Mono ta lomba yandi nki ?” Ti mama vutulaka nde, “Ntu ya Yoane !”

25 Nswalu yandi vutukaka na Mfumu ti pesaka mvutu nde "Mono zola nge kupesa mono nswalu ntu ya Yoane na zulu ya dilonga."

? **Yula bana**

🏃 Bana sala bageste to mwa-senete

🧠 Bana yimba ti kina

32.4 Mpila Erode me sila mwana ya Erodiade, yo me kanga yandi. Bandinga ya mpamba na yandi me natila yandi makambu ! Na mawa, Erode tindaka ndinga nde bo zenga Yoane ntu. Marko 6 :26-28

📖 Tangila bana baverse yai :

26 Mfumu waka mawa mingi mpenza, kansi sambu na mpila yandi me tuba ti bantu yina me wa kutuba na yandi, yandi monaka mpila ve kubuya yandi.

27 Nswalu Mfumu tindaka muntu sambu na kufwa yandi, kunata ntu na yandi. Muntu yina fwaka Yoane na boloko,

28 yandi kwisaka na ntu yina na zulu ya dilonga, ti pesaka mwana-nkento, ebuna mwana pesaka yo na mama na yandi.

? **Yula bana**

🏃 Bana sala bageste to mwa-senete

🧠 Bana yimba ti kina

>|< Kumanisa Malongi :

Mfumu Erode vandaka kuzola kuwa malongi ya Yoane. Yandi vandaka kusadisa Yoane mutindu na mutindu. Kansi lumbu mosi yandi tubaka kima mosi ya buzoba. Yandi tubaka kukonda kuyindula. Na nima, yandi monaka nde nkento na yandi me kanga yandi na mutambu na yandi.

Yo lombaka nde yandi sala mambu mosi terrible—kufwa muntu ya yandi monaka mbote ! Kufwa Yoane ! Erode me sila, ti yandi zolaka ve bantu kumona bonso yandi tubaka luvunu. Yo yina yandi salaka mambu yina ya mbi. Beto zaba nde yo pesaka yandi mpasi na ntima, sambu ntangu yandi waka mpila Yesu vandaka kusala bimpa, yandi waka boma nde Yesu vandaka Yoane me telama na lufwa. O, beto keba mpila beto tuba ! Kutuba ya

mpamba-mpamba lenda natila beto makambu ya beto yindula ve.

👉 Devoir sambu na bakristo :

Bana bakristo, devoir mono ke pesa beno mposo yai, kuyindula mbote na ntawala nge tuba. Sosa kutina kutuba yonso ya mpamba-mpamba. Mpidina, yo natila nge mpasi ve na nima.

❤️ Verse ya Kulonguka :

Kaka na kima mosi yai munoko bantu ke pesaka mersi ti ke singaka bantu ya nkaka. Bampangi na mono, mambu yina lunga vanda mpidina ve.

Yakobo 3 :10

🧠 Bankunga ya kwenda nzila mosi ti leso :

Nto Mosi

O Keba Munoko Nki Nge Tuba (mpamba-mpamba ve !)

✚ Invitatio sambu na bo yina me yamba Yesu ntete ve :

Kutuba mpamba-mpamba kele disumu mosi.

Kufwa muntu kele disumu. Kumenga muntu kele masumu. Beto yonso me sala masumu. Beto me fwa bansiku ya Nzambi.

Nzambi kele ya longo. Sika Yandi ke zinga kele ya longo. Nzambi lenda pesa nzila ve masumu kukota kuna. Yai kele probleme ya nene sambu na beto, bantu ya mbi.

Kansi nsangu ya mbote kele nde Yesu Kristo, Mwana ya Nzambi, kwisaka kugulusa bantu ya masumu. Yandi futaka mfuka yonso ya masumu na beto na zulu ya kulunsi. Yandi telamaka na lufwa. Yandi ta gulusa nge bubu kana nge balula na nzila ya masumu, nge kota nzila na Yandi, nge tula Yandi ntima. Konso ntangu, kana muntu ke na mfunu ya lusadisu na mambu ya mpulusu, beto ta vanda na kiese kusolula ti yandi na nima ya ecodim.

NSUKA YA LESO 32

📘 Kana ntangu lunga, longa ndambu mikanda ya Bible. Bangindu kele na nsuka ya mukanda yai.

Leso 32



Erode zolaka kukina
ya mwana ya nkento
na yandi. Kukonda
kuyindula, yandi
silaka kupesa yandi
konso kima yandi
zolaka. Kutuba ya
mpamba nataka
yandi makambu !

Kaka na kima mosi yai
munoko bantu ke pesaka
mersi ti ke singaka bantu
ya nkaka. Bampangi na
mono, mambu yina lunga
vanda mpidina ve.

Yakobo 3 :10

Karte geografika yai ke songa barayon ya Galilea, Samaria, ti Yudea na kati ya ntoto ya Israele na ntangu ya Yesu.

Kulere blue ke songa masa.



Linya ya Ntangu—Luzingu ya Yesu Kristo

Nsuka ya Kuwakana ya Ntama

Mukanda ya Malashi

400


Av. J.-C.



Nzambi
Pima

0





1

Ap. J.-C.

12

Ap. J.-C.

30


Ap. J.-C.

Bamvula na nima ya Yesu


Luyantiku ya kisalu na Galilea- Bantu mingi landaka Yesu



Yesu yantikaka kusala bimpa.
Yandi belulaka bantu mingi ya
maladi mutindu na mutindu,
ti basisaka bampeve ya mbi.



Yesu bingaka balonguki
ya ntete, ti bo songaka
bampangi na bo nde
Yandi Mesia.



Yesu longaka bantu mosi-mosi, na
kati ya Nzo-Nzambi, ti bafoule ya
bantu mpi na konso kisika. Malongi
na Yandi vandaka mbote ti na kiyeka.
Bantu mingi landaka Yandi.

30
Ap. J.-C.

Bamvula na ntangu ya Yesu

31
Ap. J.-C.

Bankunga beto sadila na mukanda yai :

Moniteur, NB : Balongi ya kuluta mbote sadila bankunga ya ke kwenda nzila mosi ti lesò to kikuma ya lesò. Kana nge zaba ve bankunga na mukanda yai, nge lenda tula bankunga ya nkaka, KANA yo kwenda nzila mosi ti kikuma ya lesò.

Kana nge longa bana nkunga ya mpa, mbote kuyimba yo diaka bamposo mingi na ntangu na ntwala (ti na nima) ya ecodim, na mpila nde bantu lenda simba yo mbote.

Baka Lukumu

Na luzingu na mono
Baka lukumu
Baka lukumu
Na luzingu na mono
Baka lukumu bubu.

Balobi ya Bantu

Mo' ta longa beno kuloba bantu
Kuloba bantu, Kuloba bantu
Mo' ta longa beno kuloba bantu
Kuloba bantu, Kuloba bantu
Kaka landa Mono
Kaka landa Mono >
Kaka landa Mono (Aleluya)
Mo' ta longa beno kuloba bantu
Kaka landa Mono !

Bana ya Fioti Yonso

Bana ya fioti yonso ya kwikila na Yesu
Lenda kukota zulu na nzila na Yandi
Sambu kana mwana ndima
Yesu na ntima na yandi
Mwana yina me kuma
Mukwikidi na Yesu !

Banzambi ya Nkaka

Banzaaa-mbi ya nkaka
Bantu me sala yo
Nge kaka ke Nzambi
Ya salaka beto ! (O Yesu) [repeter yonso]

Beto Bakristo Sadisana

Beto bakristo sadisana
Beto bakristo sadisana
Beto bakristo sadisana
Yo kele mbote.

Beto bakristo enkurazana (3X)
Yo kele mbote.

Beto Mene Kutana

Beto yonso me kwisa
Beto mene kutana 3x
Kusambilà
O-o sambila Mfumu na beto !

Beto Me Wa

Beto me wa Ndinga ya Nzambi (3x)
Bika yo kota mbote.

Bika yo kota mbote mingi (3X)
Ndinga ya Nzambi!

Bu Basantu Kota Zulu Bu Yesu Kele na Mono

Bu basantu kota zulu
Bu basantu kota zulu
Mono zola vanda na katì
Bu basantu kota zulu

Bu Yesu Kele na Mono

Bu Yesu kele na mono
Ngemba kele ! Ngemba kele !
Ngemba kele !
Bu Yesu kele na mono
Ngemba kele, na ntima na mono !

Ngemba ! Ngemba ! Ngemba ! Ngemba !
Bu Yesu kele na mono,
Ngemba kele
Na ntima na mono !

Ee, Mfumu, Ee

Ee, Mfumu, ee
 Na yonso ya Nge tuba
 Ee, Mfumu, ee
 Mono zola lemfuka

Mvutu:

Bu mo' tanga Bibila
 Mono kaka ta ndima
 Ye mono ta tuba ee,
 Mfumu, ee !

Kana Beno Ke Zolaka Mono

Kana beno ke zolaka Mono (3x)
 Beno ta lemfuka.

Kana Nge Me Vuluswa, Tubila Bampangi

Kana nge me vuluswa XX
 Tubila bampangi XX
 Nsangu X XX Ya Yesu X XX

Kana Satana Kwisa

Kana Satana kwisa, }
 Mono buya ! } 3x
 Mono ta landa kaka Yesu !

Kieleka Nge Ke Nene

Kieleka Nge ke nene ! (2x)
 Banzio fukumina
 Zulu ti ntoto mpi
 Kieleka, Nge ke nene !

Kielo Kaka Mosi

Kielo kaka mosi
 Ya kwenda na zulu
 Ee, Kielo yai ke Yesu
 Ya zinga mvu ya mvu

 Kielo kaka mosi
 Keti nge mene kota ?
 Yesu ke binga nge
 Kwisa, Kukota, ee !

Kitoko, Kitoko

Kitoko ! Kitoko ! Yesu, Mfumu na Beto
 Kitoko ! Kitoko ! Zitisa zina na Yandi !

Mvutu :

Mfumu ya Bamfumu yonso
 Lukumu na zina na Yandi
 Bubu, ye mvu ya mvu
 Mono ta landa kaka Yandi.

Kizitu Yonso

Kizitu yonso mene katuka
 Me katuka, Me katuka
 Kizitu yonso mene katuka
 Bu Yesu me kwisa ! Ah !

Kumisa Zina ya Yesu

Kumisa Zina ya Yesu (2x)
 Ditadi na mono
 Ngolo na mono
 Mvulusi na mono
 Ye lukwikilu !
 Zitisa zina ya Ye-e-e-su !

Kwenda Nord, Kwenda Sud

Kwenda nord
 Kwenda sud
 Kwenda na gauche et droite
 Beto kwenda
 Beto kwenda
 Na nsangu ya mbote

Kwisa na Yesu Kristo

Kwisa na Yesu Kristo (3X)
 Nge ata guluka !

Lomba na Nzambi Kaka

Beto fweti lombila
 Na Nzambi, Yandi kaka
 Ata muntu mosi ve
 Ya nkaka lenda sadisa !

Mvutu:

Lomba na Nzambi !
 Na Nzambi kaka
 Lomba na Nzambi
 Na zina ya Yesu !

Yesu fwaka na kulunsi,
 Yandi fwilaka mono.

Mono zola Yesu Ngulusi,
 Yandi zola mono, mpi.

Mazono, Bubu, Mvu ya Mvu

Mazono, bubu mvu ya mvu,
 Yesu mutindu mosi !
 Bantu yonso kulenda changer,
 kansi Yesu ve.
 Nkembo kwa yandi ! Nkembo kwa Yandi !
 Bantu yonso kulenda changer,
 kansi Yesu ve.

Mwana Yina Nani ?

Mwana yina nani?
 Yesu !
 Mwana yina nani ?
 Yesu !
 Yandi Mesia
 Mwana ya Nzambi
 Nani ? Yesu !

Mono Kele na Nzo Kitoko

Mono kele na nzo kitoko
 Kuna n'zulu !
 Mono kele na nzo kitoko
 Kuna n'zulu !
 Mono kele na nzo kitoko
 Kuna n'zulu !
 Mono kele na nzo kitoko
 Kuna na zulu ! (O Nzambi !)

Nani Kele Ngolo ?

Nani kele ngolo ?
 Nzambi ikele ngolo
 Kuluta bantu yonso.

Nani Ta Lemfuka ?

Nani ta lemfuka ?
 Mono ta kulemfu-uka
 Na yonso Nzambi tuba.
 (Beto ta kulemfu-uka)

Ngolo Yonso Nzambi Me Pesa na Nge

Ngolo yonso Nzambi me pesa na nge
 Ngolo yonso Nzambi me pesa na nge
 Kwenda na bansi yonso, Samuna Yesu !
 Mo' ta vila nge ve, 'ta fioti !

**Mono Me Sila Kulanda Yesu (verse 3, Ata Mpasi
Ikele, Mo' Ta Landa Kaka)**

Mono me sila kulanda Yesu (3X)
 Kuvutuka, yo lunga ve.
 Ata mpasi ikele (3x)
 Mo' ta landa kaka
 Kuvutuka, yo lunga ve.

Nto Mosi

Nto mosi ya masa
 Yo lenda basisa
 Basisa bamasa ve
 Ya mbote ti ya ndudi.

Nzambi Ta Kuwa Nge

Nzambi ta kuwa nge (3X)
 Na zina ya Yesu !
 Yandi ta sadisa (3X)
 Na zina ya Yesu !

Mono Zola Yesu Ngulusi

Mono zola Yesu Ngulusi,
 Yandi zola mono, mpi.

O Keba Munoko Nki Nge Tuba (mpamba-mpamba ve !)

O Keba Mutindu Nge Kusadila (Sadila!)
 Bima yonso ya Nzambi mene pesa (Me Pesa!)
 Sambu Tata na Zulu
 Yandi kele mona nge
 O Keba mutindu nge kusadila (Sadila!)

Yesu Ke Nzila

Yesu Ke Nzila
 Kwenda na zulu
 Kwenda na zulu
 Kwenda na zulu
 Yesu Ke Nzila
 Kwenda na zulu
 Beto Yangalala !

Sambila Bantwadisi Nzambi

Sambila bantwadisi Nzambi
 zitisa bo mpi
 Sambila bantwadisi Nzambi
 Kuzitisa bo mpi
 Sambila bantwadisi Nzambi
 Zitisa bo mpi
 Sambu yai pesa Nzambi kiese

Sika Yonso Mono Kwenda na Yesu, vs. 1 & mvutu

Sika yonso mono kwenda na Yesu
 Mono landa Yandi na nzila yonso
 Kana Yandi kele ve, ntantu kele,
 Kana Yesu kele, mono tita ve.

Mvutu --

Na diboko n'Yandi, boma kele ve !
 Nzila yonso mono kwenda na Yesu.

Sosa Ntete

Sosa ntete Kimfumu ya Zulu,
 Ye lunungu na Yandi
 Bima yonso Yandi ta yika na nge !
 Alelu, Aleluya !

Yesu Ikle Awa

Yesu ikele awa
 Yesu ikele awa
 Yesu ikele awa-na beto !
 (Repeter 2 x)

MVUTU: (Ya kieleka)

Aleluya ! (a-a) aleluya ! (Aleluya !)
 Aleluya ! Na Yesu ! (Yesu, Mwana-Nzambi)
 Aleluya ! (a-a) aleluya !
 Aleluya ! Na Yesu !

Bangindu nki mutindu kulonga mikanda ya Bible :

Moniteur, NB:

Na nsuka ya konso leso, nge ta mona sugzestio nde kana ntangu lunga na nima ya ecodim, nge lenda longa mikanda ya Bible. Nge ta sala yai malembe-malembe, ndambu-ndambu. Kana leso fulusa ntangu na nge yonso, kima ve. Kana longa ndambu ya mikanda ya Bible na bilumbu ya nge manisa na ntangu ya mbote. Nge lenda sola konso mposo kusala mosi ya mambu yai:

Kutuba mikanda ya nsangu ya mbote.

Mikanda ya nsangu ya mbote kele yina ya ke songa beto luzingu ya Yesu Kristo. Bantu iya ya me mona Yandi ti ya me wa Yandi ti ya me tambula sikamosi ti Yandi, bo sonikaka mikanda yai, ti Mpeve ya Nzambi vandaka kutwadisa bo.

Mikanda ya Nsangu ya Mbote :

Matayo

Marko

Luka

Yoane

Bana repete yo mosi-mosi na nima na nge. Na nima, bo tuba yo bo mosi na ritima.

Bana tuba mikanda ti aksio:

Bo tuba mikanda yai na ndonga ti aksio—kubula maboko, kubula makulu, kunikisa ntu, kunikisa nitu ya mvimba mutindu na mutindu.

Bana yimba nkunga ‘Mikanda ya Nsangu ya Mbote’:

MIKANDA YA NSANGU YA MBOTE

Mikanda ya mbote, ya Yesu, Mvulusi

Mikanda ya mbote ikele iya :

Matayo, ti Marko, ti Luka, ti Yoane.

Mikanda ya mbote ya Yesu, Mfumu.

Bana yimba ti kina :

Kana bana me zaba nkunga yina mbote, bo sala cercle. Bo yimba nkunga ti kina na cercle. Konso mbala bo manisa nkunga, bo tuba mikanda yina na ritima, kaka kulanda kukina. Bo sala yo mbala sambanu.

Bana sonika mikanda :

Nge moniteur songa karte ya kele na mikanda yina ya kusonika. Baka mikanda mosi-mosi, na ndonga. Ntete bana tuba balettre na yo.

M-a-t-a-y-o etc.

Na nima, bo tuba balettre, ti mbala mosi, bo ‘sonika’ lettre yina na mupepe na musapi na bo.

Kana bo me sala yo, na mposo na nima, pesa bo bakrayo ti kitina ya papier. Bo sonika yo. (Sadisa bana ya mona yo mpasi.) Kana nge ke na bwala kukonda papier, pesa bo nti. Bo basika na nganda ti sonika yo na zelo.

Na bamposo ke kwisa, nge lenda lomba mwana zole to tatu (selo nene ya tableau) kusonika yo na tableau na kre.

Nki mukanda ?

Na ntwala ya ntangu ya ecodim, nge moniteur sonika mikanda iya yina na bakarte iya. Balula ordre na yo. Bana iya songa bakarte yina. Nge yula bo ya nkaka, nki karte ke songa Matayo? (Bo sola karte yina.) Nge tula mwana ya kele na Matayo na luyantiku ya ndonga. Landa yula ‘Nki karte ke songa Marko?’ etc. ti sala kiteso mosi na bakarte yonso.

Kumona yo na Bible

Nge moniteur songa bana wapi mikanda yai kele na kati ya Bible. Songa bo mutindu titre ya mukanda kele na zulu ya dititi. Na nima, kana mpila ikele, nge sosa baBible ya nkaka, bo sosa kumona yo bo mosi. Kana bana ya nkaka kwisa na ntwala ecodim yantika, nge lenda lomba bo kusosa mikanda yai.

Bangindu nki mutindu kulonga baverse ya Bible :

Moniteur, NB!

Beto ke pesa na konso leso verse mosi ya kwenda nzila mosi na leso yina, sambu yo sadisa malongi yina kukota mbote-mbote na bana. Kulonga verse, bana fweti tuba yo mbala sambanu to kuluta kana yo kele ya nda.

Kansi kaka kutuba yo, kutuba yo, kutuba yo mbala sambanu ta lembisa bana. Bo ke na mfunu ya repetisio (kutuba yo mbala mingi) TI variete (kutuba yo mutindu na mutindu to mpila ya kele kiese, bonso nsaka to kuyimba/kukina.) Yo yina, beto ke pesa bangindu yai nki mutindu kutwadisa bo kutuba yo mbala mingi na mpila ya ta lembisa bo ve.

Na nsuka ya konso leso, nge ta mona foto ya ke songa mambu mosi na leso yina, ti verse ya kulonguka na bisono ya nene. Sadila verse yina bonso karte ya kusonga bana ntangu nge ke longa bo verse.

Yantika na bafraze ya nkufi, ti kangisa yo malembe-malembe :

Yantika ve na verse ya mvimba, kansi na fraze mosi ya nkufi—bandinga mosi, zole, to tatu. Bana repete na nima ya nge. Na nima, kangisa bafraze, bo repeter fraze ya kuluta nda. Landa kusala yo tii ntangu ya bo ke repete verse ya mvimba (to kana yo kele ndambu nda, bo tuba yo na bafraz zole to tatu). Konso mbala bo manisa verse, bo tuba reference (addresse) sika yo ke monika na Bible. Par exemple, Yoane 3 :16.

Bagroupe ya bana tuba yo :

Bana ya ke lwata koulere bleu, bo telama ti tuba verse, bo ya me lungisa bamvula nana, bo ya me dia sakasaka mazono, bo ya zole kubula futbol, bo ya kele mbuta na kati ya fami, bo ya ke lwata sandali, etc. (Yai kele mbandu.)

Balula mpila bo ke telama :

Bo balula ti tuba yo, bo tourne na gauche, na droite. Bo telama na misapi ya makulu, bo vanda, bo nangula diboko, bo fukama, bo simba dipeka na mwana na lweka na bo, etc.

Bana tuba yo ti bageste :

Yula bana nki bandinga kele mfunu mingi na verse yina. Yula bo nki bageste lenda songa ndinga yina. Tuba verse ti bageste yina.

Bana yimba ti kina :

Nge tula ton ti ritima na nkunga. To, kana mwana kele ya kele ngolo na mambu yina, nge lenda lomba yandi kusala yo. Longa yo na bana. Kana bo me zaba yo, bo lenda kina ti yimba yo. Bana zola mingi kusala yai, ti bo ta lemba ve kuyimba yo mbala mingi.

Bana tuba yo na ritima :

Kana bo me zaba kuyimba yo, lomba bo kutuba yo na ritima yina, kansi kuyimba ve, kansi kutuba kaka na ritima yina. Bo lenda sala bageste ti yo.

Shene (chaine) :

Nge songa addresse ti tuba ndinga ya ntete. Nge songa mwana mosi, yandi tuba ndinga ya ke landa. Yandi songa mwana ya nkaka, ti yandi yika ndinga ya zole, yandi songa mwana ya nkaka, etc. tii beno manisa verse. Na nsuka beno yonso tuba yo.

Mono kanga, mwana tuba :

Kana bana me zaba verse ndambu, sala nsaka yai. Nge yantika kutuba verse, kansi na kati, nge ‘vila’. Nge songa mwana mosi diboko, ti yandi fweti songa nge nki ndinga ke landa.

Kana bo zaba kusala yo mbote, nge lenda kanga ti mwana yina ya nge songa diboko, yandi fweti manisa verse ya mvimba.

Version Mwinda ya Bible kele Nki ?

- Na mukanda yai, beto me sadila ‘Version Mwinda’ ya l’ONG ‘Ministères pour Chaque Enfant’.
- Beto me traduire version yai ya Bible na mabanza kusadisa bana ti bantu ya ke mona nde kutanga Kituba kele ndambu mpasi kutanga.
- Beto me tula bafraze kuluta simple ti nkufi.
- Beto me tula pronons yonso ya ke songa Nzambi (Tata, Yesu, Mpeve) kuyantika na kisono ya ntete ya maziskule (T kansi t ve, Y kansi y ve, etc.) Yai sadisa mutangi kuzaba pronon yina ke songa nani.)
- Beto me tesa kusadila Kituba ya bubu, na mpila bantu tuba ndinga Kituba.
- Beto me sadila Kituba ya Baprovince Kwilu ti Kwango.
- Kusala yo beto me tala grek, français, anglais, ti Kituba version ya Société Biblique.
- Kana muntu mona nde beto me sala erreur, sonikila beto ti beto ta yindula mbote mabanza na nge. Kana beto mona nde beto me sala erreur, beto ta yidiika yo na edition ke kwisa. Merci mingi.

Mukanda ya ke landa mukanda yai : K302, Kisalu ya Yesu na Nima na Yudea